

WANT

Wanted
with...
UD...
Revised...

NIUSPEPA BILONG YUMI OL PAPUA NIUGINI STRETI 32 YIA NAU

Namba 1,488

Wik i stat long Fonde Jenueri 16, 2003

K1.00

INSAIT long Wantok	Hagen lukautim Katolik distrik bung - pes 2	Posin marasin inap bagarapim Bogenvil - pes 3	Momase rijon nius - pes 5	Spesel ripot. Malolo na rit pes 9-20	Wol Nius Amerika na Irak i laik woa pes 14-15	Winim K100.00 Painim bal resis pes 26
-----------------------------------	--	--	--	---	--	--

Ol tisa i noken straik: Minista i tok

YAKAM KELO i raitim

SAPOS ol tisa i joinim bikpela straik bilong ol pablik sevis union long Jenuari 27, 2003, ol bai kism taim long potnait pe na ol arapela alawens bilong ol. Dispela em strongpela tok lukaut i kam long siaman bilong Tising Sevis Komisin Alan Jogioba long dispela wik.

Mista Jogioba i tok ol i holim tok-tok pinis wantaim union long dispela hevi bilong bikpela straik ol pablik sevis union i laik holim long Jenuari 27, 2003. Olsem na long dispela taim olgeta tisa i mas go bek long skul bilong ol wanwan na redi long statim skul lon Februari 3, 2003. Dispela em de bilong olgeta skul bai stat.

Mista Jogioba i tok sapos ol tisa i go het na straik, ol inap katim pe o ol alawens bilong ol. Tasol ol tisa em ol pablik sevans wokmanmeri na ol istap insait long union na ol i gat rait long sanap wantaim ol arapela na straik o nogat, em laik bilong ol. Tasol ol i mas tingting gut long wanem kain hevi ol bai bungim bikos ol bai mekim samting bihainim lo bilong Tising Sevis Regulesen (lo).

Minista bilong Edukesen Michael Laimo i tok em i laik singaut i go long olgeta tisa insait long Papua Niugini long mekim samting isi long ol pikinini na ol papamama na go bek long skul na statim gut skul yia.

Minista Laimo i mekim strongpela singaut long ol tisa i harim tok na larim ol pikinini i skul gut long dispela yia na tu mekim isi long ol turangu papamama husat i wok long bungim bikpela hevi long mani bilong peim skul fi bilong ol pikinini long dispela taim.

Em i tok long sait bilong skul fi, ol bod o gavana na skul bod i mas

mekim isi long olgeta papamama na larim ol pikinini i go long skul bikos nau em i hatpela taim bilong mani i hevi long kantri na olgeta papamama bai painim hat tru wantaim skul fi bilong ol pikinini.

Minista Laimo i tok Gavman i makim pinis K60 milien bilong kari-maut wok bilong skul subsidi long dispela yia.

Provinsal gavman i kism pinis K20 milien long provinsal baset na nesanel gavman i holim K40 milien we tupela bai givim long ol skul taim ol i stretim gut plen bilong skelim mani bihainim orait Ministabai salim toksave long olgeta provins na ol skul long dispela.

Ol tisa i gat planti hevi tru olsem balus tiket i no kamap long ol long

taim ol i pasim skul na tu ol alawens bilong ol i no kamap gut long ol na ol i save paitem dua bilong edukesen opis long wanwan provins blong olgeta taim. Tasol taim provinsal edukesen opis i tok ol i no kism wanpela samting yet long Mosbi het kota, ol tisa i save go het na kism balus na go long Mosbi long het kota long kism

wanem samting i bilong ol tasol het opis i no stretim ol longpela taim i kam. Dispela hevi i kamap olgeta yia we planti tisa i save lok long Mosbi na i no save go bek hariap long ol skul bilong ol.

Tasol siaman Mista Jogioba i tok planti tisa i save mekim dispela bikos ol i laik yusim holidde bilong ol long Mosbi na mekim dispela wok bilong ol na bilong ol arapela tu.

Tasol tok tru em ol i noken kam nating nating long Mosbi bikos olgeta samting em provinsal edukesen opis bilong ol bai stretim. Sapos provinsal edukesen opis bilong ol i tokim ol long kam long Mosbi em bai orait. Ol i no ken kam long laik.

Ol tisa i gat planti hevi na wari bilong ol na taim gavman ino save stretim hariap, ol i save kam pulap long het opis long stretim.

Ol bikpela bilong edukesen opis i tok em i tru ol tisa i ken go long straik long wanem hevi na wari bilong ol. Tasol turangu ol skul pikinini tasol bai kism bikpela hevi tru long skul bilong ol bikos ol i no inap lainim wanpela samting gut long klasrum na tu ol papamama bai wari nogut tru bikos ol i wok hat tru long painim mani na bungim bilong peim skul fi tasol nau pikinini i no skul gut.

Dispela straik bilong pablik sevis union em bai karamapim olgeta pablik sevis wokmanmeri bilong gavman bikos long ol askim na singaut blong ol i go long gavman long mun Ogas las yia tasol gavman i no mekim wanpela samting long dispela singaut bilong ol union.

Planti long ol dispela singaut i karamapim ol pe na alawens bilong ol wokmanmeri, rausim pe bilong ol palamen lidas we ol i bin apim long las yia na planti arapela bikpela komplem we i save bagarapim kantri na wok bilong ol pablik sevans insait long kantri.



Ol mama tokaut long hevi kamap long pasim maket... • Everlyne Lei presiden bilong Maket Vendas Asosiesen i makim maus bilong ol mama husat i save salim ol sekan han klos, buai, smok na ol arapela samting, na i tokaut long hevi i kamap taim ol plis i stapim ol maket. Foto: ALISON ANIS.

UMW Niugini Limited **VIKING®**
EXPECT GREAT THINGS Garden Care Systems

**VIKING... I HELPIM YU
MEKIM LAIP I ISI**

PORT MORESBY BRANCH Morea Toba Road P.O. Box 5243 Ph: 325 5766 Boroko, NCD Fax: 325 0805	LAE BRANCH Seagull Road, Voco Point P.O. Box 1729 Ph: 472 2444 Lae, M.P Fax: 472 3342	LIHIR BRANCH C/- Lakaka, FMB Lihir Island Ph: 936 4194 New Ireland Province	VANIMO BRANCH P.O. Box Vanimo, Sandaun Province P/Fax: 857 1437	KOKOPO BRANCH Cnr Tokua Gelagela Rd Kokopo Ph: 982 9799 Fax: 982 8979
--	---	---	--	---

Plisripot

* MOSBI: Ol lain long 6-Mail setelmen i bin kisim sampela stil samting we ol yut long hap i bin stilim na givim i go bek long kampani. Plis i tok ol i amamas olsem dispela ol kago mak long planti tausen kina i go bek long kampani tasol ol i laikim moa helpim long holimpas ol man husat i stil.

* Plis komisina Sam Inguba i tokaut long Mosbi pinis olsem gavman i makim pinis nupela deputi plis komisina long kantri. Plis i save i gat tupela deputi na i nogat wanpela inap las wik tasol gavman i makim. Plis minista i tokaut long nem bilong nupela man ya em Garry Baki.

* LAE: Plis na raskol i wok long kamapim bikpela pait long Bulolo eria we raskol i bin sutim wanpela gol baja bilong Australia. Man Australia i go pinis long ples bilong em long kisim helpim tasol plis i wok long mekim bikpela lukaut long stapim ol raskol long mekim moa trabel.

* VANIMO: Sampela moa plis na difens fos opisa i wok long go insait long boda eria bilong Indonesia na PNG long lukautim boda. I gat moa toktok long bikpela hevi long boda eria na dispela em i bikpela samting tru we gavman i wok long lukluk i go insait long en.

* MENDI: Plis i wari olsem Kagua-Erave distrik i no redi yet long sapilmentri ileksen we bai kamap neks mun. Plis i tok gavman i mas kamapim aweanes long olgeta distrik bai ileksen bai go het gut.

TARI: Plis i holimpas pinis man husat i kukim Tari gavman opis. I gat ripot olsem man ya i sekyuriti gad bilong gavman opis taim em yet i bin kukim. Man ya i stap long Baisu haus kalabus long wetim kot bilong em.

WANTOK

NIUSPEPA BILONG YUMI PAPUA NIUGINI STRET

P.O Box 1982, Boroko
Telepon namba: 325 2500
Feks namba: 325 2579
email: word@global.net.pg

PE BILONG WANPELA
YIA 52 NIUSPEPA

PLES	AIR
PNG	K140.00
OSTRELIA NA NU SILAN	US\$67.00
ESIA PASIFIK NA JAPAN	US\$80.00
AMERIKA NA YUROP	US\$150.00

Katolik Sios holim histri bung

BIKPELA bung bilong Katolik Sios bilong PNG i kamap nau long Fatima klostu long Banz insait long Westen Hailens provins.

Bung ya i bin stat long Mande Janueri 13 na bai pinis long dispela wiken.

Ol i kolim bung long "Year of the General Assembly of the Catholic Church in PNG".

Long lons bilong dispela, Nunsio Asbisop Yilana i bin to kdispela em i bikpela samting long Katolik Sios long kantri taim Asbisop Michael Meier bilong Hagen i tok dispela em nupela samting long histri bilong Katolik Sios long PNG.

Samting olsem 85 deleet na lida i makim Katolik Sios i wok long stap insait long dis-

pela bikpela bung long statim Jenerel Asembli bung we ol bai go hetim insait long dispela yia. Ol Biops, ol pater, ol sios lei woka, ol rilijes Bruder, ol Sister na ol bikman long ol sios dipatmen i stap insait long dispela bung.

Nunsio i tok ol lain i bung long statim asembli we bai helpim sios long kamap strong long preia na lukluk long plen bilong Bikman long statim em wanpela we ol i ken skelim na glasim ol samting taim ol i "Sanap isi, glasim ol samting na plen long futja".

Dispela wanpela yia stadi o glasim na skelim sios long

lukim wanem rot em i go long en na bihain taim bilong em em i namba wan taim bilong Katolik Sios long wokim dispela. Tingting long wokim dispela samting i bin stap long longpela taim na nau tasol, bihainim ripot na askim bilong Santu Papa Pop John Paul 2 ol i kolim long "Sios long Oseania" ol sios lida i strongim tingting long holim dispela bung.

Long dispela ripot, Pop John Paul 2 i singautim Katolik sios long Oseania long glasim ol yet long lait bilong Jisas, wokabaut bihainim rot bilong em, tokaut long trupela samting na stap long Laet. Katolik Sios long PNG i namba wan insait long Oseania rijen long

bihainim dispela singaut bilong Santu Papa na wokim samting long en.

Bihainim gutpela welkam ol bin kisim long Kagamuga ples balus na gen long Gut Sefed Seminari, ol sios lida ya i bin rejistaim ol yet na kisim ol rum bilong stap long en long taim ol i holim Asembli ya. Asembli i glasim 38 posisen pepa ol bin redim long glasim na skelim long dispela bung.

Long pinis bilong wik, ol bai toktok long ol samting i sut long daosis na peris level long sios long PNG.

Dispela i givim sans long olgeta Katolik long tokaut long ol samting we i sut long sios na i ken helpim ol long plening bilong ol long wok-abaut long futja.

Lae lukluk long narapela PMV rot

ROSALYNE ALBANIEL
i raitim

OL I tok pablik trenspot sistem long Lae i no wok gut na ol i painim sampela narapela rot nau long ol pablik i ken kalap raun long en.

Morobe Gavana Luther Wenge taim em i opim forum we i sut long dispela samting i bin tok em bai traime long kisim tok orait bilong ol trenspot atoriti sapos ol i ken larim ol ruel PMV trak long mekim ron insait long siti.

Em i tok sapos ol i givim tok orait long dispela tingting bilong em, ol i laikim bai ol Morobe lain tasol i go insait long en.

Em i tok em kisim planti komplek pinis long ol PMV i no pinisim rut o wokabaut bilong ol na olsem, planti lain i bungim hevi na ol i no go kamap long ples we ol i laik go long en.

Ol dispela i kisim moa hevi em ol lain i stap ausait long Lae siti. Em bin autim wari tu bilong em olsem ol lain o atoriti i gat wok long sekim ol PMV olsem ol i bihainim na pinisim ol rut bilong ol long Trenspot Dipatmen na Plis i no karimatu gut wok.

Tasol em bin tok husat mn i laik go insait long PMV bisnis i mas gat gutpela ka we i wok gut na bai ol pasindia i sindaun gurt insait long en.

"Ol bai givim ol lainsens long ol ka we i gutpela na i no nabaut nabaut," em bin tok.

Em bin askim ol asples Morobe pipel long tingting strong long go insait long dispela bisnis.

Em bin tok em i makim pinis presiden bilong Siassi Lokol Level Gavman Kaunsil na trenspot Minista em Simon Senap long go aps long dispela peoposel.

"Pablik i save yusim ol PMV long ol wokabaut bilong ol i mas gat narapela sambai rot na taim hevi i kamap long wanpela, ol woklain bai i gat we long go long wok na kam bek long ples ol i stap long en," Mista Wenge i tok.

Ol rot sait maket bagarapim ples

PAUL ZUVANI
i raitim

TINGTING bilong boss bilong Nesinel Kapital Distrik na Central Provins polis Jeffery Vaki long rausim ol liklik rot maket i gutpela tru.

Planti manmeri i amamas long dispela tingting na wok.

Ol i tok dispela wok bilong em i mekim na nau Pot Mosbi siti i klin liklik bihain long siti i pulap long planti pipia i kam long ol rot maket ol manmeri i save mekim long salim buai na simuk.

Jems Asoyabu bilong Okapa, Isten Hailans provins husait nau i wok stap long Pot Mosbi i tok em i no amamas long ol bikpela ples olsem daun taun Pot Mosbi, Waigani na Boroko i pulap long skin buai, buai spet na kainkain ol pipia.

Em i tok pipia ol manmeri i tromoi i givim nem nogut long mipela olsem mipela Papua Niu Gini ino manmeri bilong lukautim ples.

"Na dispela i tru. Ating yumi ino save long lukautim bodi na haus bilong yumi pastaim na olsem dispela i soim pasin tru bilong yumi long bikpela ples," Mista Asoyabu i tok.

"Sapos yumi i save long lukautim yumi pas-



• Jeffery Vaki.

tain ating yumi bai save long lukautim ol narapela samting," em i tok.

"Planti ol Papua Niu Gini i save go long narapela kantri long skul na ol manmeri long narapela kantri husait ino bin kam long Papua Niu Gini i ting Papua Niu Gini i wanpela kantri bilong lukautim samting.

Tasol sapos ol i bin kam long hia bai ol i save olsem mipela ino lain manmeri olsem.

"Na tu sapos ol i bin kam bai ol i save na tokaut stret olsem planti bilong yumi ino save long lukautim yumi yet. Nau yumi husait go long narapela kantri kisim sem long dispela tok.

"Mi amamas tru na tok tenk yu igo long Jeffery Vaki long kamap wantaim dispela tingting na wok. Mi hop dispela wok i mas stap olsem yet na bai siti bilong yumi i luk olsem ples bilong ol man istap," Mista Asoyabu i tok.

Narapela meri Elizabeth Wake bilong Is Sepik Provins husait tu i wok na stap long Pot Mosbi i tok amamas tu long dispela tingting na wok bilong Mista Vaki.

Em i tok moa olsem i no buai maket tasol i mekim ples i luk nogut. Nogat. Tingting na pasin bilong yumi wantaim i mekim sindaun na ples bilong yumi i bagarap.

"Sapos yumi lukluk long wokabaut bilong ol man bai yumi lukim olsem sampela man i gat wok na ol i wok-abaut. Sampela i nogat. Ol i bilong wokabaut, was na bagarapim ol narapela tasol," Misis Wake i tok.

"Ol banis bilong haus na ples i pulap long kainkain mak. Na ol bikpela haus i nogat gutpela was i save bruk long raskal pasin.

"Sapos yumi lukluk long baret bai yumi lukim kainkain pipia. Sampela taim ol manmeri i go long ol baret na mekim olsem toilet bilong ol.

"Em ol dispela tingting na pasin nogut bilong yumi tasol i bagarapim sindaun na ples bilong yumi," Misis Wake i tok.

Em i tok sapos yumi laikim gutpela sindaun orait yumi mas skelim na senisim ol pasin nogut bai sindaun na ples bilong yumi i kamap gut.

TORO

TORO WANTAIM BRO BILONG EM SAKI SINDAUN NA STORI LONG OL AMERIKA I BIN GO ANTAP LONG MUN...

AAH, SAKI... OL AMERIKA OL GO ANTAP LONG MUN... OL RASIA I LUKIM NA OL TU OL I GO LONG MUN...

EM NAU... I YUMI OL KANAKA EM NOGAT NEM TURU. OL SAINA, SAPAN, INDIA, OSTRELIA TU OL GO PINIS NA KAMBOK... NA YUMI BAI GO LONG MUN LONG WANEM TAIM TURU?

SSH! NOKEN BISIL OL I GO LONG MUN. TASOL YUMI BAI GO LONG ISIU.

ISIU? EM WANEM PLES YAH?

ISIU... EM LONG TOK MOTU EM STAR.. YU SAVE? OL I GO MUN, TASOL YUMI BAI GO LONG STAR!!

TASOL MAI SAKI... STAR I STAP LONG WE TRU! MUN ISTAP KLOSTU... STAR I ABRUSIM MUN NA GO ANTAP OLGETA! BAI YUMI GO OLSEM WANEM?

NOKEN BISI TUMAS... YU GO LONG ERIMA, KISIM PMV BILONG OL BEREINA NA KUKIM TASOL LONG HIRITANO HAIWE I GO BAI YU KAMAP LONG ISIU STRET!

SAKI EM FAOL OLGETA. TASOL TORO EM STRONGIM KONA OLSEM YUMI GAT WANPELA PLES OL I KOLIM STAR, EM ISIU TASOL LONG KAIRUKU..

Wollom tok K2.4 milien i go long ol giaman projek

YAKAM KELO i raitim

MEMBA bilong Mosbi Not Is Caspar Wollom i tokaut olsem moa long K2.4 milion bilong ilektoret i bin go long ol giaman wok na ol projek nating.

Mista Wollom i tok Dipatmen bilong Fainens i bin go het na rausim ol dispela mani long opis bilong Ruel Developmen Opis we i save lukautim na skelim ol mani bilong ol ilektoret taim ol memba i save raitim ol projek na salim ripot i go long kisim mani.

Mista Wollom i tok planti projek i nogat wok tru i kamap na sanap na mani i bin go aut nating na dispela soim olsem bikipela paol pasin tru i bin kamap long mani bilong ol pipel bilong Mosbi Not Is.

Em i tok tu olsem sampela projek we ripot bilong mani i go long en i soim olsem ol dispela projek i stap ausait long Mosbi Not Is ilektoret. Na dispela i no stret tru long ol pipel bilong Mosbi Not Is.

Mista Wollom i tok em i bin raitim pas i go long Minista bilong Treseri Bart Philemon long dispela hevi na em i kisim tok orait bilong Minista Philemon long go het na sekim ol dispela paol pasin.

Mista Wollom i askim pinis ol fraud skwat long lukluk insait long dispela hevi na sekim ol rekot na ol samting we i no bin kamap stret.

Olgeta rekot bilong mani na ol wok i bin kamap long taim olpela memba bilong Mosbi Not Is Philip Taku i bin stap long opis.

Mista Wollom i tokaut olsem wanpela bikipela asua tu em taim em i bin winim sit long Julai na kisim opis pinis, narapela mani mak olsem K86,000 em ol Fainens opis i wok long peim i go yet long ol projek we em olsem nupela memba i no bin save o kisim wanpela toksave long en.

Mista Wollom i strongim tok tu olsem i gat tambu tu long ol wok bilong sios i noken kisim mani i kam long opis bilong

Ruel Developmen Opis we i stap aninit long non diskreseneri fan.

Tasol olpela memba i bin go het na yusim planti mani bilong ilektoret long ol sios wok bilong wanpela sios insait long siti. Na sampela wok bilong dispela sios i no stap long Mosbi Not Is. Wanpela i stap long Mosbi Saut na wanpela long Mosbi Not Wes.

Memba i tok long makim 120,000 pipel bilong Mosbi Not Is, em i laik lukim olsem ol rekot bilong ol dispela wok na mani i mas kamap klia bai ol pipel i ken save long mani bilong ol i go long we na wanem kain wok tru i kamap long sevim ol.

Em i tok bikipela samting em gupela wok na stretpela pasin i mas kamap insait long opis bilong ol pipel bilong Mosbi Not Is.

Sampela long ol projek rekot i soim olsem mani i go long mekim em mipela i sekim tasol i nogat wanpela wok o projek tru i kamap na i stap nau, Mista Wollom i tok.

Posin marasin i ken bagarapim Bogenvil

VERONICA HATUTASI i raitim

BIKPELA hevi bai kamap long ol pipel na ol bus graun na wara long Bogenvil sapos ol save lain i no sekim ol kontena bilong posin kemikol o marasin i stap yet long Panguna main.

Bihainim dispela, i gat bikipela singaut nau long wanpela grup husat i no stap insait long Bogenvil hevi long go insait long Panguna na sekim ol kontena i gat ol posin kemikol long en.

Ripot Wantok i kisim i tok planti pipel na tu papa bilong Bogenvil hevi em long Francis Ona i bilip olsem dispela ol kontena i gat sainait marasin, em posin kemikol tru we ol maining kampani i save yusim long wok bilong ol. Na Bogenvil Kopa kampani i bin yusim ol kemikol ya long taim Panguna main i wok yet tasol taim hevi i go nogut long 1989, main i bin pas. Na ol i lusim planti ol samting i stap bikos ol paitman tu i bin raunim Panguna na i no seif long ol wokman na husat moa i go long Panguna na stretim ol samting.

Ripot i tok ol kontena ya i sanap long Konsentreta na Sentrel Woksop eria long Panguna Main.

Ripot i tok ol hevi we bai kamap sapos ol kontena i tru tu

gat sainait marasin long ol na samting i kamap olsem ol i bruk na kapsait, bikipela hevi bai kamap long ol pipel na samting long graun na wara long hap. Olsem na Mista Ona i tambuim tru eria we ol kontena i sanap long en na putim ol man long sanap was long en bilong stapim ol man long go klostu long ol (kontena).

Planti lain i autim wari olsem sapos ol i no wokim samting hariap long sekim na wokim ripot long ol kontena ya we i sanap i stap moa long 13 krismas pinis long san na long ren, ros bai kaikaim ol o bai ol kontena i bruk na em bai narakain olgeta.

Em i tok sapos dispela samting i kamap, em bai kamapim bagarap long ol samting na ol pipel i stap long rot bilong wara na ol nambis eria.

Wanpela man husat i save i go na i kam long Panguna na ples Guava na toktok wantaim Mista Ona i tok tru ol kontena ya i stap na bikman ya (Ona) i bilip olsem em dispela ol kontena sainait ya.

"Ona i putim bikipela tambu long eria ol kontena i stap long en. Em i putim sampela man long was long dispela hap. Mi no inap long tokaut hamas kontena stret i stap bikos mi tu bin sanap longwe tasol na lukim ol bikipela kontena we bikipela bilong wan

wan long ol i winim 44 galon dram.

"Bikos ol dispela dram i sanap ausait moa long 13 yia pinis, ros bai kisim ol na ol bai bagarap na bruk ya. Na dispela bai kamapim bikipela bagarap long laip bilong ol pipel na bus, wara na graun, moa yet long ol lain i stap arere long Jabawara na ol nambis lain long Torokina, Bana, Siwai na Buin," man ya i tok.

Man ya i tok long wokabaut bilong em i go long Mista Ona na toktok wantaim em, Mista Ona i bin tok em i no inap long larim ol man nating i go long eria ol kontena i stap long en. Em bai larim tasol ol ekspet o ol save-man olsem ol saientis long sekim na wokim ripot long dispela samting.

Panguna we ol dispela kontena i stap long en i stap insait long "no go jon" o tambu eria we ol lain bilong Mista Ona em long Me'ekamui grup i bosim.

Man ya i tok sampela lain i mas go kwiktaim long sekim dispela samting. Tasol wanem grup i tingting long go i mas noken gat hait samting o ol hait tingting long go long Panguna.

Em i tok Mista Ona i laikim grup olsem Greenpeace tasol dispela em laik bilong em yet.

Em i tok wanem grup i kisim tok orait bai i mas go wantaim gupela tingting long karimaut wok ol i go stret long mekim.




Painim gol... • Ol liklik wok gol maining arere long wara.

Somare winim ileksen kot


PRAIM Minista Sir Michael Somare i winim ileksen kot bilong em long dispela wik taim Nesenel Kot Jas i tok kot i nogat inap tok tru o evidens ong kotim Sir Michael Somare.

Jas Sir Kubulan Los i tok em i harim olsem olgeta toktok we i kamap egensim Sir Michael Somare em ol wankain toktok tasol na i nogat wanpela stretpela toktok o tok tru we inap strongim dispela kot egensim Sir Michael Somare.

Sir Michael i bin winim rijinol sit bilong Is Sepik provins tasol ol arapela kendidet i bin kotim em long pasin bilong grisim ol manmeri wantaim ol kago na ol samting long winim. Tasol kot i painimaut olsem i



• Sir Michael Somare. nogat wanpela klia evidens o tok tru i stap insait long dispela olsem na kot i rausim dispela ileksen kot egensim Somare. Wankain tu; pikinini bilong em na memba bilong Angoram



• Arthur Somare. na Gavana bilong Is Sepik Arthur Somare tu i winim kot bilong em egensim ol kendidet husat i kotim em long risal bilong 2002, Nesenel ileksen bilong Angoram Open sit.

Sevim mani bilong edukesen, Oposisen i tok


GAVMAN bilong Somare i no lukim Edukesen bilong ol pikinini long Papua Niugini olsem bikipela samting. Sapos gavman i ting olsem, orait mi bilip gavman inap painim mani na putim i go insait long ol skul na mekim skul i fri long olgeta pikinini long kantri, Oposisen lida na memba bilong Bulolo John Muingnepe i tok.

Oposisen lida i mekim dispela toktok long bekim ripot we i tok em i no luksave long hevi we kantri i stap long en tude. Tasol Mista Muingnepe i tok em ino inap givim beksait long bikipela pen ol papamama i bungim tude long hevi bilong mani na tu bikipela wari bilong ol pikinini we yu ken lukim long pes bilong ol.

Mista Muingnepe i tok gavman i ken painim mani sapos Somare Gavman i putim edukesen bilong ol pikinini olsem bikipela samting insait long lewa bilong em. Tasol i luk olsem edukesen i no wanpela bikipela samting long dispela gavman, em i tok.

Mista Muingnepe i tok gavman inap sevim bikipela mani long olgeta ya sapos em i ken katim sampela wok insait long pablik sekta we i save westim na kaikaim bikipela mani olgeta ya na i no save kamapim wanpela gupela sevis o kaikai i kam bek long ol pipel na kantri.

Em i tok dispela gavman i no tuktuk moa long katim ol sampela wok



• John Muingnepe.

bilong pablik sevis we i save kaikaim mani nating na i nogat sevis na developmen i kam bek long pipel.

Em i tok pasin bilong PNG pablik sevis em bikipela mani na helpim tru i save go long en na liklik mani na liklik helpim tru i save go long ol developmen na ol eria bilong bringim sevis na helpim long ol pipel. Dispela i no stret na Somare gavman i no mekim wanpela samting long sevim mani na ol kos we i save go nating nating. Na ol bikipela eria bilong kirapim developmen olsem edukesen, agrikalsa na ol rot, bris, ples balus na arapela sevis olsem i no save kisim bikipela helpim long gavman.

Oposisen lida i tok em i bilip olsem i gat mani i stap long gavman sistem. Tasol bikipela samting em long makim wanem wok i bikipela samting na i mas kisim gut sapat na helpim.

Em i tok Somare gavman i mas mekim wanpela strongpela disisen

nau long rausim ol eria we i save kaikaim bikipela mani nating na i nogat wok tru bilong ol i kam bek long sevim kantri na givim developmen na sevis long ol pipel. Mista Muingnepe i askim Somare gavman long katim ol dispela eria nau na mekim mani i stap sambai long kirapim na strongim wok bilong edukesen. Dispela em salens Somare gavman i mas mekim long soim eksen bilong em long ol wok tru bilong sevim pipel na kirapim developmen.

Edukesen Minista Michael Laimo i bin tokaut pinis olsem hevi bilong mani long kantri i bikipela tru bikos olpela Gavman bilong Sir Mekere Morauta i bin kamap wantaim Fri Edukesen polisi we i sotim tru kantri long mani mak olsem K800 milien. Na dispela hevi bilong K800 milien i stap yet tude wantaim dispela gavman bilong Somare. Dispela tu i no sevim olgeta lain long kantri bikos ol memba bilong Pipels Demoketiks Muvmen (PDM) tasol i wok long kisim ol sek mani na i go givim long ol skul long ilektoret bilong ol na olgeta arapela memba bilong palamen i nogat.

Mista Laimo i tok dispela Fri Edukesen polisi i bin kamap tasol long traun winim ileksen na i nogat strongpela as tru bilong kamapim dispela fri edukesen insait long kantri. Long dispela as, bikipela mani i lus nating.

Ol ovasis pipel laik lukim ol pisin long Kiunga

IAN KAKARERE
i raitim

OL INTANESENEL grup o grup we i save kam long ovasis long lukim na stadim pasin bilong ol pisin bai kam bek gen long Kiunga, long Westen provins.

Na namba bilong dispela ol grup bai go antap yet.

Jenerel menesa bilong Kiunga Neisa Tuas, Samuel Kepuknai i tok moa long 14 intanesenel grup i mekim buking pinis long 2003 long kam long Kiunga long lukim na stadim ol pisin long hap.

Mista Kepuknai i tok long las yia yet, i bin gat 18 grup husat bin go long Kiunga.

Ol turis grup i save kam long Amerika, Yurop, na Japan.

Na ol save kam long mun Jun i go inap Septemba long taim bilong bikpela san long hap sait bilong wol we ol i stap.

Mista Kepuknai i tok planti bilong dispela ol visita husat i save kam long lukim pisin em ol lapun man na meri na kristmas bilong ol em 50 na

60 na planti bilong ol i lusim wok pinis.

Mista Kepuknai save kisim ol grup i go long Ikame wail laip lods we i stap long Elevala wara. Na dispela wara em sampela 50 kilomitas is long Kiunga.

I gat ol narapela hap tu long not bilong Kiunga arere long Kiunga na Tabubil haiwe na klostu long Tabubil we ol i ken lukim ol pisin tu.

Ol televisen grup tu i bin kam raun long Kiunga long sampela yia igo pinis na ol bin mekim sampela vidio piksa o stori long ol pisin we i save stap long Kiunga.

Wanpela bilong dispela lain em wanpela man husat i save gut tru long pasin bilong ol abus na ol samting bilong bus.

Nem bilong dispela man em David Attenborough na ol piksa bilong em save kam aut long Britis Brodcasting Koporesen (BBC).

Dispela ol tok piksa we man ya bin mekim long televisen i opim ai bilong planti ol man meri ovasis na kirapim tingting bilong ol long kam visitim Kiunga long lukim na stadim ol pisin.

Piu asples tok ol i papagraun bilong Wafi main

OL PIPEL bilong Piu long Mumeng Morobe provins i tokaut olsem ol i papa bilong graun long Wafi gol main long Mumeng eria.

Siaman bilong Piu Land Group Incorporated Martin Tapei i tokaut olsem long Julai 26, 2001 ol i bin rejistaim ol graun we i karamapim Wafi gol main tu wantaim. Olsem na ol i papa bilong graun nau.

Tasol Minista bilong Lens Robert Kapaol i bin tokaut olsem ol Piu asples i rejistaim dispela hap graun long Wafi maining eria i krangkri tru na i no stret olgeta bikos ol i no papa bilong dispela hap graun. Olsem na em i askim seketeri bilong Lens long ol i mas stretim gen dispela samting na rausim dispela rejista bilong ol Piu pipel.

Mista Kapaol i tok i gat krangi na hait pasin i bin kamap long givim rejista i go long ol Piu long dispela graun.

Dispela graun i gat kot disisen i bin stap pinis long en. Provinsal Lens Kot i bin kamap long Wau na i givim dispela graun i go long Hengambu na Yanta olsem tupela i papa bilong graun. Dispela kot disisen i mekim na tupela ples ya i save kisim loyolti peimen long olgeta yia olsem papagraun.

Long nau yet i nogat wanpela kot i stap egensim Yanta na Hengambu long salensim dispela kot disisen yet. Olsem na long ai bilong kot Yanta na Hengambu em papagraun yet.

Tasol Mista Tapei wantaim grup bilong em long Piu i tok dis-

pela rejistresen bilong ol we ol i gasetim pinis long gavman gaset i soim ol i papa tru bilong graun. Olsem na ol i askim maining kampani husat i wok long painim gol antap long Wafi long mekim samting stret na kirapim maining o nogat ol i mas kirap i go bai ol asples i ken kisim narapela maining kampani i kam mekim wok maining.

Ol Piu lain i tok bai ol i askim kampani long stapim loyolti pemen bilong Yanta na Hengambu.

Minista bilong Lens Robert Kapaol i tok dispela gaset bilong Piu asples i no stret na ol i kalapim sampela stretpela rot olsem na Lens opis i mas sekim gen dispela samting na stretim gut.

WANTOK

NIUSPEPA BILONG YUMI PAPUA NIUGINI STRET

P.O Box 1982, Boroko
Telepon namba: 325 2500
Feks namba: 325 2579
email: word@global.net.pg

PE BILONG WANPELA YIA 52 NIUSPEPA

PLES	AIR
PNG	K140.00
OSTRELIA NA NU SILAN	US\$67.00
ESIA PASIFIK NA JAPAN	US\$80.00
AMERIKA NA YUROP	US\$150.00

Karkar pipel kamapim wanbel wantaim Gaubin haus sik

FUZO PAUL
i raitim

OL PIPEL bilong Karkar Ailan long Madang provins i mas lukautim gut ol bikpela sevis bilong gavman na sios sapos ol i laik lukim tru ol dispela sevis i go insait tru long ol ples bilong ol.

Distrik Edministreta bilong Sumkar Distrik Alung Wang i bin mekim dispela toktokk taim em i witnessim sainim bilong wanpela wanbel pepa (MOA) namel long 7-

pela wod memba bilong Tagub pipel na bikpela Luteran Gaubin haus sik long mun Desemba.

Moa long 3000 pipel i bin bung long Gaubin haus sik long witnessim dispela wanbel bung we nau bai i kamapim gutpela sindaun namel long ol wokmanmeri bilong Gaubin haus sik, ol samting bilong haus sik na ol Karkar pipel.

Distrik Edministreta Mista Wang i givim strongpela toktok long ol dispela 7-pela lidaman olsem saining bilong dispela wanbel

pepa em nau bai makim wanpela strongpela wanbel pasin namel long pipel na sios long Karkar na Bagbag ailan.

Wankain toktok tu i bin kamap long Reveren Bag Gubag bilong Luteran sios insat long Karkar ailan we i sut i go long ol yangpela bilong ailan na tu olgeta visita long luksave long ol dispela sevis we sios i save givim i go long ol.

Em i tok helt sevis em i bilong ol pipel na sapos pipel i bagarapim dispela bikpela sevis em i olsem pipel yet i kilim ol lain bilong ol yet na tu kilim ol pikinini bilong ol i kam bhain.

Dispela saining bilong wanbel namel long Tagub pipel na bikpela Luteran Gaubin haus sik i kamap bhainim wanpela bikpela birua we ol sampela yut i bin holim pasim tupela

lapun Jemen man na meri wantaim ol pikinini bilong Jemen Dokta meri husat i dokta bilong Gaubin haus sik taim ol i bin wokim lukluk raun antap long bikpela maunten paia long Karkar ailan.

Dispela birua i bin kamapim bikpela hevi namel long Gaubin haus sik na Karkar pipel we Gaubin i bin stapim ol helt sevis bilong em inap tupela wik olgeta tasol bhain i bin opim bek ol sevis bilong em bhainim kra i bilong ol pipel na ol wanbel toktok namel long ol lidaman bilong sios na komyuniti.

Dispela birua tu i bin kamapim dai bilong wanpela yut bhain long Plis Tas Fos i bin sutim em.

Wanpela haus gel bilong Dokta tu i bin inap tupela wik olgeta

insait long maunten eria tasol bhain sampela pipel bilong ples i bin painim em.

Klostu dispela gel i dai long nek drai na hangre.

Presiden bilong Karkar Lokol Level gavman Mista Ireng i tok em i gat bikpela amamas long ol pipel, ol lida na Gaubin haus sik woklain long kamapim dispela wanbel.

Em i tok dispela i soim olsem pipel i gat rispek long lo na tu i laikim gutpela sindaun maski hevi i kamap tasol em i tok dispela agrimen i mas stap longpela taim. Sapos ol pipel i no bhainim dispela agrimen bai ol lida i kisim tok.

Ol Tabug pipel i bin sindaun wantaim ol wokmanmeri bilong Gaubin haus sik long bikpela kaikai na sikan.

BIABIA BIABIA EM KAMAP SEKETERI BILONG DEFENS FOS...MINISTA I SALIM WANPELA FEX IGO LONG OPIS BILONG EM...

... MINISTA I LAIKIM BAI YUMI TRENIM 20-PELA STRONG SOLDIA LONG GO PAIT LONG GOLF.. MI WARI LONG OL MERI PIKININI BILONG OL DISPELA SOLDIAS.. BAI SADAM HUSEN KLIM OL..

BIABIA I RIDIM DISPELA FEX NA EM WARI TRU LONG SOLDIAS BILONG YUMI...

TASOL BIABIA I NO RIDIM FEX GUT.. MINISTA I LAIK 20-PELA SOLDIAS I GO LONG GOLF OF KEREMA LONG BILDIM BRIS LONG HAP..

ER.. MISTA SEKRETERI, ATING YU RIDIM PEPA KARANGI..MINISTA ILAIK OL GO LONG KEREMA GOLF PROVINS. I NO MIDUL IST< IRAK >.

NEK DE BIABIA EM RISAIN BIKOS' KLOSTU OLGETA SOLDIA I MEKIM MIUTINI LONG BARAKS.

Ol didiman laikim kakao bod long raun

OL OPISA bilong divisen ov Praimeri Industri long Sandaun provins i singaut long ol bod memba bilong kakao industri long go raun long ol provins na lukluk long ol wok bilong kakao long ol provins insait long kantri.

Ol dispela didiman i tok ol bod memba i no save raun na lukim ol wok bilong dispela industri na tu skekim wanem kain wok na hevi dispela industri i stap insait long en.

Ol didiman long Aitape na Lumi eria i mekim dispela toktok bikos ol i lukim olsem ol bod memba i save sindaun na toktok tasol na ol i no save long wanem kain sevis o wok tru i kamap

insait long ol wok bilong kakao indastri long ol provins na wanem kain samting ol didiman i laikim bai bod i mas luksave na toktok long en long strongim wok bilong ol insait long gutpela bilong kakao industri.

Ol asples lain husat i save planim kakao na salim bai laikim tu long lukim ol bod na ol saveman bilong kakao long go raun long ples na sekim wok bilong ol.

Dispela inap sapatim na strongim wok bilong ol asples long kakao. Na tu tok kila long ol long ol wok bilong kakao insait long kantri na pait sanap olsem wanem.

Morobe gavman putim sas long taun pablik toilet

MOROBE provinsel Gavman i tekova long ol pablik toilet insait long Lae siti na nau ol bai stat sasim ol pablik husat i yusim ol.

Gavana blong Morobe, Luther Wenge, bin tok aut long dispela go long Tunde Jenyueri 14, 2003 long wanpela pablik forum we bin kamap long Lae.

Mista Wenge i tok olsem provinsel gavman i givim wanpela kontrak go long ol pipel blong Buang Kominiti insait long Lae long stat klinim ol toilet na was long ol.

Em tok PEC bin bung ino long taim igo pinis na givim yesa blong em long ol dispela lain long mekim dispela wok antap long dispela i bin oraitim mani mak olsem K100,000 aninit long distrik sapot gren long dispela wok.

Em bin tok olsem wok blong lukautim ol pablik toilet bin stap aninit long Lae Siti Kaunsel tasol dispela lain ino bin wokim wok blong ol gut na planti blong ol dispela samting i bagarap nogut tru na em ino wanbel.

Em tok toilet em bikpela samting tasol long siti i bagarap.

"Long ples blong ol waitman ol dispela samting save stap klin oltaim na ol pablik save go kam long laik na have yusim tasol long hia dispela pasin ino stap," em tok.

Gavana Wenge itok olsem gavman blong em makim ol Buang kominiti long go pas long dispela wok bikos dispela ol lain save gut tru long wok hat na tu long lukautim ol samting.

Em tok olsem ol makim Presiden blong Buang Lokel Level Gavman Kaunsel husat tu i siaman blong lo na oda komiti blong Lae, Steven Sep,

long go pas long dispela bikpela wok.

"Wok blong Mista Sep em bai long bungim ol manmeri blong Buang husat laik mekim dispela wok na givim wok long ol," em tok.

Ol wokman husat ikam fowet long mekim dispela wok bai klinim pastaim olgeta pablik toilet insait long Lae. Bihain long dispela i bai gat man istap husat bai sanap na was long hap na sasim ol lain husat i laik yusim ol dispela samting.

"Dispela fi em blong ol givim yu hap toilet pepa na larim yu i yusim toilet," Mista Wenge i tok laik.

Aninit long dispela kontrak ol dispela lain blong Buang bai go pas tu long klinim ol baret insait long siti na long wokim ol flawa bet na wokim siti i kamap stail stret.

Long wankain taim Mista Wenge bin tok aut tu olsem provinsel gavman i komitim narapela K50,000 go long wanpela kontrak blong lukautim na was long Lae Maket.

Em tok dispela kontrak ol givim go long ol asples blong Labu.

Em tok dispela ples maski i stap klostu long bik siti ino lukim han blong gavman long sait blong sevis na tu ino gat gutpela developmen kamap long hap.

Long dispela as ol givim ol dispela kontrak bai mani ol kisim bai helpim ol long developim ples blong ol.

Aninit long dispela kontrak ol asples lain husat i kisim dispela wok bai klinim na tu was long maket na tu long ol man meri husat igo kam long salim na tu long baim kaikai.

Wok blong ol em bai lok wokim bai maket i ron gut na ino gat trabel.

Lae tok gutbai long gutpela prenmeri

KOMYUNITI blong Lae long las wik bin tok gutbai long wanpela gutpela meri-Let Robyn Warkia, long las wik.

Let Misis Warkia husat bin maritim Noah Warkia, wanpela bikman bilong spots na komyniti lida long Lae, bin dai long Fraide Jenyeri 3, bihain long em bin gat liklik sik.

Long las wik Tride, planti manmeri bin kamap long hap blong Buabum Hostel na Elementeri skul long Kasowari Rot soim las respek blong ol long femeli blong Misis Warkia.

Bihain long dispela i

••• bikpela helpim long ol yangpela

bin gat wanpela lotu makim dai blong em long Kasowari Yunaited Sios.

Ol Is Niu Briten Kominiti long Lae bin go pas long dispela lotu.

Olpela Vais Sensela blong Unitek na femeli pren blong Warkia femeli, Dokta Mosley Moramoro, bin ritim laip stori blong dispela bikmeri long dispela lotu.

Dokta Moramoro bin tok long dispela taim olsem laip blong dispela meri em bin wanpela we laip na gutpela sindaun blong ol yang pipel bin bikpela samting tru.

Dispela bin kamap

ples kila long ol prosek insait long Lae na tu long ol arapela senta we Misis Warkia bin karim aut long wok blong em olsem workmeri blong grup ol kolim long YMCA.

Sampela ol bikpela prosek long Lae yet em dispela hostel na elementeri skul long Kasowari Rot.

Dokta Moramoro tok Misis Warkia em blong Skotlen long Gret Briten.

Em bin lusim ples blong em taim em em kisim wok wantaim YMCA na dispela i pulim em go wok long Saut

Afrika na bihain kam long PNG we em bungim man blong em husat bin wok wantaim YMCA long PNG.

Tupela bin marit na gat tripela pikinini tasol dispela ino stapim tupela long go het yet wantaim gutpela wok blong tupela.

Em tok wok blong YMCA bin stap stong bikos long tuhat blong dispela meri husat igat narakain strong.

Maski em lus pinis kominiti long Lae bai tingim em tu long wok blong em long kamapim na strongim kerols bai

kendel lait we save kamap long olgeta yia long Lae Botenikel Gaden.

Dispela em wanpela samting we planti femeli save amamas tru long kamap long em.

Ol femeli blong em bin karim bodi blong em long las wik Fonde go long ples blong Mista Warkia long Raluana long Is Niu Briten we ol i planim em.

Misis Warkia i gat tripela pikinini meri na tripela tumbuna man.

Long las wik Tridei bin gat wanpela arapela misa long Sen Meri's Katolik Sios long top taun long Lae long makim dai blong Let Peter Hall husat ol man nogut bin kilim dai long Jenyueri 3.

Peris pris Fr Sido Van Werf bin go pas long dispela misa we i lukim ol pren na wanwok blong Mista Hall long kampani Pleica Niugini kamap.

Fr Sido tok olsem Mista Hall ino bin lusim laip blong em long gutpela wei na askim bai olgeta man meri bai traim long wok bung wantaim long stapim kain pasin na kamapim gutpela sindaun insait long kantri. Ol karim bodi blong dispela man go bek long ples blong em long Ostrelia long ol lain blong em long planim.

Mista Hall husat bin wok olsem Depo Menesa blong Pogera Join Vensa bin lusim laip blong em bihain long ol man nogut i brukim haus blong em na kilim em dai.



• Ol femeli na pren bilong let Robyn Warkia i bung long las lotu long tok gutbai long em.

Ol meri Morobe holim bisnis woksop

ROSALYNE ALBANIEL i raitim

MOA long 20 meri insait long Morobe provins, ol mama, husat ino wok, long dispela wik i kamap long wanpela woksop long kisim skul long ronim liklik bisnis.

Dispela em i nambawan taim long dispela nupela yia long kain samting ikamap.

Presiden blong Mamose na tu blong Morobe blong wanpela grup ol kolim long "Women in Bisnis"-Gaby Iwala bin go pas long dispela woksop.

Long dispela taim em givim wanpela strong pela hap tok igo long ol dispela lain mama.

Mis Iwala itokim ol dispela lain olsem long dispela taim we planti lain wok long kisim taim ol mas traim long helpim ol yaim

na kirapim sampela kain liklik bisnis long helpim ol painim mani.

Em tok sapos ol wokim liklik bisnis blong ol i ken helpim ol yet, ol fameli blong ol na tu ekonomip blong kantri we nau i bagarap nogut tru.

Em tok olsem God i blesim ol meri wantaim kainkain save na tingting long sait blong kuk, somap na tu long mekim ol arapela samting na dispela i ken helpim ol long painim mani.

Em tok i gat kainkain bisnis ol meri inap long kirapim tasol ol ino wok long wokim.

"Yumi ino ken sindaun tasol na komplem long ol hat taim we yumi wok long bungim ol sindaun na wetim ol man blong yumi long givim yumi sampela toea long foitait pe blong ol.

"Yumi inap long helpim yumi

yet wantaim ol liklik bisnis na mi laikim bai yumi ol meri mas kirap na statim ol," Ms Iwala itok.

Dispela woksop we bin stat long Mande Jenyueri 13, bai pinis long Fraide.

Het tok we em bin karim em "Infomel Bisnis Em Bisnis blong yumi olget".

Bin gat tripela as tingting long ronim dispela woksop.

Nambawan long promotim infomel bisnis blong ol meri insait long Morobe na tu long Mamose rijin;

Namba tu em long apim save na tingting blong ol mama long Morobe na tu long Mamose rijen long save na pasin blong ronim gut ol liklik bisnis na long kirapim netwok; na

Namba tri em long strongim ol ikonimi blong ol fopela provins long Mamose rijin.

Mis Iwala tok olsem i gat plen i stap long karim dispela woksop igo long ol arapela provins blong Madang, Is Sipik na tu long Wes Sipik.

Mis Gedisa long wankain taim bin tok aut olsem ol mama husat i rejista wantaim grup blong em bai gat sans long kisim sampela mani long statim liklik bisnis blong em yet.

Em tok mani blong wokim dispela wok bai kam long Esien Developmen Beng (ADB) aninit long wanpela maikro fainens skim we ol bai kirapim long mun mas long dispela yia.

Em tok long dispela as save we ol dispela mama bai kisim long dispela woksop em impoten.

"Save ol kisim bai helpim ol long wokim kamap gut dispela skim na tu ol liklik bisnis blong ol," em tok.

Planti skul bai bungim hevi long mani sot

OL SKUL bai bungim hevi sapos nesenel gavman ino hariap na salim ol edyukesen sabsidi igo long ol provins hariap long tilim igo long ol wanwan skul.

Edukesen edvaisa blong Sandaun provins i tok aut long dispela long stat blong dispela wik.

Mista Lokowai i tok olsem planti ol skul long

provins blong em bin bungim hevi blong sot long mani aninit long "fri edyukesen polisi" blong olgeta gavman blong Se Mekere Morauta.

Em tok ol sem ibin gat hevi we mani no save kamap hariap long provins na planti skul i basim dua blong ol sot o nogat nap mani long

larim ol klas i go het.

Em tok em poret bai ol bungim wankain hevi sapos Waigani ino salim ol sabsidi igo hariap long ol provins.

Em tok skul bai stat long Jenyueri 27 na em i singaut strong long gavman long salim ol dispela mani bipo long dispela taim.

"Ol dispela mani mas

kamap hariap bai ol skul iken stat long taim stret. Sapos nogat bai igat hevi.

"Bai gat mani sapos ol papamama inap long peyim mak olsem 75 pesen blong ol skul fi we Provinsel Edukesen Bod i makim. Tasol dispela em olsem wanpela diman bikos mi no ting ol bai inap long peyim

dispela mak long olget pikinini blong ol," em tok.

Mista Lokowai tok em save olsem planti ol papamama igat moa long wanpela pikinini na planti blong ol bai kisim taim long traim long baim skul fi blong olgeta.

Em tok long dispela as em laikim bai gavman mas muw kwik taim.

Em tok PEC makim ol

skulfi pinis na i tok aut long dispela.

Mak i sanap olsem Elementri-K40, Pramer (gred one-six)-K50 and (gred seven-eight) K200, Hai Skul (gred seven-ten) K800 long ol boda na K400 long ol dej studen, Sekenderi (gred 11-12) K1,200 long ol boda and K1,000 long ol dej studen

Vokesenol Skul K800-boda na K400-dei studen, CODE-K70 na ol arapela praivet skul K40.

Mista Lokowai tok PEC sanap strong long disisen blong ol olsem ol papamama mas baim pastaim mak olsem 75 pesen bipo long ol pikinini blong ol stat skul.

Sauten Hailans lidas stilim moa mani long provins

WANPELA wok painimaut i soim olsem planti ol provinsal gavman opisas i wok long paulim planti mani bilong Sauten Hailans provins na givim ol giaman klem bilong kisim mani long provinsal baset.

Wanpela wok painimaut tim i go insait long edministresen bilong Sauten Hailans i painimaut long dispela hait na stil pasin we i kamap insait long provins.

Hap bilong dispela ripot we Wantok niuspapa i holim i stap i soim olsem ol loya, sinia publik sevens, politisens na edministretas i wok long kisim mani insait long provinsal baset long laik bilong ol yet na mekim planti hait na stil pasin long kisim ol dispela mani.

Sampela i wok long putim ol klem bilong ol i go insait long provinsal gavman long kisim

mani long sampela wok ol i tok ol i mekim bilong provinsal gavman tasol ol i no soim tru wanem kain wok ol i mekim na i gat planti askim long klem bilong ol. Planti moa klem i wok long stap yet wantaim provinsal gavman na wok painimaut i soim olsem planti lida insait long edministresen yet i wok long paulim moa mani bilong provinsal gavman na mekim planti stil pasin long

mani bilong ol pipel na provins.

Planti moa ripot i bin tokaut long dispela kain stil pasin i wok long kamap tasol nogat wanpela samting i kamap inap nau ol i painimaut olsem bikipela mani bilong provins i lus long stil tasol.

Sampela ol man husat i gat sampela bisnis i wok long putim ol klem bilong ol we i winim planti tausen

kina tasol ol i no givim tru sevis mak long mani ol i putim klem long en tasol ol i kisim dispela mani.

Inta-gavman Rilensens minista Sir Peter Barter i tokaut olsem ol politisens husat i wok long go pas long stilim mani bilong ol pipel na provins i mas kisim taim long han bilong lo na ol i noken go nating long kain stil na hait pasin ol i mekim long provins.

Em i tok amamas long ol lain husat i go pas long dispela wok painimaut na bikipela apil bilong em i go long ol pipel bilong provins long kisim nupela yia wantaim nupela na gutpela moa pasin we i ken kamapim gutpela sindaun long provins.

Sir Peter i bin tokaut strong long las yia olsem Sauten Hailans provins i gat planti ol stilman i lukautim provins husat i wok

long hait na pinisim ol mani bilong provins.

Planti i sapotim toktok bilong Sir Peter tasol sampela i tok dispela toktok em i strong tumas na i no olgeta lida i kain save stil na mekim kain pasin.

Nau em ripot i soim olsem ol lain husat gavman na ol pipel i putim bilip long ol i mas lukautim provins i wok long tanim na stilim ol mani bilong ol pipel na provins.

Bikipela pret long ol sot gan long Hailans komyuniti

AARON GUNBI i raitim

GAN i kamap wanpela bikipela samting long olgeta Hailans komyuniti na ol raskol man i wok long yusim gan long bagarapim laip bilong planti pipel insait long dispela rijen.

Ol pipel i baim gan na yusim gan long pait na bagarapim ol samting na laip bilong ol pipel tu i bagarap.

Wanpela ples i we i bin i gat amamas na gutpela sindaun nau i wok long kamap ples bilong pret bikos gan i wok long go insait long komyuniti na bikipela hevi i wok long kamap.

Dispela ples em Ambulua komyuniti insait long Westen Hailans provins na ol lida bilong dispela ples i wok long wari tru olsem dispela gutpela ples i no olsem bipo na ol manmeri i wok long pret tru long pawa bilong gan.

Wanpela viles lida husat i no laik tokaut long nem bilong em i tok bipo ol i save yusim viles kot na ol pipel i save harim toktok bilong ol lidas long ples tasol nau dispela pasin i no stap moa long ples.

Lida ya i tok ol viles kot sistem i wok long lus nating na pawa bilong ol viles lida i kamap liklik tru bikos gan i kisim ples bilong

gutpela pasin.

Em i tok sampela sinia publik sevens we ol pipel i save putim bilip long ol tu i soim pret pasin long ol pipel taim ol i wok long yusim gan long toktok strong long ol pipel.

Lida i tok wanpela publik seven insait long komyuniti i wok long makim liklik pistol bilong em long pes bilong ol pipel na fosim ol long mekim samting long laik bilong em yet na ol pipel i no wanbel long dispela.

Tasol em i hat long ol pipel i tokaut long raits bilong ol bikos ol tu i pret tumas long kain pasin bilong ol man husat i gat gan insait long komyuniti.

Lida i tok yet olsem i no long insait long komyuniti tasol insait long wanpela traib o haus lain em husat i strong long i gat moa gan ol i save pretim ol narapela lain pipel na bikipela pret i save kamap.

Taim ol lain husat i nogat moa gan ol i save bungim mani na kainkain samting long ol yet tu i mas baim gan na dispela i kamapim moa hevi long komyuniti.

Moa lain i wok long baim gan na bipo taim bilong pait wantaim tamiok na banara em i pinis nau bikos gan i kisim ples bilong olgeta dispela samting.

Nogat ileksen aweanes long Kagua Erave



Moa aweanes long Kagua Erave... • I gat wari olsem olgeta ol distrik i no redi long saplimentri ileksen long Sauten Hailans. Pasin bilong hait na stilim vot long Nesenel ileksen i bin bagarapim ileksen long provins. Fail foto.

SAUTEN Hailans provinsal plis komanda Nema Mondia i wari liklik olsem Kagua Erave distrik bilong provins i no redi yet long nupela saplimentri ileksen i ken go het yet long dispela yia.

Mista Mondia i tok olgeta hap long ol ilektoret em ol i redi long holim ileksen tasol em i laikim bai Kagua Erave i mas i gat han bilong gavman pastaim

long ol i ken holim ileksen.

Em i tok nau long dispela taim i nogat distrik edministreta o wanpela gavman opisa i stap long helpim long mekim redi ol pipel long vot long nupela ileksen. Long ol narapela distrik em ileksen aweanes i wok long kamap na ol pipel i kisim planti helpim tru long dispela ol

aweanes tasol wankain samting i mas kamap long Kagua Erave.

Mista Mondia i tok em i no kisim wanpela ripot olsem ileksen aweanes i kamap pinis long Kagua-Erave na bihain long wanpela mun bai ol i mas holim nupela nesenel ileksen tasol ol pipel bilong Kagua-Erave i no save long wanpela samting yet.

Em i tok ol pipel

bilong Tari i mekim sampela samting pinis long holim ileksen aweanes na ol i redi long dispela bikipela samting we bai kamap tasol dispela kain samting i mas kamap tu long Kagua-Erave.

Mista Mondia i tok ol pipel bilong Tari i no wetim gavman na ol i kisim sapot tasol long distrik edministreta na plis stesen komanda

long helpim ol wantaim aweanes na dispela kain pasin em i gutpela.

Em i tok amamas long distrik edministreta Philip Moiya na plis stesen komanda Simon Nigi long gutpela wok tupela i mekim long kamapim aweanes long ileksen maski gavman i no putim bikipela han i go insait long dispela wok.

Long narapela stori Mista Nigi i tokaut pinis long wanpela saspek we ol i bin holimpasim. Dispela saspek em plis i holim i stap bikos ol i tok em i bin stap baksait long kukim wanpela gavman opis long Tari.

Em i tok man ya i bin wok olsem sekyuriti gad taim em i bin kukim Tari gavman opis na ol i salim em i go pinis long Baisu haus kalabus long Hagen long wetim kot bilong em.

Mista Mondia i tok amamas long ol pipel bilong provins long gutpela pasin ol i mekim long i no kamapim bikipela trabel long niu yia na krimas we planti taim bilong amamas i kamap.

Em i tok em i no save lukim kain pasin olsem i kamap we taim bilong dispela kain holidi i save stap isi tru na em i tok tenkyu long ol pipel i bihainim gutpela lo na oda long dispela taim.

Goroka pipel lainim vanilla faming

WANPELA nupela kampani i stat pinis long promotim na skulim ol manmeri insait long Isten Hailans provins long groaim vanilla long salim na kisim mani.

Maski olsem Goroka em i ples bilong kopi stret tasol dispela kampani i taim long promotim dispela nupela diwai we ol manmeri i ken mekim mani.

Nem bilong dispela nupela kampani em Hailans Vanilla na het opis bilong ol i stpa long Goroka taun klostu tasol long Raun Raun Tieta.

Hailans Vanilla em long mun bisnis bilong em long mun

Oktoba 2002.

Provinsal kodineta bilong Hailans Vanilla projek, Mark Gozapau i tok olsem bikipela tingting bilong dispela kampani em long skulim na soim ol manmeri long provins long wanem kain ol gutpela rot long groaim vanilla na mekim mani.

Kampani i wok long lainim ol manmeri long wanpela kain vanilla we i save groa gut long hailans na dispela em Planifolia. Insait long nambawan trening em 14-pela lain i bin kamap.

Mista Gozapau i tok ol i save long kain mani we vanilla i save kisim mani

bringim long ol pipel bilong nambis na dispela kain rot bilong mekim mani em ol i laik soim ol hailans pipel wantaim.

Hailans em strongpela ples tru bilong kopi tasol ol i laik traime strongim wok bilong vanilla tu bai ol pipel i ken i gat planti we bilong mekim mani.

Mista Gozapau i tok tu olsem ol i no laik ol manmeri i lus tingting long groaim kopi tasol ol i laikim ol i mas wok hat long kamapim gutpela sindaun taim tupela kes krop o kaikai bilong salim na kisim mani

Em i tok ol i lainim ol pipel long gutpela taim bilong draim vanilla na tu long putim long hait ples long taim bilong ren na planti moa gutpela we bilong lukautim dispela kaikai.

Mista Gozapau i tok ol i bin holim tripela trening woksop long provins long bungim ol famas long lainim we bilong groaim vanilla long provins.

Mema bilong Henganofi Dokta Banare Bunn i bin helpim long sapotim namba tu woksop we ol i bin holim long ilektoret bilong em long Henganofi yet. Long wok painimaut bilong

Hailans Vanilla kampani ol i lukim olsem vanilla em inap tru long kamap long hailans rijen na i no long nambis ples tasol.

Mista Gozapau i tok mani we i kam long vanilla i gutpela tru. Mak long wanpela kilo vanilla em ol lain i wok long kisim K200 i go K300 na dispela i gutpela.

Isten Hailans gavana Mal Kela-Smith i go pas long sapotim dispela wok insait long provins taim em i givim sapot long pes woksop we ol i bin holim long Goroka yet.

Namba tri woksop i wok long go het yet nau long dispela taim.

Kimbe plis askim long helpim wantaim kalabus

VERONICA HATUTASI i raitim

PLIS long Kimbe i laikim helpim i kam long Plis hetkota na Provinsel na nesanel gavman bikos ol plis sel i pulap. Na tu ol i sot long kaikai na mani bilong baim kaikai na lukautim ol kalabus lain.

Provinsel Plis Komanda Tom Uapipi

tok ol i laikim helpim bilong karimaut ol wok mentenens long Kimbe plis sel. we nau i pulap tru na i liklik tumas bilong lukautim planti kalabus lain.

Sel i wok long bagarap tu na i no gutpela long sait bilong haijin long planti lain i stap long liklik haus olsem.

Em i tok stat yet long mun Mas las yia taim Lakiamata haus kalabus i pas, Kimbe plis

wok long lukautim ol kalabus lain long Kimbe plis sel. Mak long ol dispela ol kalabus lain i stap nau long plis sel em i go antap long 60.

Em i tok dispela i givim bikpela wok na hevi long ol plis long Kimbe long sait bilong lukautim na tu, givim kaikai long ol.

Em i tok ol i no inap long salim ol kalabus lain i go long Keravat haus klabus long Is Nu

Briten bikos em i pulap.

Em i tok Lakiamata haus kalabus i bin pas long las yia Mas bikos planti samting i bagarap na ol i mas karimaut ol wok mentenens long en.

Mista Uapipi i tok CIS i karimaut ol wok we i go het na em i ting bai Lakiamata bai op bek gen long sampela taim long dispela yia.

Kimbe plis sel sot long kaikai

VERONICA HATUTASI i raitim

OL KALABUS long Kombe i sot long kaikai na long wankain taim tu, ol i gat samting olsem K3,000 na moa dinau long ol bisnis haus long ol kaikai samting.

Ripot i kam long Kimbe i tok Kimbe Plis sel i gat moa long 60 klabus lain na plis i nogat inap kaikai o mani long lukautim dispela mak long ol kalabus man long en.

Ripot i tok ol i gat dinau long ol holsel na stoa i save salim ol kaikai

long en we i abrusim K3,000.

Ripot i tok ol i wok long kisim helpim wantaim kaikai long sampela ol bisnis haus. Taso ol i wok long nok long ol dua bilong ol long askim na kisim helpim.

Em i tok las kaikai bilong ol em ol i kisim long las wiken long Spirit of Wes. Dispela em long wanpela beil rais na sampela lus tinpis.

Taim ripot i autim tok tenkyu bilong Kimbe plis long helpim bilong ol bisnis haus, em i tok i moabeta sapos ol i ken kisim helpim long ol lain yet bilong ol yet plis hetkota, ol CIS na gavman.

Kot kliaim win bilong Jumogot


NESENEL Kot long las wik i bin kliarim win bilong Gavana bilong Manus Jacob Jumogot insait long 2002 Nesanel Ilekseen.

Insait long 70 pes ripot i gat jasmen long en, Jastis Timothy Hinchcliffe i bin tok i nogat inap evidens long sutim tok long Mista Jumogot olsem em bin wokim braiberi o baim ol manmeri long votim em. we foma Manus gavana Stephen Pokawin i bin karim long kot long en.

Mista Pokawin i bin kisim Mista Jumogot long kot long siksipela tok sut long braiberi na peim ol man wantaim mani em i kisim long Geming Bot.

Kot i bin rausim olgeta siksipela sas.

Sevings helpim Nu Ailan papamama wantaim skul fi



Foma Nu Ailan Primia Pedi Anis wantaim Ezekiel Waisale long wanpela bung bipo long 2002 ilekseen. Tupela i bin resis egensim narapela long 2002 nesanel ilekseen.

OL PAPAMAMA long Nu Ailan provins i memba long Nu Ailan Sevings na Lons Sosaiti (NSL) i no inap long wari tumas bikos sevings bilong ol bai helpim ol.

Ol sosaiti memba husat i bin sevap long skul fi na krismas las yia i bin sevim moa long K7,000. Mak long ol memba i bin sevim mani long dispela rot em long 39 pipel.

Krismas sevings bilong ol insait long las 12-pela mun i bin kamap moa long K356,000. Long yia 2001, 42 memba i bin sevim klostu K37,000

olsem skul fi sevings long ol pikinini bilong ol.

Long las yia 2002, 54 memba i bin benefit long manimak inap long K10,157 we ol bin sevim long Krismas akaun bilong ol.

Ol bin lonsim ol dispela sevings skim long yia 2000 wantaim 38 memba taso.

Bikpela tok tenkyu na luksave i go long ol bot memba, moa yet long foma Nu Ailan primia Pedi Anis husat i givim gutpela sapot na stia wok long sosaiti na gutpela kaikai bilong em ol i lukim long nau.

Nu Ailan 2003 baset givim bikpela sapot long agrikalsa

NU AILAN i givim bikpela tingting long agrikalsa long 2003 baset bilong en.

Olsem n em i katim bikpela manimak long helpim sapotim ol wok bilong agrikalsa long en.

Deputi Gavana na

Presiden bilong Tikana Lokol Level Gavman Gerson Rabana i tok ol bin katim bikpela hap mani gren long helpim ol provinsel smolholda welpam na vanilla projek.

Em bin tomtu olsem Lavongai Integretet projek, Agrikalsa

Trenspot Progrem na Agrikalsa sapot gren na saplai long Los Banos em ol i katim manimak inap long K810,000. Dispela mani bai helpim tru ol fama na planta long rurel sekta.

Mista Rabana i tok wokim na stretim ol rot

em narapela eria we 2003 baset i aktim bikpela hap mani long en wantaim K4.5 milien mak.

Narapela eria tu we provinsel gavman i givim bikpela tingting long en em sistem bilong storim wara long en.

Hevi bilong bris i stret pinis

WANPELA hevi i bin kamap na stapim wok long Buka wof o bris long go het em ol i stretim pinis na wok bai go het gen.

Ol ripot i kam long Buka i tok ol lida na sief bilong leta Viles i bin bung long las

wiken na stretim dispela hevi.

Ol wok konstraksen we Cutain Brothers kampani i bin wok long karimaut em ol papagraun i bin stapim insait long wanpela wik bikos i bin gat hevi husat i trupela papagraun long

hap we ol i mekim wiok long en.

Not Bogenvil memba James Togel i bin tokaut long dispela hevi i stret nau na em i tok amamas long ol leta pipel bilong stretim dispela hevi long gutpela rot.

Namatanai ilketoret kisim helpim long Saina

NAMATANAI ilketoret insait long Nu Ailan provins bai kisim helpim long wanpela skul projek i kam long Saina.

Dispela i bihainim ol toktok na wok we memba bilong ol Byron Chan i wokim na em i kisim K50,000 helpim mani long gavman bilong Pipels Ripablik bilong Saina.

Dispela mani bai i go long bildim dabel klasrum long long wanpela skul long wes kos Namatanai.

Long wanpela bung las mun, Mista Chan i bin autim wari bilong em olsem em i no wok long kisim helpim mani long karimaut ol praioriti o bikpela projek insait long ilketoret bilong em.


Em i tok long dispela as na em bin lukluk ausait long kisim helpim mani long en.

Mista Chan i tok em bai rivaivim o

kamapim na strongim ol wok long Yut na Kalsa long inapim ilekseen kempem promis bilong em. Olsem na em i aktim K20,000 long wan wan long dispela tupela eria. N adispela i ken helpim tu ol grup na komyuniti long kamapim bek Namatanai Yut So na Namatanai Distrik Kalsa So.

Mista Chan i tok promis tu long sapotim Distrik Wimens Kaunsil na na Namatanai Sios kaunsil wantaim K20,000 i go long wan wan long ol. "Nau i gat sans long ol yut long yusim dispela na kamapim gut laip bilong ol," Mista Chan i bin tok.

Stat long wers kos yet, Mista Chan i tok em bai kariamut ol wok mentenens long ol rot na ol bri na wokim ol nupela rot i joinim is kos na gutpela wok developmen i ken kamap.



• Memba bilong Namatanai Byron Chan i kisim sek mani long Ambaseda bilong Saina i kam long PNG Zhao Zhengyu bilong helpim go hetim ol projek iong provins.

Tresera i givim tok orait long Galf saplai bil

TRESERI Minista Bart Philemon i oraitim K5 milien saplai baset bilong Galf provins long las wik Trinde.

Galf Gavana Chris Haiveta, Ekting Edministreta, Miai Larelake, Ekting Deputi Edministreta Christopher Haro na Ekting Tresera Rola Miere i putimaut dispela baset we i moa long K5,588,140 i go long han bilong Mista Philemon.

Mista Haiveta tok em i amamas long wanem Mista Philemon na dipatmen bilong em i givim sapot long dispela mani plen bilong gavman bilong em long daunim deb o dinau mani we i kos K3 milien.

"Bikpela samting long

gavman bilong mi i wankain olsem bilong nesenel gavman we ol i givim bikpela luksave long helt, edukesen, rural infrastraksa mentenans, developmen na lo na oda," Mista Haiveta i tok.

Mista Haiveta i bin tok tenkyu long nesenel gavman long nupela haus sik we ol bai sanapim long neks yia na tu long ol stadi we ol i wok long karim aut long mekim wanpela rot long Malalaua igo long Kaintiba na igo moa yet long Aseki (trens-ailan rot).

Em tok konstraksen wok bai stat long tupela bris long Silaura na Uamai insait long Kerema na narapela bris gen long Keuru insait long

Kikori.

Mista Haiveta i tok gavman bai go het long sapotim siling (putim kolta) bilong Kerema na Malalaua rot, developmen bilong Kikori ples balus, na wara saplai insait long Kerema taun long dispela yia.

Mista Philemon i bin oraitim dispela saplai bil tasol em wari liklik long debt level (mak bilong dinau) insait long provins tasol em i ting olsem Gavana Haiveta bai daunim mani we gavman bilong em bin dinau long en.

Em tok dipatmen bilong em bai wok hat long stopim dispela pasin we ol man i save paulim ol sistem.

Raba bisnis i ken groa long PNG na Indonesia boda

IAN KAKARERE
i raitim

SAMPELA ol pablik sevens na bisnisman long Kiunga bin kisim askim bilong ol Indonesia wanwok long go raun lukim wanpela raba so long Mindaipitana sampela wik i go pinis.

Dispela 2 de so i soim olsem ol groas long ol boda eria bilong Wes Papua i gat planti ol raba long saplain Not Flai raba kampani fektori long Kiunga insait long Westen provins.

Distrik opisa i go pas long Mindaipitana, Margaretha Kakare na lokel raba ekstensen opisa, Linus Anden i go pas long kamapim dispela so.

Dairekta bilong Not Flai Raba Kampani (NFRK), Warren Dutton tok ol raba groa long Wes Papua i gat bikpela eria we ol i wok long groim raba tasol ol painim hat long salim ol long wanem ol i nogat gutpela transpot sevis long eria bilong ol.

Mista Dutton i tok kampani bilong em ken baim planti wet kap lam raba long West Papua groas sapos i gat isi rot bilong transpot long Kiunga na Mindaipitana.

Em tok rijinel edministreta long Merauke i bin odarim ol wokman long stretim rot long mun Desemba las yia long joinim tupela taun long Dome viles we i stap long PNG na Indonesia boda.

Mista Dutton i tok wanpela grup long Wes Papua bai kam bek long Kiunga long painim aut ol nupela developmen we i kamap bihain long dispela namba wan visit o wokabaut.

Aninit long PNG na Indonesia boda agri-men tupela kantri ken baim na salim raba long boda bikos raba em wanpela projek bilong ol asples.

Mista Dutton tok sapos em ken baim planti wet kap lam raba long ol Wes Papua groas dispela bai givim bikpela sapot long raba indastri long tupela sait bilong boda.

Em i tok dispela bai helpim Kiunga raba fektori long ron gut tru na ol groa insait long Kiunga na Mindaipitana bai kisim gut mani.



Stretim paip wara... • Paip wara i bruk long Boroko eria na i givim bikpela hevi tru long ol manmeri i stap long hap. Wok man bilong Eda Ranu i wok hat long stretim na pulim wara i go bek.

Sik taifod kamapim hevi long Westen provins

IAN KAKARERE
i raitim

SIK TAI FOD i wok long kamap bikpela hevi insait long Kiunga long Westen provins na ol pipel long arapela ples i wok long kisim dispela sik tu.

Ol helt opisal long Westen provins i wari long bikos dispela sik i wok long kamapim bikpela hevi.

Dispela taifod sik i bin stat long mun Novemba las yia tasol long dispela taim i kam inap nau, ol manmeri husat i wok long kam long haus sik em ol lain bilong taun tasol.

Not Flai distrik helt mensesa, Sagi Usa i tok nau Kiunga haus sik i wok long kisim ol sik manmeri wantaim taifoid long ol ples klostu long taun.

Mista Usa i tok dispela hevi i kamap bikpela long wanem ol wok manmeri bilong haus sik tu i no lukim pei bilong ol long 9-pela fotnait nau.

Olsem na haus sik i painim hat long lukautim ol sik manmeri husat i gat taifoid.

Em tok sampela man husat i kisim taifoid em ol i gat bikpela nem insait long Kiunga.

Mema bilong Not Flai, Martin Tabi tu i sik nogut tru.

Taifoid na malaria i gat wankain sain we ol skin bai hot nogut tru na ol sik manmeri bai traat.

Ol pipel bai kisim wanpela marasin ol i kolim enti malarial drag tasol ol bai sik moa.

Ol manmeri i gat sik taifoid mas kisim marasin na tu dring planti wara long wanem sapos ol ino dring bai ol gat nogat wara long bodi bilong ol.

Mista Usa i tok ol helt dipatmen long Kiunga i no save wanem rot tru na planti man meri wok long kisim sik taifoid tasol ol pipel mas lukautim ol yet gut sapos ol les long kisim dispela sik.

UFO long Westen provins i mas balus bilong ami

IAN KAKARERE
i raitim

SAMPELA pipel long Westen provins i bin tokaut long nius olsem ol i lukim sampela samting i save flai long nait na ol i save lukim lait bilong ol.

Ol i ting olsem dispela ol samting flai em ol samting we ol manmeri i no save long ol tasol ol i save flai. Long toktok bilong waitman ol i save kolim kain samting UFO. (UFO i olsem sampela kain masalai o ol pipel bilong narapela hap graun olgeta wantaim ol mesin bilong ol.)

Tasol dispela ol lait we ol pipel ya save lukim long nait em i no bilong UFO tasol em lait bilong ol ami

balus long narapela kantri we ol i save mekim trening long nait.

Long las wik Ekting Asisten Pliis Komisina bilong Sauten Koman, John Maru i bin tok planti pipel long Westen provins bin tok ol i lukim planti ol UFO.

Wanpela opisa long Embasi ov Yunaited Steits ov Amerika, husat i les long givim nem bilong em, i tok ol ami balus bilong Amerika i save flai long nait na sampela taim ol i save kam flai antap long Papua Niugini.

Mausman ya i tok ol balus i save stop long Pot Mosbi long kisim fiul, lusim saplai bilong opis bilong Amerika hia long PNG na tu ol balus save karim bodi bilong ol sevis man bilong Amerika husat bin dai long wol woa.

Em tok long 1970 i kam traipela woa balus bilong Amerika ol i save kolim B52 bomas i save stap long Guam tasol dispela ol balus save flai antap long PNG long go long Australia.

Tasol nau ol balus bilong Amerika em ol liklik balus ol i save kolim F-18's na dispela ol balus i save stop long Pot Mosbi long kisim fiul.

Mausman ya i tok ol balus i save kisim diplomatik kliarens o tok orait long Dipatmen ov Foren Afes bipo ol i ken flai insait long PNG o stop long kisim fiul long Pot Mosbi.

Wanpela Yunaited Steits ea fos balus bin kam stop long Jacksons ples balus long Fonde, Jenuari 9 na dispela balus bin kisim kliarens o tok orait long stop na kisim fiul. Wanpela difens mausman bilong

Australia Hai Komisen insait long Pot Mosbi tok balus bilong Australian difens fos i save flai antap long PNG tu.

Em tok wankain olsem Amerika, ol Australia tu save kisim kliarens o tok orait long dipatmen bilong Foren Afes.

Dispela mausman bilong Australia i tok sapos ol pipel long Westen provins i lukim UFO long nait o lait bilong ol samting i save flai ol i mas raitim taim ol bin lukim UFO na wanem hap dispela samting i ron i go long en.

Bihain ol i mekim dispela ol i ken sekim wantaim dipatmen bilong Foren Afes sapos wanpela militeri balus bin kam long dispela taim na long wanem hap rot stret balus ya bin kam na igo olsem wanem.

Malolo taim em nupela senis WANTOK i kamapim long yu ken sindaun gut long haus long wiken na ritim. Bai i gat sampela spesel ripot yu inap ritim na kisim save long en long Bisnis, Politik, Laipstori, musik na sios ripot.

Ol Bomana kalabus i lotu wantaim Erima Peris

pes 10

Pasin pamuk i kamap bisnis


pes 11

Skelim PNG Politik

pes 12

Sawa Gels na Wet T Siot Nupela amamas bilong disco haus

pes 18




Hailans kofi groa long nambis

- pes 17

BNBM

Available from : **BNBM HARDWARE**

- Port Moresby: Ph: 325 1135 Fax: 325 7393
- Lae: Ph: 472 6966 Fax: 472 6968
- Kokopo: Ph: 982 9580 Fax: 982 9581



BUNTING BUTT HINGE STEEL ZP FP
50mm K1.60
75mm K 2.40
100mm K4.38



DRAWER SLIDES PC WHITE
350mm K4.82
450mm K6.16
500mm K6.60




DOUBLE CYLINDER DEADLOCK
K35.20

VAT EXCLUSIVE



PADBOLT ZP 100 x 10mm
K2.80



TOKTOK NATING wantaim Fr Paul Liwun SVD



Mi bilip olsem taim yumi statim wanpela nupela wok o kamap long wanpela nupela yia, yumi bai ekspektim gutpela taim bai kamap. Nau yumi kamap pinis long nupela yia, 2003. Planti i hop dispela yia bai bringim strongpela LAIK PASIN (LOVE) na GUTPELA TAIM (PEACE) long yumi manmeri bilong PNG.

Long opim nupela yia 3003, mipela long Erima Peris i bin selebretim wanpela santu Misa. Na insait long skul bilong lotu, mi bin yusim dispela stori hia long helpim manmeri long kamapim Laik pasin na Gutpela taim long famili bilong ol wanwan.

I gat wanpela GURU (tisa long ol Buddist) i bin stap. Olgeta manmeri i save gut long en bikos em i wanpela wais man stret. I gat planti manmeri, lapun, yangpela, ol pikinini i save kam long en na harim skul bilong em. Bikos skul bilong em i bin helpim planti manmeri long stretim wari bilong ol. I gat planti manmeri i pait na ol i no inap long stretim pait na kros bilong ol i bin kam na redi long harim tok bilong guru bai ol i ken kamapim bek wanbel gen wantaim ol birua bilong ol.

Wanpela visita i tok: "Huh... mi bai yusim olgeta mani bilong mi long kam na harim tok bilong GURU, bikos olgeta tok bilong em bai stretim wari bilong mi."

Guru i sindaun isi tasol na lukluk long olgeta manmeri i bung i stap long wetim em i tok. Na dispela tok bilong em ol bai yusim olsem marasin long stretim ol wari bilong ol.

I longpela taim i go pinis na GURU i opim maus na i tok: "Em isi tasol long kamapim na spredim LAIK PASIN na GUTPELA TAIM. Yu noken spendim wanpela toea mani bilong yu long baim em." Na GURU i tok moa: Hia em i we bilong kamapim LAIK PASIN na GUTPELA TAIM. Sapos yu bungim wanpela man o meri long wanpela hap na stap wantaim em - mekim gut long ol olsem dispela sans em i las sans bilong yu long stap wantaim em."

"Em tasol?" askim wanpela man namle long ol planti lain i stap." Yes, em tasol," GURU i bekim. "Mekim gut long olgeta manmeri long olgeta taim- olsem las sans bilong yu long mekim gut long em na olsem em i las sans bilong yu tu long bungim em na stap wantaim em, bikos bai yu no inap bungim em gen."

(* *) : Dispela tok bilong GURU em i stret. Sapos long dispela yia 3003, olgeta manmeri i tingim long mekim gutpela pasin tasol long wanpela narapela olsem las sans long bungim ol, mi bilip olsem yia 2003 bai i nogat trabel i kamap. Yia 2003 bai gutpela stret.

(* *) : Husat bai bihainim dispela etvais bilong GURU? YU na MI tasol! Bikos YU na MI laik bai yia 2003 i pulap long LAIK PASIN NA GUTPELA TAIM.

Erima Peris serim Autris program wantaim Bomana kalabus

VERONICA HATUTASI i raitim

ANINIT long Peris Ektiviti program bilong em, Sen Peter Chanel Erima Katolik Peris insait long Nesenel Kapitel Distrik i bin kisim wanpela kalabus grup long pre na stap insait long sampela aktiviti wantaim ol.

Na tu long givim mesej i go long ol yangpela pipel bilong abrusim ol trabel na kriminel pasin.

Narapela em wanpela grup bilong peris i bin go na visitim, givim kaikai na stap wantaim ol disebel lain long Chesaisa Hom long Hohola, Por Mosbi.

Dispela tupela samting i bin kamap olsem hap bilong Krismas aktiviti bilong peris long Sarere na Sande, tupela wik i go pinis.

Fitinpela kalabus man we tupela em ol i stap long laip kalabus i bilong Minimum Sekyuriti sel long Bomana haus kalabus ausait tasol long Mosbi siti i bin kam selebretim Krismas lotu long Erima Peris na ol i bin amamas stret long komyuniti i luksave long ol na i no pret long sea, miks na tok-tok stori long laip bilong ol long kalabus, kaikai wantaim ol. Na tu long putim kamap sampela aktiviti long mekim dispela de i gutpela.

Ol dispela kalabus lain em ol i memba bilong Angliken na Katolik Sios.

Pater Paul Liwun em Peris Pris bilong Erima i tok Bomana kalabus i gat sios Autris Program na ol arapela sios i save

long dispela na ol i save gat felosip wantaim ol wanlotu prisina long ol taim ol i makim long en.

Tasol i luk olsem Katolik na Angliken Sios i no klia tumas na ol i no save wokim felosip, lotu na bung long ol wan wan pewris bilong ol.

Em i tok Erima Peris i bin kisim wanpela pas i kam long Autris Ministri bilong Bomana Minimum Sekyuriti sel bilong haus kalabus sapos peris i ken lotu na sea wantaim ol kalabus lain. Olsem na peris i bin makim Desemba 29 long selebretim Misa lotu, sea na givim kaikai na ol arapela liklik samting ol kalabus i nidim stret olsem sop na ol arapela moa.

Pater Paul i tok bihain long Misa lotu, ol dispela prisina na Sen Peter's Erima komyuniti i bin bung long Komyuniti Hal long singsing, prisanim ol aitem, wokim testimoni o toktok long laip long kalabus na sea wantaim ol.

Ol perisina i bin bungim ol sop na ol arapela samting wantaim tu ol kaikai we ol bin redim long ol kalabus lain long laikaim long dispela bung bilong ol.

"Ol prisina i bin amamas tru long miks wantaim ol perisina husat i bin akseptim ol na mekim ol i pilim fri na gutpela long stap wantaim ol," Pater Paul i tok.

Em i tok Peris bai putim dispela prisanim long program bilong em long dispela yia.

Long olgeta yia, Peris i save tingim ol siklain na long taim bilong Krismas, ol i

MALOLO TAIM

save kisim ol kaikai, klos na ol arapela samting na go visitim ol, lotu, sea wantaim ol.

Planti peris lain tru i bin stap long bung wantaim ol kalabus lain.

Ol kalabus lain i bin sea long laip bilong ol na tok strong long ol yangpela man bilong abrusim ol bikhet pasin, pasin bilong wokim trabel na kriminel bikos ol i tok stap long kalabus i hat na i no gutpela.

Tupela laip kalabus man i bilong Wabag long Enga provins na Milen Be.

Ol kalabus lain ya i miks grup bilong Haliens, Mommase, sauten na Ailans rijen.

Pater Paul i tok dispela em namba wan taim long Katolik Sios long Mosbi bilong kisim wanpela kalabus grup long lotu na sea wantaim ol insait long peris bilong ol.

Narapela samting em ol perisina long namba wan taim tu i bin wokim narakain em long raun i go long givim kaikai samting na stap wantaim ol disebel lain long Chesaisa Hom long Desemba 28. Dispela em i kam aninit long Sariti program bilong Peris.

Ol mama, yut, Lijen ov Mary na ol nes long peris wantaim tu ol arapela peris lain i bin go long Chesaisa Hom na helpim ol lain disebel long givim kaikai, toktok wantaim ol, raun pulim ol long wilsia na karimaut ol aktiviti long dispela de.

Pater Paul i tok planti peris lain i bin go wantaim long lukim ol disebel lain na program long dispela de i bin kamap gut.

Em i tok olsem program bilong ol kalabus lain, raun long go lukim ol Chesaisa Hom disebel lain em i namba wan taim na peris bai lukluk long skruim dispela tupela insait long ol aktiviti program bilong em.

Ol Luteran pasto kisim salens long noken tubel

PAULUS TALI i raitim

AMRON Evanjelis Luteran trening skul i bin pinisim tripela yia kos bilong ol.

Samting olsem 1,500 Kristen manmeri i bin bung long witnessim spesel de bilong ol lain i bin greduet long dispela taim.

Het Bisop bilong Luteran Sios long PNG, Dokta Wesley Kigasung na pasto seketeri bilong trening skul em Pater Gerry Migori i bin salensim ol nupela greduet long go na autim Tok bilong Bikipela long olgeta lain, wantaim tu ol haiden lain.

Em bin tokim ol olsem singaut bilong God long mipela wan wan em long senisim laip bilong mipela na go klostu long Bikipela.

Dokta Kigasung i bin skruim tok bilong Pater Gerry na tok bilong go klostu long God, ol manmeri i mas senisim laip bilong ol.

Long wankain taim tu, wanpela Luteran pasto i bin tok ol wokman bilong ol sios olsem Luteran, Katolik, Yunaitet, Angliken na ol arapela sios i no isipela wok.

"Taim yu mekim wok bilong sios, yu mas noken tubel. Yu mas bilip strong na mekim tru tru wok bilong yu," Pater Itiak Kabaku bilong Luteran Sios long Madang i bin tok.

Em bin tok em i lukim planti sios hetman i save tingting tubel long wok. Em i tok long Buk Baibel John sapta 15 ves 15-16, em i tokiim mipela olsem ol sios wokman bilong God i laik karimaut wok i mas tingting long mekim gut na strongim wok.

Em bin tok long sait bilong Luteran Sios, ol wokman i mas lukluk pastaim long long go het long ol wok i stap insait long sios kalenda bilong ol.

Narapela poin em bin toktok long em em taim ol sios woklain i autim Tok bilong em, ol i mas soim Lait long ol narapela.



Het Bisop bilong ELCPNG Reveren Dokta Wesley Kigasung. Fail foto.

Ambullu pipel gat strongpela bilip long pater

AARON GUNBI i raitim

NOGAT Santa Klaus o Pater Krismas i no wanpela hevi. Nogat Krismas lait i no wanpela hevi. Nogat Krismas spesel i no wanpela hevi. Tasol nogat pater long selebretim Misa lotu long Krismas em i kmapim bikipela wari long ol pipel.

Ol pipel bilong Ambullua i save stap long longwe hap long Jimi Veli not long Hagen. Ol bin wari tru na tingting plan ti olsem sapos bai gat pater na

husat tru bai selebretim Krismas lotu wantaim ol.

Peris Pater Fada Clement Papa i bin sik na i wok long stap long Hagen Haus sik.

"Mipela i bin wari bikos gutpela peris pris bilong mipela i bin sik na mipela i tingting planti olsem bai mipela i no inap gat pater na Krismas lotu," Siaman bilobg Peris bot, Peter Biru i bin tok long taim bilong Misa lotu.

Taim ol perisina i harim olsem Pater Boniface Umba bilong Wurup. Peris bai go wokim Krismas Misa lotu wantaim Paul Gunbi em Pastorel

Seminari bilong em, ol Ambullua pipel i bin amamas nogut tru na ol bin redi gut long welkamim ol.

"Long welkamim nupela pren insait long komyuniti long pasin bilong ol Jimi pipel yet, mipela save wokim singsing tumbuna, danis, givim kaikai na holim pasim ol olsem mak long soim amamas," Mista Biru i bin tok.

Pater na seminari i bin amamas na krai wantaim long gutpela welkam komyuniti i putim long ol komyuniti i bruk long tupela singsing grup na ol i palapim kundu long welka-

mim ol.

"Bilip bilong ol pipel i strongpela hia, "Pater Boniface i bin tok. "Yupela i gat strongpela bilip na pasin bilong yupela i mas go wantaim dispela bilip. Lukautim gut ol sevis ol i givim long yupela. Opim bek skul we i bin pas long taim ol hevi bilong 2002 nesenele i lekken bin kamap las June," Pater Boniface i bin tok. Em i toktok long Ambullua Komyuniti skul we i bin pas long las yia yet bikos long nesenele i lekken hevi na komyuniti i bagarapim ol klasrum taim ol tisa i go insait long politik.

THE BIBLE SOCIETY PAPA NEW GUINEA PREA BILONG LITAPAM NEM BILONG GOD God em i lait bilong mi na em i helpim bilong mi. Olsem na mi no ken guria long wanpela man. Bikipela tasol i save lukautim mi, olsem na mi no ken pret long wanpela samting. Mi bin askim God long wanpela samting tasol, na mi laikim olsem. Mi askim em bai mi ken i stap long haus bilong em inap olgeta de mi gat laip. Mi laik hamamas long em i gutpela tumas long mi. Na mi laik askim em long soim mi gutpela rot. Taim samting nogut i kamap long mi bai em i haitim mi long haus bilong em. Bai em i pasim dua na haitim mi gutpela tru bai em i putim mi antap long wanpela bikipela ston tru na mi stap gut. Buk Song 27: 1, 4, 5

Prostitusien o pamuk pasin-em i wanpela hevi o profit?

ALOYSIUS AISI i raitim

DISPELA samting ya we planti lain i lukim olsem i gutpela long ol arapela wok. Pasin pamuk i wok long groa yet na divelop long dispela taim yet. I no olsem wanpela hevi tasol olsem aida long tingting bilong ol man we maski ol i no wanbel long em, ol i larim tasol i stap. Ripota Aloysius Aisi i lukluk long pasin pamuk na we ol pipel i lukluk long en long tude.

Pipel i lukim pasin pamuk olsem wanem?

Taim mi harim ol toktok na tingting bilong ol manmeri insait long ol plentesen, ol asples, setelmen na long taun eria, mi bin painim hat long bilipim ol ripot na ol toktok mi wok long kisim long pasin pamuk na hau em i kamap olsem wanpela wanpela bikpela samting we yumi i no toktok planti long en, tasol em i kamap olsem bikpela samting long ol lain husat i stap insait long dispela bisnis.

Ol senis long laipstail i mekim planti yangpela meri i bungim hevi bilong kros pait insait long famili na haus, reip o bagarapim meri we ol man i longlong wantaim ol drag o spakbrus na strongpela dring.

Bikos ol i painim mani, planti ol yangpela meri long ples na taun i go insait long wok bilong pasin pamuk bihainim laik bilong ol man long dispela samting.

Kain kain we ol pipel i lukluk long pasin pamuk

I gat planti mining long pasin pamuk. Wanpela em long givim sevis long kisim mani na ol arapela samting olsem presen. I nogat laik tru long dispela man meri i slip wantaim.

Pablik i lukim pasin pamuk olsem i narakain long marit stret namel long tupela manmeri husat i laikim narapela narapela na ol i stap wantaim.

Long wankain taim tu, em i no wankain long tok olsem laik pasin em i wanpela narakain samting long ol dispela i save wokim pasin pamuk. Ol pamuk inap gat laik long patna ol i slip wantaim long en tasol em long sotpela taim. Long dispela tu, i no olgeta marit i stap pas long laik pasin. Wanem samting i narakain long pamuk long stretpela pasin poroman?

Wanpela ansa em long mani em bikpela samting na as long pasin pamuk. Ol arapela sait o samting i kamap bihainim.

Pasin poroman namel long pamuk na ol patna em i isipela. Man i slip o pamuk wantaim meri i givim kes mani na ol arapela presen na pamuk i peim bodi bilong em.

As long marti em long kamapim strongpela bung wantaim insait long famili we bai ol pikinini i kamap na famili i sanap.

Ol marit patna i gat bikpela wok na wanem wan wan long ol patna i mas mekim na ol samting olsem mani na ol arapela samting i no bikpela long tingting bilong ol long ol pikinini, lukautim ol na laik long wanpela arapela.

Tasol pamuk em dispela samting we olgeta manmeri i save rabisim bikos em i save bagarapim gutpela piksa bilong manmeri, moa yet long ol meri.

Wanwan man i gat toktok bilong em long pasin pamuk. Wanpela kepten bilong sip mi bin toktok long em i tok long ol lain olsem em husat i save raun long sip long longpela taim wantaim nogat meri, pamuk na ol meri long dispela wok em samting we ol i mas gat na go long ol. Em i tok bikos ol lain i wok long sip na raun na kamap long ol wan wan bris long wol na taim ol i go aut long ples ol i kamap long en, em sans nau long kisim win long dispela samting. Dispela i soim olsem amamasim ol yet em samting we ol dispela man i mas gat na ol i mas painim yet long

taim ol i kamap long wanpela taun o siti.

Wanpela wokman bilong wanpela spot klab i tok em i no lukim wanpela samting i rong wantaim pamuk pasin na em i pilim olsem helpim i mas go long en (pamuk pasin). Wanpela pasto mi bin toktok long en i bin tok pasin pamuk em wok bilong devil na i moabeta long stapim dispela pasin.

Long ol ples na viles, ol manmeri i bin tok olsem sampela marit meri na ol yangpela gels i salim ol yet long mani, kaikai na bilas. Ol i tok ol yangpela meri tru i wokim dispela pasin pamuk ya.

Long ol profesenel seks woka o lain i stap insait long pamuk bisnis long kisim mani, ol i lukim mani olsem as long olgeta samting long laip tude. Olgeta pipel i laikim mani tasol em i hat long kisim dispela mani.

Planti kain belhevi i kamap namel long ol yangpela pikinini na ol papamama. Ol papamama i no save wanbel tumas long ol poroman, ol boipren o gelpren na pasin bilong go aut long ol pati na danis long en. Ol dispela i as long kamapim hevi

Hevi i save kamap tu taim o, yangpela pikinini i les long harim ol stia tok bilong ol papamama, les nabaut na i no helpim long mekim wok long haus, i no kisim wok, go insait long kain laipstail we ol i smok, dring bia, smokim spakbrus na wokim pasin pamuk. Sampela meri bilong ol setelmen na siti mi bin toktok long ol i tok moa yangpela meri i wok long salim ol yet long ol yangpela na bikpela man. Ol i wokim dispela long kisim mani, amamasim ol yet na olsem wok bisnis.

Ol pamuk manmeri, ol lain i pamuk long ol man yet na ol meri yet na wantaim ol manmeri i stap insait long PNG sosaiti tude. Ol lain ya i ken ol save lain tru bilong dispela wok (profesenel) na ol lain bilong wanwan taim tasol (kesuel), tasol dispela i no bikpela samting. Ol kesuel pamuk lain em planti taim em ol yangpela meri i save wok ol yet o long grup. Ol i save painim ol man long salim ol yet long kisim ekstra mani long baim kaikai, ples long stap long en na poroman long ples longwe o narapela ples. Planti meri i raun long dispela rot i save kamap ol pamuk tasol sampela i nogat. Long planti taim, ol man i save painim ol na i no ol meri ya i go painim man. Planti man i save lukautim gut ol long peim pamuk pasin ol i wokim wantaim ol.

Sait long mani

Hevi long sait bilong mani i wok long kamapim hevi insait long famili laip bilong planti manmeri na narapela samting tu em dispela i wok long daunim pawa bilong ol lidaman na ol bikman long ples. Moa yet, planti yangpela pipel i wok long kam long ol taun.

Wantaim ol kain senis i kamap insait long sosaiti, hevi long mani na moa, planti yangpela meri i wok long go insait long pasin pamuk long kisim isi mani.

Long PNG pasin pamuk i no sut long ol kain rot na sevis olsem givim presen na mani bikos ol dispela em no i stap insait long pasin tumbuna o kastam.

Na long sampela meri we pasin pamuk nau em i rot bilong kisim mani long en, em karamapim fridom long ol samting we pasin kastom i bin save tambu long ol man na meri bikos ol i mas mekim samting stret bihanim kastom long sapatim laip bilong ol yet. Planti ol meri husat i save salim ol yet i gat ol boipren o ol i marit na ol i serim marit laip wantaim ol man bilong ol.

Planti man long sampela taim insait long laip bilong ol i save slip wantaim wanpela meri o man husat i wantok o wanples bilong ol. Planti taim ol i save fosim ol meri long wokim dispela tasol long pasin kastam, ol meri i no lukim dispela olsem reip o bagarapim meri na olsem ol i no ripotim o wokim planti toktok long en.

Pamuk kalsa

Planti kain kalsa bilong ausait i wok long kam insait long kantri na olsem kantri i no lukim tasol pasin pamuk bilong ol manmeri, tasol psain pamuk i go insait long kalsa bilong yumi tude. Pasin kalsa insait long sosaiti i bungim salens na ol manmeri i no givim luksave long kalsa.

Ol pamuk manmeri i kam long olgeta level bilong sosaiti. Ol dispela husat i gat gutpela skul na i gat save i save hait gut tru na wokim dispela pasin. Olsem na long planti taim, pablik i ting dispela pasin i save kamap long ol lain i nogat gutpela skul na wok o trangu lain tasol.

Long planti taim, pamuk man o meri em ol dispela we famili o hauslain i no lukim o wokim gut long ol. Tasol ol i no bilong ol famili we marit i bruk o i no stap gut olsem planti i save tok.

Sampela pamuk i kam long ol gutpela famil, planti em ol dispela we ol papamama i save lokim ol tumas long haus na banis. Planti yangpela meri i save laik egensim ol papamama na maritim ol man we papamama i no laikim. Tu ol bai karim ol pikinini i nogat papa long en na na bai ol papamama i rausim ol long haus.

Planti ol pamuk lain tu em ol lain i no wokim gut long skul na ol i lusim skul. Sampela i no inap painim wok na sampela i les tasol na i stap nating na dispela em isi rot long kisim mani long en na ol i go insait long en.

Sampela pamuk meri i amamas long mekim dispela wok olsem wok mani bilong ol. Wanpela mi bungim em i bin go long Yunivesiti, em i luk nais na em i wanpela savemeri na em i save pulim ol bikman i kam long em olsem ol kastoma bilong em.

I gat sampela samting o rot we gavman na ol ogenaisesen i ken wokim long dispela pamuk bisnis o nogat? Ol dispela pipel, maski ol i amamas long wok ol i mekim, ol i ken kirapim dispela bisnis i kamap bikpela. Em ol brata na susa bilong mipela na ol i mas kisim gutpela stia na sapat long go bek gen long gutpela sindaun.

Wantaim ol dispela hevi long han, bai yumi gat planti pikinini i nogat papa na i no longtaim bai i gat planti moa. Husat bai lukautim ol, putim ol long skul, laikim ol, husat bai lukautim dispela ol lus pikinini?

Pamuk pasin em i wanpela hevi insait long kantri.

Planti manmeri i laik lusim tingting long ol hevi na wari na ol i save laik painim taim bilong amamas. Arapelea i save mekim pasin bilong painim man o meri long slip wantaim em olsem samting bilong rausim ol hevi na wari.

Dring na painim poro man o meri long slip wantaim. Dispela i ken kamap olsem miks long gutpela samting bilong amamas long en na long wankain taim tu, em i ken kamapim bikpela hevi.

Taim man o meri i dring spak, ol i no save tingting gut na planti hevi i save kamap long samting ol i wokim taim ol i dring spak. Planti long ol dispela hevi i save bagarapim ol yet, famili na ol pikinini bilong ol.

Mipela i mas skulim ol pikinini ol trupela samting long seks o pasin bilong marit, sik AIDS na ol arapela samting i sut long dispela we ol i mas gat save long en.

Mipela yet i mas lainim save long ol dispela samting. Ol pikinini bilong mipela i mas save long ol samting na ol i ken mekim ol gutpela disisen long bihainim taim bilong ol. Na dispela i no inap long kamap sapos mipela i pasim maus na sem long toktok long en bikos em i no stret long pasin kastam long toktok long ol dispela kain samting.

Harim ol laik, ol pret, ol samting we ol pikinini bilong mipela i laik mekim. Yumi mas givim sans long ol kwesten bilong ol long gutpela rot.

Sapos ol yangpela manmeri i no save long samting bai rot bilong ol i bagarap.

MALOLO TAIM

Rivyu long dispela wik

CAA redim ol sefti ripot nau

SIVIL Aviesen bilong PNG i brukim bun nau long stretim ea sefti bihain long Australia i tok em bai no inap long larim ol PNG balus long operet long ea spes bilong em.

Australia Sivil Aviesen Sefti i bin givim detailin long Januari 31 bilong PNG long stretim ol sefti samting na sapos nogat, em bai stapim olgeta PNG balus long wokim ron bilong emi go long Australia.

Ol liklik balus i noken wari bikos ol i no save go long Australia.

CSA bilong Australia i laikim bai PNG i gat ol sefti ripot bilong ol balus bilong em i save wokim ron long ea spes bilong Australia na dispela em long lukim olsem ol balus i seif na inapim ol sefti lo ol i kam aninit long en.

Trenspot na Sivil Aviesen Minista Don Polye i bin tok tru Australia em i wokim dispela singaut na putim detailin na asua i stap long PNG CAA long karimaut ol sefti ripot long faivpela balus kampani we i save flai i go olsem long Australia.

Mista Polya i tok PNG i feil long karimaut ol sefti ripot na em i no amamas long dispela. Em bin tok tru ol i lukim hevi tasol ol i luksave olsem CAA i no bin wok gut tasol bihain long strongpela tok lukaut bilong Australia, em (CAA) i wok hat nau long redim ol sefti odit ripot.

Ol tisa laik straik

SKUL long dispela yia i no inap stat gut long sampela provins sapos samting olsem 6,000 tisa i go het long straik o stop wok, ol ripot i tok. Dispela i bihainim pasin we nesanel gavman i no peim ol entaitelmen bilong ol tisa. Em ol alauwens bilong ol tisa, wanpela tisa hetmasta alauwens, alauwens long tisa long ol bus skul na sampela arapeal moa. Antap tu long en liv balus tiket alauwens.

Ripot i tok ol tisa bilong Madang i go pas long dispela straik eksen na ol arapela tisa long Morobe, Wes na Is Sepik na ol Hailens tisa i sapatim ol tu.

PNG mas gat moa plis na ami long boda

SINGAUT i go nau long PNG bilong putim moa ami long boda wantaim Indonesia insait long Sandaun na Westen provins. Dispela i bihainim ol hevi i wok long kamap nau long boda taim ol ami bilong Indonesia i ronim ol Wes Papua paitman (OPM) na ol i abrus long PNG bodamak i kam long Sandaun na PNG.

Bosman bilong ami bilong Indonesia i beis long bodamak i tok bikos i nogat PNG plis na ami tumas long bodamak eria, dispela i kamapim hevi long sefti long pablik na ol lain i laik wokbaut namel long tupela kantri, moa yet ol dispela i stap long ol boda ples.

Las wokabaut bilong Komisina Warner long Bogenvil

Hai Komisina bilong Australia Nick Warner i bin wokim laspela wokabaut bilong em i go long Bogenvil long dispela wik. Em bin go wantaim Bogenvil Afeas Minista Sir Peter Barter long laspela wokabaut na lukim ol Pis Monitoring Grup wantaim tu ol arapela projek Australia i go pas long en long Bogenvil.

Mista Warner bai kisim nupela wok long Kenbra. Australia bihain long fopela yia insait long PNG. Na Bogenvil em wanpela bikpela eria we Australia i save givim helpim long en.

PNG politiks i brukim bus tumas



PRAIM Minista Sir Michael Somare i bin tokaut taim em i kisim sia bilong Praim Minista long Julai 2002 olsem husat man i gat ripot nogut i mas kisim mekimsave bilong lo.

Wankain tu, ol memba bilong palamen na ol Minista bilong em long kabinet tu i mas lusim wok bilong ol na sindaun arere na wetim wok painimaut insait long ripot nogut bilong ol.

Dispela em sampela toktok ol nupela Gavman i save mekim long soim ol pipel olsem nupela Gavman i laik stretim olgeta rot na klinim ol pipia na wok gut long ranim kantri na sevim ol pipel bilong em.

Dispela em namba wan toktok bilong Praim Minista i go long ol pipel bilong Papua Niugini long soim mak olsem nupela Gavman i kamap na kisim ples bilong olpela Praim Minista Sir Mekere Morauta na Pipels Demokretik Muvmen (PDM) gavman bilong em. Sir Mekere Morauta i lida bilong PDM.

Memba bilong Usino Bundi Peter Yama i hangamapim Praim Minista stret wantaim ol bikpela bikpela toktok long dispela Gavman i mas mekim wok painimaut na sekim ol na kotim husat man o meri i gat asua long stil pasin o brukim lo insait long wok bilong ol.

Mista Yama i laikim wok painimaut i mas go insait long pasin olpela Gavman bilong Sir Mekere Morauta i mekim na bihainim long salim bikpela haus mani bilong PNG ol i kolim PNGBC benk na sekim wanpela pasbuk wantaim Cayman Ailan we i stap long Karabien long Saut Amerika.

Mista Yama i kolim nem bilong ol sampela bikmanmeri insait long kantri we wok painimaut i mas go insait long ol.

Em i no toktok tumas long wok painimaut bilong Nesenel Providen Fan (NPF) bikos olpela Mekere Gavman i statim pinis wok painimaut na i wetim ripot long kamaut. Olsem na Sir Mekere i save mekim nois long Oposisen sait long askim Gavman long stat kotim na sasim ol man husat i gat nem insait long NPF ripot. NPF i bin lusim bikpela mani tru mak long K200 milien

na moa. Wanpela askim em, sapos ol lida na ol Minista i gat nem insait long ol dispela wok painimaut bai Praim Minista rausim ol long wok o ol i mas risan na go bek long pipel gen long bai ileksen?.

Masi husat lida i stap long sait bilong Oposisen o Gavman o wokman bilong Gavman, ol i mas sas yet insait long dispela bikpela toktok Praim Minista i bin mekim long namba wan taim long Julai las yia.

Tasol long Oktoba miting wantaim Praim Minista em i mekim narapela nek gen taim ol niusman i askim long em bai mekim wanem long ol Minista na ol lida husat i gat nem long NPF wok painimaut.

Praim Minista i tok olsem gavman i nogat tingting o plen yet long mekim senis long ol kabinet Minista bilong em. Sir Michael i mekim dispela toktok taim ol niusman i askim em sapos em bai senisim ol sampela Minista bikos long kain hevi we NPF inap kamapim nem bilong sampela Minista long kabinet bilong em na ol i mas lusim wok na stap ausait long wetim ripot bilong NPF.

Sir Michael i tok gavman bilong em i bin mekim disisen pinis long ol ino inap mekim wanpela senis yet long ol Minista inap sapos sampela bikpela senis i kamap long bihain.

Orait sampela bikpela senis i bin kamap em; sampela PDM memba i sindaun long namel sit olsem na bai Praim Minista i kisim ol i kam joinim Gavman o Spika Bill Skate i mas rausim ol i go bek long Oposisen we PDM pati bilong ol i stap long en. Ol dispela PDM memba em Andrew Kumbakor memba bilong Nuku, Caspar Wollom memba bilong Mosbi Not Is na Mao Zeming memba bilong Tewae Siassi. Ol i bin sanap long ileksen long tiket bilong PDM.

Rejistra bilong opis bilong Intagriti ov Politikel Pati na Kendidet Paul Bengo i luksave olsem ol tripela memba ya i bilong PDM pati na rekot bilong em i soim olsem ol tripela i bin sanap long ileksen long tiket bilong PDM.

Narapela samting bin kamap em Minista bilong Kalsa na Turism



• Bipo benk i save go long ol kastoma. Wanpela benk ka i go bungim ol pipel long rausim mani na putim mani.

na memba bilong Madang Alois Kingsley i gat nem wantaim plis long mekim long wanpela tisa bilong Yunivesiti na ripot i kamap tu olsem em i mekim sampela pasin we i no gutpela long Ela Beach hotel. Minista bilong Leba na Emploumen na memba bilong lalibu Pangia Peter O'Niell i gat nem long ripot bilong NPF na Spika Bill Skate i gat nem long NPF ripot tu. Wanem eksen bai kamap long ol dispela lida nau?.

Memba bilong Usino Bundi Peter Yama i tok em ino laik kisim wanpela wok Minista yet bikos em i gat bikpela wok yet long stretim nem bilong em wantaim Ombudsman Komisnin. Gutpela long em i tok olsem long Praim Minista i ken klia.

Praim Minista Sir Michael Somare i tokaut long palamen olsem em bai putim aut ripot bilong Nesenel Providen Fan (NPF) we bikpela mani i bin paul na wok painimaut i kamap long en na i pinis.

Olpela Praim Minista Sir Mekere Morauta i tok samting olsem 65,000 wokmanmeri wantaim ol kampani na bisnis husat i memba wantaim NPF na samting olsem 900 kampani na ol bisnis husat tu i memba wantaim NPF i laik save long husat i asua long stil na bai kisim sas.

Sir Mekere i tok dispela em wanpela bikpela hevi we i bin kamap long kantri olsem na sapos Sir Michael Somare i ken traim long makim sampela spesel loya long wok wantaim ol plis-man long kotim na sasim sampela lain husat i gat nem long dispela NPF ripot long paulim mani.

na sapos ol i ken holim sampela bikman na kotim ol tu.

WOK painimaut i go insait long pasin na ol rot bilong salim PNGBC benk i go long Bank South Pacific (BSP) i stat pinis.

Gavman i makim wanpela bikman loya em QC (Kwins Kaunsil) Marshall Cooke long go pas long grup bilong mekim dispela wok painimaut i go, insait long dispela. Dispela wok painimaut i kamap na sampela bikman i gat nem i kamap pinis na bekim ol kwesten na tokaut tu long ol samting ol i klia o save long en.

Praim Minista Sir Michael Somare i tok gavman i gat tingting long baim bek PNGBC tasol em bai tingting tu long salim hap ol bisnis han bilong ol gavman bisnis olsem Telikom, PNG Habours Board na ol arapela na i no long salim olgeta bisnis bilong kantri.

Sir Michael i tok em i laikim kain bisnis we gavman i holim hap sea na ol kampani ken holim hap sea bilong ol na tupela wantaim i ken skelim profit long hap hap.

Praim Minista i tok bikpela samting em long stretim gut ol wok menesmen bilong ol dispela gavman bisnis long lukim olsem ol i ken wok gut na mekim gut mani na ol tu i ken ron gut long wok bilong ol long planti taim i kam.

BSP Benk i bin baim PNGBC benk long las yia aninit long praive-taisesen progrem bilong olpela gavman bilong Sir Mekere Morauta. Dispela taim ol yunion bilong PNGBC benk i bin kamapim planti komplem tru long dispela.

Memba bilong Usino Bundi Peter Yama i tok tok strong long Praim Minista Sir Michael

Somare i mas kamapim wok painim aut i go insait long pasin na rot gavman na ol sinia opisa bilong benk i mekim long salim PNGBC benk i go long BSP.

Mista Yama i tok em i lukim olsem planti samting i no bihaim rot stret na em i gat ol evidens o pepa long helpim Praim Minista long sekim ol dispela samting.

Tasol taim Peter Yama i bin stap ausait olsem praive-taisesen, PNGBC benk i bin givim em bikpela hat taim we benk i tok Mista Yama i gat bikpela dinau long stretim. Benk i bin laik teko-va long hotel bilong Mista Yama long Madang ol i kolim Smugglers Inn na tu benk i kisim Mista Yama i go long kot long ol dinau mani na i laik kisim arapela kampani bilong Mista Yama.

PRAIM Minista Sir Michael Somare i tokaut long 8-pela poin we wok painimaut bai bihainim long sekim na tokaut long dispela pasin bilong baim PNGBC benk.

I bin-gat ol askim i kamap long palamen na tu long publik olsem planti samting i no stret insait long dispela na tu prais ol i baim PNGBC benk i daun tru long prais tru bilong benk.

Ol 8-pela poin em;
• Sapos Praive-taisesen Komisnin i bihainim stret ol pawa bilong em long salim PNGBC na tu bihainim ol polisi na toktok bilong Nesenel Eksekyutiv Kaunsil (NEC) o nogat. Na tu sapos NEC wantaim Komisnin i bihainim stret rot bilong tokaut long Finance Pacific Limited i kamap praive-t kampani long Mas 28, 2001. Na tu sapos ol i bihainim rot-stretim gut ol wokman long wok

bilong ol wantaim ol sevings ol i gat wantaim supaenuesen fan na haus bilong ol.

• Sapos ol lain Praive-taisesen Komisnin i kisim long givim ol tok stia na tingting long salim PNGBC benk em ol i eksperiens na save lain stret bilong mekim dispela kain wok.

• Sapos sampela lain o kampani o lo opis o arapela grup i mekim ol paul pasin o i no bihainim pasin stret long wok bilong salim PNGBC benk. Sapos ol sampela woklain bilong Praive-taisesen Komisnin o ol Komisina i gat interes insait long dispela. Sapos sampela toktok i go hait long ol lain i laik resis long baim PNGBC na sapos sampela lain i no amamas long resis na i lusim. Sapos ol rot bilong resis long baim PNGBC benk i no kamap stret. Sekim sapos nogat wanpela woklain i kisim tok hat long mekim samting stret long helpim ol i winim tenda long baim benk.

Sapos i gat toktok i kamap namel wantaim ol woklain bilong Praive-taisesen Komisnin, ol Komisina na NEC long husat i mas winim dispela tenda na sapos dispela pasin i brukim lo. Sapos Praive-taisesen Komisnin i bin pasim toktok wantaim Gavana bilong Sentrel Benk long stopim o dauning ol arapela benk long noken stap insait long resis bilong baim PNGBC.

Sapos Praive-taisesen Komisnin wantaim Sentrel Benk Gavana na Siaman bilong PNGBC i tanim ol rot i go kam long oraitim tasol BSP long baim PNGBC benk.

• Sapos eksen bilong Praive-taisesen Komisnin, NEC na Gavana bilong Sentrel Benk i no stret long ol dispela wok bilong traim salim PNGBC benk i go long BSP benk. Sapos dispela i bihainim tu lo bilong Companies Act 1997 long salim PNGBC igo long BSP benk. Sapos mak bilong mani BSP i gat i bihainim stret mak bilong tenda we Praive-taisesen Komisnin i kamapim. Sapos Praive-taisesen Komisnin i gat fainensel odit ripot bilong BSP long dispela taim. Sapos Komisnin i bihainim rot-stretim long kisim ful prais bilong PNGBC we em i salim long en long K130 milien.

• Sapos i gat asua long kisim sampela mani long NPF, POSF, MRDC, Credit Corporation Ltd long helpim BSP long baim PNGBC benk.
• Sapos sampela

krangki pasin i bin kamap long makim Gavana bilong Sentrel Benk long stapim PNG Teachers Association long noken stap insait long dispela wok bilong baim PNGBC.

• Taim ol i bin makim Garth McLwain olsem siaman bilong PNGBC em i bin traim long dauning veliu bilong PNGBC benk i kam daun.

• Na sapos i gat rot bilong sekim gen olgeta lo we i sut long wok bilong praive-taisesen.

O M B U D S M A N Komisnin i givim strong-pela toksave i go long ol benk na ol gavman opis we i save lukaotim na givim mani long stapim olgeta peimen bilong olgeta olpela memba bilong palamen aninit long lidasip bilong Sir Mekere Morauta.

Rekot i soim nem bilong planti olpela memba na ol wanwan husat i bin winim ileksen long 2002 na i go bek long palamen.

O m b u d s m a n Komisnin i askim ol benk long stapim olgeta mani insait long pasbuk bilong ol dispela lain o wanem pasbuk ol dispela mani i stap long en. Benk i no ken larim pasbuk i op long ol i kam rausim mani. Dispela i stat long Desemba 2, 2002 na i go. Planti mani bilong ilektorel Developmen Fan (EDF) Ombudsman Komisnin i ting ol memba i no bihainim pasin stret long yusim ol dispela mani.

Plantim memba i kisim mani mak K50,000 i go antap long K200,000 long yia 1999 i kam inap long 2002 dispela yia bipo long nesenel ileksen i kamap.

Sampela memba i kisim mani tupela o tripela taim insait long EDF bilong ilektoret bilong ol we Ombudsman Komisnin i lukim olsem ol dispela mani i no go stret long wok bilong ilektoret.

Bikpela tingting em ol i yusim mani long wok bilong ileksen kempen o long wok bilong ol yet.

O m b u d s m a n Komisnin i ting dispela mani i mak olsem K5 milien na moa long 50 memba i bin kisim ol dispela mani.

Narapela bikpela mani tu olgeta memba i bin kisim long las gavman em distrik grent mani mak olsem K250,000.

Dispela mani i go long nem bilong distrik opis na distrik menesa long wanwan ilektoret insait long kantri. Ol memba bilong ol dispela distrik o ilektoret i kisim ol dispela mani makim distrik bilong ol.

Aimo tok ol memba bai toktok yet long helt wari

PALAMEN em ples we ol memba i mas toktok long ol bikpela samting insait long ol skuls long kantri bikos Papua Niugini i mas gat gupela human risos insait long kantri.

Memba bilong Ambunti Drekekeir Tony Aimo i tok wanpela bikpela samting em i bin toktok long palamen las yia em wanpela nupela helt program we Yunivesiti ov Papua Niugini i bin statim pinis long ol helt studen bilong UPNG.

Mista Aimo i tok dispela program ol i kolim Problem Bes Lening (PBL) i gat planti askim long em olsem em i gupela o nogat na tu i gat toktok olsem dispela program i nogupela long ol studen insait long PNG.

PBL em i wanpela program we o studen husat i laik kamap helt dokta i mas kisim save

long en pastaim ol long ol pinisim skul.

Mista Aimo husat i wanpela bikpela saveman tu pastaim long em i kamap memba i tok bikpela tingting bilong em i laikim olsem minista husat i go pas long ol Saiens na Teknoloji i mas mekim wanpela wok painimaut i go insait long dispela program.

Em i tok i gat planti toktok i kamap long pablik long PNG yet na long ovasis tu na em i laikim minista Mista Alphonse Willie i mas lukluk i go insait long dispela samting na mekim wanpela wok painimaut i go long lukim sapos ol yangpela studen dokta i mas lainim dispela samting.

Mista Aimo i tok i gat planti toktok i kamap nau olsem ol pablik i pret long kisim helpim i kam long ol doktas husat i

kisim PBL skul.

Em i tok sampela memba bilong palamen husat ol yet tu i helt dokta tu i askim bilong wanem na dispela nupela program i kamap na wanem samting i rong wantaim bipo sistem.

Hetman bilong Helt Saiens na Marasin Profesa Mathais Sapuri i tok strong long bekim olsem ol dispela toktok bilong memba i no tru na nogat as long mekim wok painimaut i go insait long dispela program.

Dokta Sapuri i tok ol lain husat i bringim dispela toktok i kamap i gat sampela samting egensim helt skul na em i no laikim ol dispela toktok long kamap.

Tasol Mista Aimo i tok wanpela wok painimaut i mas go het yet na em wantaim ol memba husat i gat save long

dispela ol toktok bai go het yet long pusim ol minista long lukluk i go insait long dispela samting.

Em i tok ol memba i stap long palamen long lukluk long kain samting olsem na ol bai i no inap stap isi bikos laip bilong ol pipel em i bikpela samting na ol i mas mekim toktok long wanpela samting i mas kamap long ol atoriti na minista husat i go pas.

Mista Aimo i tok wanem moa, samting i kamap long ol skuls long kantri em ol memba i ken bringim hevi long palamen bikos em rait bilong ol long toktok long wanem hevi ol pipel i laik karim.

Dispela bai helpim long bringim senis i kam insait long kantri na gupela skul bai ol studen i kisim long helpim kantri.

Tupela yunivesiti givim strongpela toksave

HILDA WAYNE
i raitim

NUPELA skul yia bilong yunivesiti bai stat klostu taim na nem bilong ol nesanel hai na sekendari skul studen i kamap pinis.

Nau long dispela taim husat ol nupela studen i aplai long yunivesiti bai save long wanem yunivesiti ol bai i go bikos tupela bikpela yuni long kantri, em Yunivesiti ov Papua Niugini (UPNG) na Lae Yunivesiti ov Teknoloji i kisim toksave pinis olsem ol bai go long go long wanem skul.

UPNG i tokaut pinis long nem bilong ol studen bai go long dispela skul tupela wok i go pinis na Yuni Tek long Lae i tokaut long ol studen stat long dispela wok tasol.

Planti ol studen husat i kisim toksave long niuspepa na pas i kam long tupela bikpela skul bai save long wanem hap ol bai go.

UPNG i givim wanpela strongpela toksave i go tu long ol bipo studen olsem sapos ol i no mekim gut long tes bilong ol long las yia orait ol i noken kam bek long skul nating.

Toksave i kamaul pinis long ol niuspepa olsem husat studen i no mekim gut long skul long las yia long UPNG i noken tingting long kam bek nating long UPNG bikos ol i mekim nogut pinis na ol i mas painim we bilong ol yet long stap bek long ples bilong ol na traim gen long aplai long 2004.

Uni Tek i givim wanpela strongpela toksave tu i go long olgeta papamama na spona bilong ol studen olsem olgeta i mas baim ful skul fi pastaim long ol i laik kam long statim rejistresen long skul.

Skul administresen i givim toksave olsem husat ol lain i no baim ful skul fi bilong ol studen i noken kam long skul na skul administresen i no inap harim wanpela toktok bilong wanpela husat i kam wantaim haphap skul fi tasol.

Long UPNG tu wanpela strongpela tok lukaut i go long ol studen husat i go dinau mani wantaim skul olsem sapos ol bipo studen i gat dinau mani wantaim skul orait ol i noken kam long skul inap ol i bekim dinau ol i gat wantaim skul.

Wanem ol las yia studen husat i aplai long greduet em ol tu i mas pinisim ol dinau bilong ol tu pastaim long ol i laik kam long greduet.

Sapos ol i no mekim olsem bai skul i no givim tok orait long ol i ken greduet na pepa bilong ol bai skul i holimpasim inap ol i bekim dinau bilong ol. Husat ol papamama ol spona i laik kisim moa toksave i mas toktok wantaim skul hariap.

Long narapela stori Enga gavana Peter Ipatas i tokaut olsem em bai i no inap baim skul fi bilong ol studen long provins bilong em husat i stap long ol liklik skuls long kantri.

Mista Ipatas i tokaut olsem sapot bilong em long ol yunivesiti na bikpela skuls tasol bai go het yet tasol ol hai skul na komyuniti skuls em bai i no inap givim moa sapot dispela yia.

Em i tok mani we gavman i makim long ol long provins i no olsem bipo olsem na ol papamama i mas karim hevi nau long baim skul fi bilong ol pikinini bilong ol.

Mista Ipatas i save givim planti sapot na helpim ol pipel bilong em taim em i save baim skul fi bilong olgeta skul pikinini long provins tasol nau dispela helpim i nogat moa.

Gavman makim 13 nupela haus sik bod

SAMPELA bikpela haus sik insait long kantri i gat nupela ol haus sik bod we helt dipatmen i makim pinis na gavman i givim tok orait long dispela ol apoinmen.

Mak long 13 haus sik bod olgeta em ol i bin apointim na posisen bilong ol bai statim wok bilong ol long dispela mun i go Februari long wanwan haus sik.

Ol haus sik we i gat ol nupela bod memba em Vanimo, Wewak, Angau, Boram, Madang, Popondeta, Daru, Alotau, Kavieng, Lorengau, Goroka na Nonga.

Helt Sekretari Dokta Nicholas Mann i tokaut long ol dispela apoinmen bihain long ol i givim ol nem i go long helt Minista Melchoir Pep.

Dokta Mann i tok ol i bin tokim Mista Pep olsem dispela em i wanpela bikpela samting tru na gavman i mas givim tok orait long ol dispela nem ol i givim bilong kamap bod bilong ol haus sik.

Em i tok planti bilong ol dispela haus sik em taim bilong bod bilong ol i stap insait long lukautim haus sik em i pinis na ol i nogat taim long makim nupela bod olsem na nau ol i mas kisim nupela bod hariap.

Dokta Mann i tok taim ol i givim nem i go long Mista Pep wok bilong em long bringim ol nem i go long kabinet na kabinet bai miting na givim tok orait long dispela ol nem na makim ol kamap bod bilong ol haus sik.

Em i tok nau yet i gat foapela bikpela haus sik tasol insait long kantri husat i gat nogat bod yet we ol i mas makim tu.


Dispela ol foapela haus sik em Mosbi, Hagen, Mendi na Kerema haus sik.

Dokta Mann i tok dispela ol haus i gat sampela samting namel long ol yet we ol i mas stretim pastaim long ol i ken makim nupela bod bilong ol.

Long Mendi haus sik em i tok hevi i stat long taim bilong ileksen yet na bai ol i lukluk long dispela gut pastaim na makim bod bilong haus sik.

Mosbi tu i gat sampela ripot we paul na hait pasin i kamap we ol mani i no go long gupela rot na i lus long hait pasin na ol i mas stretim dispela samting pastaim. Dokta Mann i tok em i luksave olsem bai ol bod yet i lukluk i go insait long dispela hevi na stretim pastaim long wanpela samting i ken kamap long makim nupela bod gen.

Nupela bod i ken go insait tasol wanem asua na rong i stap long bipo bod em ol i mas stretim pastaim long opim rot bilong nupela bod i ken go insait na surukim wok bilong bod i ken go het yet.



Bus skul nogat gupela helpim.... • Planti toktok i kamap olsem gavman i no save givim wankain helpim i go long olgeta skuls long kantri. Sampela rural skuls i tokaut olsem mani ol i kisim em i no inap long ol i lukautim ol skuls bilong ol. *Fail foto.*

Tisa tok gavman mas givim wankain sevis long olgeta

WANPELA tisa long wanpela rural skul long Oro provins ol i kolim Yema Elementri skul i tokaut strong long gavman olsem gavman i mas givim gut ol skul subsidi i go long ol skuls long ol taun na viles skuls wankain tasol.

Tisa nem bilong em Yuna Waria i tok em i no amamas taim em i bin kisim K500 tasol olsem skul subsidi bilong skul bilong em long las yia i kam long Edukesen Dipatmen.

Mista Waria i tok dispela K500 em i no inap long helpim long ranim

skul na em i laikim gavman na ol eduksen atoriti long lukluk na tingting gut taim ol i laik givim subsidi i go long ol bus skuls.

Em i tok ol bus skuls i painim hat tumas long yusim kain liklik mani olsem na tu ol laikim helpim long baim moa blekbot na ol studen tu i nogat besk bilong ol we ol i ken sindaun gut na lainim samting insait long klasrum.

Mista Waria i tok ol elementri gred wan na tu i yusim ol buk na pensil long rait tasol ol elementri prep studen i painim

hat tru long rait long blekbot bikos nogat wanpela samting i stap we bai ol i ken yusim long rait.

Mista Waria i tok planti samting we ol studen i nidim long kisim gupela skul em ol i nogat bikos ol bus skuls i no save kisim gupela luksave i kam long ol eduksen atoritis.

Em i tok planti taim ol i bin putim komplek bilong ol i go long eduksen dipatmen tasol nogat wanpela samting ol i mekim long helpim ol.

Mista Waria i tok planti ol skuls long ol rural eria

em i hat tumas long kisim helpim hariap bikos nogat rot bilong bringim ol sevis i go stret long ol.

Em i tok ol skuls we i gat rot i go long ol em i isi long ol i ken kisim helpim tasol sampela em nogat rot na liklik ol balus i save karim ol kago i go long ol na dispela em i givim moa hevi long ol skuls i ken operet gut.

Mista Waria i tok maski i gat planti hevi tru long ol rural skuls insait long kantri planti ol tisa i save laik long go kamap tisa bilong ol dispela skuls na gavman i mas givim

sapot long helpim wok bilong ol tisa long olgeta hap long kantri.

Em i tok gavman i save mekim planti tok promis long givim sevis i go long ol pipel long kantri olsem na maski ol rural skuls ol taun skuls em gavman i mas givim wankain mani tasol long olgeta skuls insait long kantri.

Mista Waria i tok planti taim ol rural skuls i no save kisim gupela luksave na dispela kain pasin i noken kamap insait long ol skuls long kantri na gavman mas givim wankain mani o sevis long olgeta skuls.

Ol lapun long Fiji nogat gutpela lukautim

FIJ: Wanpela singaut i go long ol pipel bilong Fiji olsem ol i mas tingting long ol lapun papamama na tumbuna bilong ol na lukautim ol gut nau long dispela taim.

Long Fiji i gat ples o haus bilong ol lapun manmeri we ol i save kolim ritaiamen hom. Ol lapun husat i nogat wok na ol i save stap nating em ol i save putim ol long dispela lain haus na ol sosol wokas i save lukautim ol.

Ol dispela lapun i gat ol pikinini bilong ol i stap tasol ol pikinini i gat laip bilong ol yet na ol i save putim ol long dispela kain haus bilong ol yet. Dispela kain pasin bilong putim ol lapun long narapela hap em pasin bilong ol wait man stret husat i nogat sori olsem ol pipel bilong pasifik.

Tasol ol lain Fiji i mekim dispela kain pasin na nau long dispela taim i gat ripot i kam long Fiji yet olsem nogat moa spes long putim ol lapun insait long ol dispela haus. I gat

tripela ritaiamen hom long Fiji na olgeta i pulap tumas.

Ol sosol wokas i tok tu olsem planti ol fasilitis insait long ol dispela haus bilong ol lapun i bagarap na ol lapun i nogat gutpela ples bilong mekim ol eksasais nabaut long givim strong long ol yet.

Planti i save silip nating i stap na nogat wanpela samting moa ol i save mekim na dispela i givim moa hevi long ol sosol wokas na ol lapun wantaim.

Dairekta bilong Fiji Kaunsil ov Sosol Sevis Hassan Khan i tokaut strong olsem long planti ol ovasis kantri long ol bikpela kantri we i lukim developmen pinis ol i save toktok long rait bilong ol pipel tasol sampela lo bilong ol i save rabisim ol lapun.

Wanpela ritaiamen haus ol i kolim Samabula Old Pipel's Hom Peni Ratu i tok tu olsem planti ol yangpela manmeri long Fiji i wok long lusim kantri

bilong ol na i go long ol narapela kantri long stam nupela laip.

Taim ol dispela yangpela i lusim kantri nau em i hat tumas long ol i ken bringim ol lapun bilong ol i go wantaim ol bikos sampela lo bilong lusim kantri i go long narapela kantri i no laikim ol lapun long go long narapela kantri.

Lo bilong ol narapela kantri i save stapim ol lapun long go long kantri bilong ol na dispela em Mista Khan i tok lo bilong ol ovasis kantri i save wansait tru na stapim rait bilong ol lapun.

Mista Khan i tok dispela kain pasin bilong ol lapun i lusim ol lapun papamama na tumbuna bilong ol i noken kamap na ol pipel i mas tingim ol lapun na lukautim ol gut.

Em i tok ol pipel bilong Fiji i mas tingting gut na soim pasin sori long ol lapun bilong ol na kisim ol na lukautim ol gut na maskim lusim ol long ol narapela haus nabaut.

Nogat bilip long lidasip bilong Indonesia presiden



Indonesia plis i paitim na stapim ol yunivesiti studen na ol wokas long straik egensim prais bilong ol kaikai na gavman sevis i go antap tru: Moa belhat i wok long kamap long dispela samting na ol pipel i bilong Indonesia i laik gavman i mas helpim ol long daunim ol prais. Piksa i kam long *The Weekend Australian* niuspepa.

INDONESIA: Indonesia em i gat wanpela meri nem bilong em Megawati Sukarnoputri husat i stap olsem presiden bilong kantri. Mis Megawati em i bin holim opis olsem presiden 18 mun olgeta na nau i gat strongpela toktok i kam long pablik we ol i egensim planti disisen gavman bilong Mis Megawati i wok long mekim.

Planti komplem i wok long kamap olsem prais bilong ol kaikai i wok long go antap tumas na ol pipel i no laikim dispela. Prais bilong telepon,

pawa na fiul i wok long go antap tru na dispela i kamapim planti belhevi long ol sitisen bilong kantri.

Ol saintis na saveman bilong politiks i tok strong olsem Mis Megawati i no mekim wok bilong givim gutpela gavman long ol pipel na em i wok long holim pawa nating tasol na dispela i mekim ol pipel i no amamas long lidasip bilong em.

Taim prais i stat long go antap nau ol yunivesiti studen na planti ol wokas i kamapim ol bikpela protes long soim

gavman olsem ol polisi bilong em i no gutpela tumas na em i mas senisim ol we bilong em.

I gat moa toktok olsem nau i go inap long neks yia Jun bai nupela ileksen bai kamap na ol save lain bilong politiks i tok olsem Mis Megawati i mas senisim stail bilong em long lukautim kantri na putim bilip long tingting bilong ol pipel hariap.

Sapos em i no senisim lidasip stail bilong em bai em bai nogat sans long stap presiden bilong Indonesia long neks yia ileksen.

COURTS

KNOCKDOWN SALE!

IN YOUR HOME FOR K7.00 TASOL

AKITA DW5014P TWIN TUB WASHING MACHINE
CASH *699 Regular K805
• 5 kilogram capacity • washer & dryer

TIFFANY S1238 STEAM/DRY IRON
CASH *79 Regular K105
ORIGINAL CASH K89

AKITA FR350 2 DOOR FRIDGE/FREEZER
CASH *1,899 Regular K2,185
ORIGINAL CASH K2,099
• 350 Litre capacity • 2 doors • storage shelves

SUNBEAM TA4200 2 SLICE TOASTER
CASH *89 Regular K117
ORIGINAL CASH K109

SUNBEAM KE2350 1.8L CORDLESS KETTLE
CASH *139 Regular K185
ORIGINAL CASH K159

AKIRA KT6638 1.5L CORDLESS KETTLE
CASH *169 Regular K219
ORIGINAL CASH K189

*Our Prices in this press advertisement are subject to change at any one time without notice.
The Products shown in this press advertisement were available at the time of press printing. Not all are available in other branches.

COURTS

POWERHOUSE

AT COURTS

Papua New Guinea's Favourite Furniture and Electrical Stores

COURTS BOROKO Monian Haus. Tel: 323 6802	COURTS TOWN Steamships Plaza. Tel: 321 2143	COURTS GORDONS Spring Garden Road. Tel: 302 5808	COURTS GOROKA Fox Street. Tel: 732 2033	COURTS LAE Milfordhaven Road. Tel: 472 4800	COURTS MADANG Beckslea Plaza. Tel: 852 3711	COURTS HAGEN Hagen Drive. Tel: 542 1401	COURTS WAIGANI Stop 'n' Shop. Tel: 323 3277
--	---	--	---	---	---	---	---

Ol woa sip bilong Amerika i stap redi long woa

IRAK: Ol ripot i kam long Irak i tokaut olsem ol ami bilong Amerika, Inglan na Australia i stap redi tasol long kamapim woa wantaim Irak.

Mak long 5,000 ami opisa bilong Amerika i stap insait long solwara boda bilong Irak na ol i stap redi wantaim olgeta strongpela masin bilong pait.

Ol hetman bilong wanwan divisen insait long ami bilong Amerika i tok olgeta pailot na nevi opisa na olgeta manmeri

i stap insait long ami i wetim wanpela man tasol long givim tok orait long statim woa.

Dispela man em presiden bilong Amerika George W Bush. Ol i tok dispela man tasol bai givim tok orait long kamapim woa na olgeta samting i stap redi pinis.

Ol sip i pulap long ol masin bilong woa na ol ami balus bilong Amerika yet i go insait long erai bilong Irak na patrol i stap.


Taim Mista Bush i

givim tok orait nau em woa bai stat na ol ami bilong Amerika wantaim helpim i kam long Inglan na Australia bai i no isi long go insait na statim bikpela pait wantaim Irak.

Irak tu i strong tumas na presiden bilong Irak Saddam Hussein i tokaut olsem ol pipel bilong em i stap redi tasol long woa na ol bai i no inap givim ol yet i go long han bilong Amerika na ol lain kantri husat i sapotim Amerika.



Belhat long Amerika... • wanpela soldia bilong Irak na sampela yut i soim belhat long tingting bilong gavman bilong Amerika i laik statim woa long kantri bilong ol. Ol i tok ol i no wari long woa bikos ol i stap redi tasol long pait long kantri bilong ol. Piksa i kam long The Weekend Australian niuspepa.



• Meri nogat sori long ol liklik boi.....lukim piksa bilong Sherry Murphy husat i laik kilim i dai tripela brata. Tupela i laki long stap laip yet tasol turangu wanpela i dai pinis. Piksa i kam long The Weekend Australian niuspepa.

Meri mekim pikinini klostu dai long hangre

AMERIKA: Plis i holimpas pinis wanpela meri husat lokim tripela brata insait long wanpela haus na em i no givim kaikai long ol long planti dei olgeta. Ol liklik boi nem bilong ol Raheem na Faheem Williams na Tyrone Hill husat i brata bilong tupela i gat foapela krismas tasol.

Raheem na Faheem em tupela twins brata. Plis i tok mama bilong ol brata nem bilong em Melinda Williams i bin go long kalabus long las yia Mas bikos em i save paitim ol brata nogut tru. Ol sosol wokas i kisim ol boi na givim long narapela meri nem bilong em Sherry Murphy.

Sherry i lukautim ol i stap tasol las wik plis i painmaut olsem em i klostu kilim ol liklik i dai.

Plis i go mekim wanpela wok painmaut long ol liklik boi long haus bilong Sherry na ol i go insait long wanpela rum nau ol i painim liklik Tyrone na Raheem i stap insait long rum i dak nogut na tupela nogat

kaikai na ples bilong pekpek na pispis.

Plis i tok bodi bilong tupela i smel nogut tru bikos tupela i karamap long pispis na pekpek bilong tupela. Tupela i bun nating tru na nogat gutpela klos long bodi.

Taim ol i karim tupela i go na wasim na klinim tupela pinis nau Raheem i tok em i no lukim brata bilong em Faheem. Plis i go bek long haus gen na ol i painim bodi bilong Faheem i stap insait long wanpela bokis na em i dai na smel i stap.

Plis givim wanpela strongpela tok-save i go long ol pablik long helpim ol long painim Sherry. Meri ya i laik ranawe kisim balus na go long narapela hap tasol plis i putim piksa bilong em long olgeta ples balus na trenspot ples.

Ol i kisim em pinis na nau em bai go long kot long dispela bikpela rong em i bin mekim long ol liklik boi.

Tok pait long timba projek long Fiji

SUVA: Pasin bilong tok pait long husat i papa tru bilong ol timba projek em i no stap long Papua Niugini tasol dispela hevi i save kamap long Fiji tu.

Nau long dispela taim i gat sampela papagraun husat i wok long pait long kisim taitel long graun we wanpela bikpela kampani i laik katim timba na planti milen mani bai go long ol papagraun na gavman bilong Fiji.

Wanpela seif nem bilong em Ratu Isikeli Rasoqosoqo Cabenaliwa bilong Savu viles long Fiji i tokaut olsem em i laik ol polisi bilong gavman bilong Fiji i noken abrusim rait bilong ol papagraun.

Viles bilong seif Ratu Isikeli i stap long Nukurau timba stesen we ol kampani i redi long katim timba tasol dispela i bai wet liklik inap ol papagraun i stretim tok pait bilong ol.

Wanpela narapela man nem bilong em Ratu Osea Roqica bilong Tui Vugalei distrik i kamapim wanpela bikpela kompensesen toktok pinis namel long gavman na em i laikim


gavman mas baim 94 milien dola kompensesen mani i go long ol pipel bilong em bikos em i tok gavman i bin brukim sampela lo insait long agrimen bilong wok timba long graun bilong ol pipel bilong em.

Tasol seif Ratu Isikeli i tok strong olsem em i no wanbel long toktok bilong seif Ratu Osea bikos em i no tru papagraun bilong dispela timba projek na ol pipel i no save long dispela kain kompensesen toktok we i kamap namel long ol.

Seif Ratu Isikeli i tok yet olsem em i no save long wanem we seif Ratu Osea i kamap seif bikos dispela man i nogat nem long komyuniti tu.

Dispela tok pait namel long tupela man i mekim ol timba kampani i stapim wok na wetim wanpela kot we i go nau long bikpela kot long Fiji.

Ol papagraun na gavman bilong Fiji bai kisim bikpela mani tru long dispela timba projek tasol nau ol i mas wet pastaim inap kot i stretim toktok namel long tupela lidaman pastaim.




Amamas long maket.....

• lukim sampela mama long kantri Afrika i salim kaikai bilong ol long maket. Long Afrika em wok bilong ol mama long planim kaikai na kisim i go long maket salim na bringim mani i kam bek long famili.

Piksa i kam long The Weekend Australian niuspepa.



• (lephan) Maksi laip long siti i hat, sampela famili i save long strongim sindaun wantaim kain liklik gaden olsem arere long haus na blok bilong ol. (aninit) Lapun Philip i soim ol mau banana em i kisim long gaden.



• Yokosim Komyuniti skul long Dagua, Is Sepik wantaim helpim bilong Japan.gavman i gat nupela klasrum na tisa haus slip. Hia em Japan Embasi Seketeri Takato Matsuo i sindaun wantaim ol bikman long opening bilong ol bilding ya.



**MOROBE PROVINCIAL ADMINISTRATION
DIVISION OF AGRICULTURE AND LIVESTOCK**

Kirapim bek wok kakao na mekim Bisnis

Nao planti manmeri iluksave olsem Kakao prais iwok long kamap gutpela tru. Dispela ikamap long wanem, igat bikpela kros pait iwok long kamapim long kantri Ivory Coast long Africa husait isave kamapim bikpela kakao saplai long wol maket. Dispela ibagarapim kakao saplai long wol maket olsem na prais iwok long igo antap nau. Tasol ol planti famas bilong yumi inogat inap save long stretim na kirapim bek gen ol olupela kakao gaden bilong ol. Olsem na dispela tu iopim rot bilong bisnis long ol husait fama o manmeri long kisim iluksave na mekim wok bilong stretim bek gen ol olupela kakao gaden.

Support Service Contract Facility (SSCF) iwok bung wantaim Cocoa and Coconut Extension Agency (CCEA) long givim 2 wiks training kos long kamapim ol famas o manmeri wantaim save na gutpela wei bilong stretim ol olupela kakao gaden. Pei bilong wanwan manmeri long kamap long dispela training em K300.00. Dispela pei bai karamapim pei bilong ol kain tuls, skul buk na ol arapela samting.

Dispela training bai kamapim ol manmeri/famas husait igat gutpela save long stretim ol olupela kakao gaden na ol fama bai hamamas long wok wantaim ol. Ol famams long peles yet mas peim moni long dispela wok bilong stretim kakao gaden bilong ol. Ol famas iken peim dispela sevis long moni o mekim wol bilong fama givim helpim. Dispela bai istap namel long wanbel bilong fama (papa bilong gaden) na fama givim sevis. Tasol SSCF iluksave long mak olsem 20% (2 pela long olgeta 10 pela) long ol diwai kakao we sevis provaida ihelpim long stretim mas igo long sevis provaida long kisim kakao na salim inap long 3 pela krismas/yia long peim helpim em igivim. Ol manmeri ilaik aplai pastaim luksave long maket o hamas famas istap long dispela eria ol iken wok wantaim ol, orait bihain ol iken aplai.

Namba wan training bai kamap long 40 mile long training ples bilong CCEA. Haus bilong silip bai stap long Wawin Fam.

Man o meri husait laik aplai mas raitim aplikesen leta igo long SSCF na tok-save long:

1. Save na ol kain wok bilong em/ibin mekim insait long wok kakao,
2. Hamas fama bai em wok wantaim na namba bilong diwai kakao ol bai stretim,
3. Pasto o wod kansol mas raitim tokaut pas (referens) bilong laif na pasin bilong wok bung wantaim kominiti bilong dispela man o meri husait iaplai.

SSCF bai lukluk long man o meri husait imakim ol meri/mama na yut grup insait long wanwan eria bilong provins. Training bai kamap long tok pisin. Manmeri husait laik aplai iken raitim aplikesen leta na salim ol referens long tok pisin.


Salim aplikesen wantaim fi bilong training ikam long SSCF kwik. Training bai kamap long Februari 17 - 28 o inap long taim mipela makim 20 pela gutpela manmeri husait iaplai. SSCF bai bekim fi bilong training long ol manmeri husait iaplai taim inogat inap manmeri long kamapim dispela skul.

Greg English
SSCF Manager
P.O. Box 73, LAE
Ph/Fax: 479 1073

Wantok olgeta wik nem blong in kamap long

PHONE 479 2525 FAX 479 2527

Man Labu groim hailans kofi long nambis



JAMES KILA
i raltim

WANPELA man Labu klostu long Lae siti, Morobe provins i mekim planti lain guria stret bikos em i planim kofi bilong ol Hailans long nambis ples na kofi tu i kamap gut tru.

Nem bilong dispela man ya em Dominic Pangau na 1 hekta kofi gaden bilong em i stap klostu tasol long Yalu bris sapos yu ron olsem long Lae. Dispela man em wanpela man bilong wok hat tru na tu em i save laik kamap wantaim ol nupela kain tingting long soim ol manmeri klostu long em.

Dominic i planim tupela kofi bilong kol ples long Hailans. Ol dispela kofi em Arusha na Blu Maunten. Dispela tupela kofi i save gro gut tru long ol kol ples insait long hailans rijon.

Dominic em wanpela man bilong toktok stret. Sapos yu statim em long toktok, sori tumas em bai ino inap givim sans long yu stret. Em bai toktok i go i go inap yu bai senisim narapela toktok na en bai stop.

Dominic i bin mekim nambawan sels o salim kofi bilong em long yia 2000. Em i bin salim wanpela pasmen kofi beg tasol dispela taim na em i kisim K90. Long yia bihain long 2001 em i kamap wantaim tupela beg na em i kisim K60.

Wanpela sinia man bilong testim ol kofi, David Rumarumba i bin mekim ripot bihain long em i rostim na kukim kofi na sekim kwaliti bilong dispela kofi Dominic i bin bringim igo long Kofi Industri Kopresen (CIC) opis long Lae.

Insait long ripot Mista Rumarumba i mekim long hap beg kofi Dominic i bin karim igo long em long namba 5 de bilong mun Julai, 2001 i soim olsem pasman gret bilong kofi bilong

Dominic em klas 1.

Insait long ripot em i soim olsem kofi ya i kam long Yula viles insait long Makam eria we i stap samting olsem 25 kilomita autsait long Lae siti. ripot i soim tu olsem kofi ya i groa long ples i daun-bilo we mak bilong en em 200 mita na i stap long ples we i hot. Tasol bagaros ya i planin na kofi ya i karim gut. Em i tru olsem ol kofi seri i no bikipela tumas olsem kofi bilong hailans tasol kwaliti bilong kofi ya i gutpela tru bihain long CIC ekspot long Lae i bin sekap long en.

Laipstori bilong Dominic Pangau

Dominic em hapkas Yalu na Mengar viles klostu long Wewak taun long Is Sepik Provins. Em i marit na i gat 9-pela pikinini. Namba wan pikinini bilong Dominic em ol twins we mama i karim tupela wantaim. Dispela twins em Wesley na Prisilla. Krismas bilong dispela tupela pikinini em 20.

Dominic em wanpela man bilong toktok olsem na em yet i bin givim stori bilong em long olsem wanem tru na em i kamap olsem wanpela kofi groa long Yalu viles klostu long Lae.

"Pastaim tru mi bin wok olsem wanpela malaria kontrola wantaim Dipatmen bilong Helt. Na wok bilong mi save karim mi i go long planti ples insait long kantri na tu long Hailans bilong Morobe Provins."

"Bihain long dispela mi bin tingim wok bilong Bikipela na mi bin go long skul long wok Ewanjelis. Bihain long mi pinisim skul bilong mi, mi bin go na wok wantaim ol misin long Wewak. Mi bin stap long ples bilong mama bilong mi long Mengar klostu long Wewak" Dominic i tok.

Dominic i bin stap longpela taim long ples bilong mama long Wewak na bihain em i kambek long ples

bilong papa long Yalu long 1996. Em i stap long ples na bihain em i kisim wok olsem kofi baiya. Dispela wok bilong em i save karim em i go long ol eria insait long Morobe provins we em i save go na baim kofi.

"Man taim mi wok long baim kofi raun, mi bin guria tru olsem diwai kofi na seri bilong em i wok long givim gutpela mani tru long ol dispela kes krop. Mi bin harim tu olsem planti manmeri long hailans i senisim laipstail bilong ol long mani ol i kisim long wok kofi tasol."

"Dispela ol samting i kirapim tru bel bilong mi na mi tingting strong tru long stat planim kofi bilong mi yet.

"Em tru tumas olsem nogat wanpela didiman opisa o wokman bilong CIC i bin tokim mi long planim dispela ol kofi bilong hailans rijon. Tingting i kamap tasol long het bilong mi na gohet na planim ol kofi bilong mi," Dominic i tok.

"Taim mi planim pinis na painim tu ol seid diwai (ol diwai bilong givim ples kol long pikinini kofi) long pasim san nau orait mi askim ol CIC opisa long kam sekap long gaden bilong mi. Long dispela taim wanpela opisa Norm Sandari i bin kam sekap na mekim sampela ripot long gaden bilong em.

Dominic i stori tu olsem em i no bin putim fetelaisa o marasin long kofi gaden bilong em. Olgeta samting long gaden em ogenik tasol.

"Mi sanap strong long sait bilong ogenik kofi na mi no bin putim fetelaisa. Tasol mi ken tok olsem kofi bilong mi i kamap gut tru," Dominic i tok.

Em i bin planim tasol ol diwai olsem seid o karamap egens ol bikipela san na tu dispela i givim kol na ol kofi i stap hait na kamap gutpela tru.

Nau yet Dominic i tingting strong tru long surukim gaden bilong em i go bikipela na groim kofi long dispela hap eria bilong em.



• Dominic (raithan) na ol lain femili bilong em i wok hat tru long kofi gaden bilong ol.

ADVERTISING RATE NOTICE

WANTOK NIUSPEPA
Effective January 1, 2003 to December 31, 2003

Display Advertising Rates

Rate Level	Kina Spend	Column / cms	%Dis	Thurs
Casual			0%	K5.00
1	K8,360	2,000	5%	K4.75
2	K20,350	5,000	7.5%	K4.62
3	K29,700	7,500	10%	K4.50
4	K38,500	10,000	12.5%	K4.37
5	K56,100	15,000	15%	K4.25
6	K72,600	20,000	17.5%	K4.12
7	K88,000	25,000	20%	K4.00
8	102,300	30,000	22.5%	K3.87

COLOUR CHARGES:

One spot colour.....K200
Three colours.....K600
Two colours.....K400
FULL COLOUR..K800

STRIP ADVERTISEMENT:

Front Page.....N/A
Back page.....K440

INSERTS: Rates on application

CLASSIFIED ADVERTISING:

Thurs
Display K5.50 per classified col/cm
LineageK2.75 per Lines (min 2 lines)

NOTE:

1. All prices are subject to VAT
2. All agreement rates are based on a maximum 12 months commitment
3. All agreement rates are subject to written approval
4. Classified advertising column are double columns. This is reflected in the rates.

FOR MORE INFORMATION CONTACT
OUR ADVERTISING DEPARTMENT
PHONE: 325 2500 Or FAX: 3252579

Email: word @ global.net.pg

Yu laikim penpren long PNG o ovasis?

Salim nem, krismas, na ol samting yu save laikim i kam long: Wantok Niuspepa. P.O Box 1982, Boroko, NCD.

Bai yu amamas long lukim nem bilong yu kamap long Wantok olgeta wik.



P.O. Box 1982
Boroko, NCD
Phone: 325 2500

Wet T Siot na Sawa gels em nupela amamas bilong hotel

WILLIAM NATERA
i raitim

SAWA Gels na Wet T Siot resis insait long ol pati o disko haus long Mosbi i wok long kamap bikpela na planti lain i save laik go na lukim.

Dispela resis o pilai bilong Sawa Gels na Wet T Siot i narakain liklik long pasin bilong disko stret o ol arapela kain resis bilong pilai musik na danis.

Long pilai bilong Sawa Gels em ol yangpela meri i save waswas insait long wanpela glas haus na ol manmeri i bai sindaun na lukluk long meri ya i waswas insait long dispela glas haus.

Wet T Siot pilai em ol meri bai werim ol t siot na bai ol i kapsait wara antap long ol na yu ken lukim t siot i wet na pas long skin bilong meri. Na ol manmeri i ken lukim na skelim skin o bodi bilong husat meri i stap klia gut tru.

Dispela pilai i mekim sampela manmeri i no amamas na ol i toktok planti long dispela kain pasin. Sampela i tok dispela pilai i kirapim na pusim tingting bilong ol manmeri long pamuk. Tasol arapela i tok dispela em nupela pasin bilong developmen long tude.

Bos bilong Sensasip Bod, Sief Sensa Tibe Diweuya i tokaut olsem opis bilong em i bin kisim planti komplek na ol toktok egensim dispela pasin tasol i nogat wanpela lo i sapatim em long mekim wanpela samting long dispela kain pilai o resis.


Yumi ken autim tingting na bel hevi bilong yumi olsem ol pipel bilong dispela kantri tasol i nogat wanpela samting bai yumi mekim long dispela, Mista Diweuya i tok.

Sensasip Bod i save kari-maut lo bilong sekim ol piksa nogut, ol singsing nogut, ol buk nogut na ol arapela sain nogut we i soim skin o bodi bilong ol manmeri o ol manmeri i mekim pasin pamuk insait long piksa o buk na ol arapela sain nabaut o ol singsing nogut. Ol dispela samting i save kam aninit long lo bilong Censorship Act of 1989. Dispela lo i tambu long ol dispela samting.

Tasol ol meri i werim wet siot na soim skin bilong ol long fran insait long ol disko ples i no kam aninit long dispela tambu o lo. Tasol Sensasip Bod i ken kam insait long sekim ol sapos siot ol i werim i gat ol nem o tok nogut i stap long en.

Mista Diweuya i tok ol plisman i kisim ol dispela komplek pinis tasol ol tu i bungim wankain hevi long wok bilong ol bikos i nogat lo i tambuim dispela kain pasin. Tasol ol plisman bai holim na sasim husat meri i soim as na pispis bilong em taim ol i mekim dispela pilai bilong ol, em i tok.

Dispela wet siot pilai em susu bilong ol meri i save stap ples klia taim ol



waswas long wara na sanap long fran bai siot i pas long skin blong ol na susu bilong ol i stap klia insait long siot. Ol papa bilong ol dispela disko ples i strongim tok olsem dispela i no narakain long ol meri i save skin nating na singsing tumbuna na susu bilong ol i save stap ples klia.

Tasol Mista Diweuya i tok dispela i narakain liklik bikos as o mining bilong kamapiim dispela kain resis o pilai i narakain long singsing tumbuna. Pasin bai i wankain liklik we Sensasip Bod i save tambuim sampela samting ol long manmeri i no ken yusim taim ol i laik givim skul long seks edukesen.

Taim ol dokta i laik givim skul long ol manmeri long seks edukesen we em i vidio o piksa na piksa i soim skin bilong ol manmeri o ol manmeri i slip wantaim, dispela i no gutpela long ol manmeri i lukim. Tasol long sait bilong ol dokta na ol woklain bilong haus sik husat i laik givim skul bilong seks edukesen, dispela i gutpela long ol.

Long dispela as, ol kain samting olsem i sut long wanwan manmeri long wanem kain we o rot ol i kam long en long edukesen na save bilong ol. Sapos ol i bin save long kain samting olsem pinis na ol i strong long ol i ken kontrolim ol yet na husat arapela ol i no save harim o lukim kain piksa o samting olsem bipo we dispela inap mekim ol i sem o pret o skin kirap.

Dispela samting i hat long bai yumi skelim ol manmeri husat i ken lukim na hust i no ken lukim, Mista Diweuya i tok.

Tasol i luk olsem planti lain long siti i wok long amamas long lukim kain pilai olsem

long ol hotel na disko ples. Planti lain tu i save gat narapela tingting bilong ol yet long pasin bilong kirapim gutpela fri kantri na abrusim bikpela toktok olgeta pipel i save tok long PNG em i kristen kantri.

Het Bisop bilong Lutheran Sios long Papua Niugini Dokta Wesley Kigasung i bin toktok agensim dispela kain pasin na i askim long rausim dispela pasin long kantri.

Em i tok kain pasin olsem inap brukim famili na tu bagarapim wok bilong strongim pasin bilong seif seks o man na meri i slip wantaim bihainim gutpela na stretpela pasin stret.

Tasol sampela nius kampani i wok long sapatim na promotim dispela kain danis o pilai long ol hotel na sem taim tu ol i wok long sapatim seif seks, Dokta Kigasung i tok.

Bisop Kigasung i tok ating dispela em nupela pasin na stail ol manmeri i wok long lainim long kain pasin olsem. Na dispela i soim nupela senis ol manmeri i laik go long en bikos kain senis olsem i save kamap long olgeta narapela hap kantri long wol na ol i laik bihainim maski yumi i no inap long kontrolim wanem samting yumi i laik kisim nau.

Bisop Kigasung i askim ol lida bilong dispela kantri long sanap nau na glasm ol hevi o ol senis nau i wok long kamap insait long laip na pasin bilong ol manmeri na mekim disisen sapos dispela kain pilai o resis i mas stap yet o rausim.

Wantok i bin ringim ol hotel na ol nait klap we kain resis na danis i save kamap long en long kisim tingting na tok tok bilong ol tasol ol no bekim.



•Ol meri save danis skin nating tasol asipela em i narakain long Wet T Siot na Sawa Gels.

NATIONAL WEEKLY HIT PARADE

January 18, 2003 Sponsored by Twisties

Song	Artist	Last Week	This Week
Aiwara	Shydeez	2	1
Andoi	Irapfen	1	2
Mi Still Lovem lu	Sharzy	4	3
Pikinini Wass	Wass Kadoi	3	4
Gunan Na Varilam	Patti Doi	5	5
Furigasia	Abkrat	9	6
Tau Soa Nee	X-Vibes	6	7
Wass Medley	Wass Kadoi	7	8
Tokim Mi	Patti Doi	8	9
Ana Dahil	Irapfen	10	10
Mi No Marit	Wong/Bowman	0	11
Labour Of Love	Lista Laka	11	12
Island Girl	Memehusa	12	13
Korit	Kanaka	13	14
Jayjay Sih	Hausboi	14	15
Pata Varmari	Irapfen	15	16
Dipsy Queen	X-Vibes	0	17
Sepe	Quakes	16	18
Meri Goroka	M-Parap	17	19
Ways Blong Yu	P.S.3	18	20

in	Mi No Marit Dipsy Queen	JWong/SBowman X-Vibes
out	Barasi Daga Faol Pikinini	Patti Doi Bangsik


NAU FM Top 20

Sponsored by Twisties

1.	My Island Girl	Straky
2.	One Love	Blue
3.	Heaven	DJ Sammy & Yanou feat DO
4.	Asereje	Las Ketchup
5.	Unbreakable	Westlife
6.	Hey Ma'	Cam'ron feat Juelz Santana, Freesty & Toya
7.	We've Got Tonight	Ronan Keating feat Lulu
8.	The Zephyr Song	Red Hot Chillie Peppers
9.	Jenny On The Block	Jennifer Lopez
10.	Promise	Haus Boi
11.	I'm Right Here	Samantha Mumba
12.	Lose Yourself	Eminem
13.	One Last Breath	Creed
14.	Gangsta Lovin	Eve feat Alicia Keys
15.	Hey Sexy Lady	Shaggy feat Brian & Tony Gold
16.	Hot In Here	Nelly
17.	8 Mile	Eminem
18.	I'm Alive	Celine Dion
19.	No Matter What	Toya
20.	Labour Of Love	Lista Laka

Songs rated on requests and dedications from listeners through mail, email and faxes to NAUFM music programs.

Konambundu em tumbuna bilong tewel meri



BIPO, BIPO tru long ples Konambundu insait long Is Sepik provins i gat wanpela tewel meri save i stap. Long ples Konex i gat wanpela naispela yangpela manki tu save i stap. Long planti taim em save putim trap klostu long bikpela diwai na em save kisim planti mumut na kapul.

Wanpela bikmoning em kirap na em i laik sekim tep.

Taim em i go sekim trep bilong em klostu long bikpela diwai em lukim mama bilong kapul stret long trep bilong em. Taim em i laik kilim kapul stret, em i tanim i go long wanpela naispela yangpela meri. Meri ya kisim manki na tupela i go i stap long ples bilong em long bikpela diwai.

Tupela i go stap long bikpela diwai na ol lain bilong manki i painim em i go i kam long olgeta hap na ol ting olsem ol kilim em pinis. Na ol wokim kaikai long em.

Tupela i stap i go na meri ya i save stap wantaim em long diwai. Na meri i karim wanpela naispela pikinini meri. Ol i stap long diwai haus na man i save long olgeta kain stail bilong meri long senisim em yet long kainkain enimol. Nait ya, man i wokim plen long kisim pikinini na ronawe.

Em giamanim tewel meri i go long gaden long painim kaikai. Manki kisim liklik meri bilong em na tupela i ronawe i go long ples bilong papa.

Taim tupela i kam kamap long ples, ol lain bilong manki i wokim bikpela kaikai na singsing long kam bek bilong em. I no longtaim tulait moning na tewel meri i kamap stret long ples. Ol lain long ples i holim pasim em na rausim tewel meri bilong em. Na ol i kisim tru tru meri bilong em i kam na tupela marit stret na stap olgeta long ples bilong man, i no moa tingim ol lain bilong em long bus

na diwai. Nau ol lain tumbuna bilong tewel meri ol stap long ples. Ol save ol save olsem tumbuna meri bilong ol em diwai meri o tewel meri.

Jack Yangi
Wewak, Is Sepik provins.

MOLOLO TAIM



Nem: Ebenezer Aubyn
Krismas: 15 (man)
Adres: C/o Mrs Beatrice Mensan, Central Regional Hospital, P.O. Box CT 1363, Cape Coast, Ghana, West Africa.

Save laikim: Pilai futbol, pilai televisen gem, harim musik na raitim pas.

Nem: Mark Senny
Krismas: 18 (man)
Adres: Andrew Baing, Technical Training Centre, P.O. Box 1811, Markham District, Lae, Morobe Province.

Save laikim: Pilai soka, volibal, go long skul, raitim leta long pren, senisim presens i go i kam na mekim pen pren.

Nem: Kringet Tei
Krismas: 19 (man)
Adres: Kauvi Section, P.O. Box 605, Kimbe, West New Britain Province.

Save laikim: Mekim pen pren.

Nem: Elizabeth Eri
Krismas: 21 (meri)
Adres: P.O. Box 5863, Boroko, NCD, PNG.

Save laikim: Wok mani, raun long olgeta kantri.

Nem: Jeffery Tet
Krismas: 17 (man)
Adres: P.O. Box 22, Kimbe, West New Britain Province.

Save laikim: Mekim pen pren.

Nem: Pastor Wanpis Kawi Sandai
Krismas: 25 (man)
Adres: P.O. Box 1803, Mt Hagen, West Highlands Province.

Save laikim: Mekim pen pren

Nem: Naman Ignatius
Krismas: 18 (man)
Adres: P.O. Box 1500, Rabaul, East New Britain Province, PNG.

Save laikim: Harim musik, pilai ragbi, raitim pas na waswas long solwara.

Nem: Robin Sato
Krismas: 16 (man).
Adres: Mosa Plantation, Bedere Division One, P.O. Box Kimbe, West New Britain Province

Save laikim: Mekim pen pren.

Nem: Obert Awayam
Krismas: 19 (man)
Adres: Menyamya High School, P.O. Box 86, enyamyam, Morobe Province.

Save laikim: Pilai spots, wokim fani, go waswas, go danis, rit, tok stori, raitim pas.

Nem: Rose Lucas
Krismas: 18 (meri)
Adres: Sarakolok Settlement, Block No. 874, Kimbe, West New Briain Province.

Save laikim: Tok pilai wantaim ol poroman, harim musik, go waswas long solwara na raitim pas long ol poroman.

Nem: Aiso Prima
Krismas: 19 (man)
Adres: P.O. Box Division One 40, Kimbe, West New Britain Province.

Save laikim: Go lotu, pilai spots, wokim gaden, raun wantaim ol poroman, kirap long traipela biknait na i go long wok.

Nem: Geraldine Katsim
Krismas: 21 (meri)
Adres: Lontis Primary School, P.O. Box 211, Buka, Bougainville, North Solomon Province.

Save laikim: Bungim ol poromanmeri, pilai soka, ragbi tas na danis.

Hatwok lus, meri lusim mi

Dia Lalplain
TUPELA Krismas olgeta mi bin stap wantaim ol famili bilong prenmeri bilong mi. Mi wok na prenmeri bilong mi i stap yet long skul. Ol famili bilong em i amamas long save olsem bihain long prenmeri bilong mi i pinis skul long tupela krismas i kam, bai mitupela i marit.

Long dispela taim, mi traim long mekim famili bilong prenmeri i amamas. Mi save baim kaikai na givim ol mani. Mi bin traim long helpim peim skul fi long prenmeri long tupela yia em i stap long tisa tening kolis.

I no longpela taim i go pinis, sampela lain long skul i wokim sampela toktok long senisim tingting bilong meri ya. Olsem na em i raitim wanpela pas i km long mi na tokim mi olsem prensip bilong mitupela i pinis.

Bai mi stapim ol dispela

manmeri long bagarapim prensip bilong mipela olsem wanem? Bai mi raitim pas long papamam bilong meri o bai mi askim plis long traim helpim mi long kisim bek mani n ol arapela samting bilong mi?

WONDERING


Dia Pren

Mipela i luksave long hevi na wari yu stap long en. I nogat luksave olsem yu inap kisim ol plisman i kam insait long dispela samting bikos ol bai tokim yu olsem ol bi i no inap long wokim wanpela samting long wanem i nogat man i brukim wnpela lo. Bai ol plisman i go het na tokim yu olsem i nogat lo i sapotim yu long kisim bek ol samting we yu lusim o tromoim long prenmeri na famili bilong em. Tasol long bihainim pasim kastom, papmama na famili bilong prenmeri i ken traim long

bekim bek ol samting yu bin lusim long ol. Tasol long luksave long lo, ol dispela smting em ol i olsem presen yu bin givim long meri tim yutupela i poroman na yu no inap long kisim bek.

Ol lain husat i grisim prenmeri bilong yu em ating ol i sanap longwe tumas long yu. Olsem na em i hat long bungim o toktok wantaim ol. Sapos ol dispela lain i mekim tru pasin bilong bagarapim na brukim prensip bilong yutupela, dispela i no gutpela Tasol wanem samting yu toktok long mekim long dispela taim i no inap long helpim yu.

I gat luksave olsem yu mas traim long toktok wantaim prenmeri bilong yu o papamama bilong em sapos yu laik stretmidispela hevi. Sapos meri ya i kisim holid na em i go long ples long lukim papamama bilong em, inap yu tu i painim taim long go na lukim prenmeri ya na papamama wantaim long ples? Inap yu




LAIPLAIN

rait i go long papamama bilong em na askim watpo tru na pikinini meri bilong ol i laik brukim prensip bilong yutupela? Nogut papamama bilong em i no save long dispela tingting bilong meri ya. Long narapela sait tu, sapos yu laik lus tingting long meri na olgeta samting yu bin tromoim long em na ol famili bilong em, yu ken toktok long ol lidamn long ples. Yu ken askim ol lidaman long traim helpim yu long kisim bek ol samting, sapos kastom bilong yu i luksave long dispela pasin tu.

LAIPLAIN

Toksave:
Sapos yu gat hevi, rait i kam long dispela edres: LIFELINE, POBOX 6047, BOROKO, NCD. Yu ken ringim mipela tu long telipon namba 3260011. Taim yu rait, putim trupela nem na edres bilong yu bikos bai mipela i salim bekim long pas bilong yu. bai mipela i toktok long ol wari na hevi bilong yu tasol mipela i no inap long putimaut tru tru nem bilong yu. - Lalplain.



NAMBAWAN BULI BIF BILONG PNG STRETI!

pikinini tasol ol das long bus.

Matt Dedeboh Holeyah
Banz

Lapun Kanage putim huk long wara Opand i stap na lukim ol sampela meri i kam. Ol yangpela meri ya askm Kanage em wokim wanem. Lapun ya bekim long tok Inglis na tok. "I'm pisin." Taim ol meri harim dispela ol lap na dispela i mekim Kanage belhat. Em bikmaus na tok yupela ting mi lapun tasol enjin i wok yet ya." Tarangu meri bilong Kanage harim dispela tok na ronim Kanage wantaim stik tasol lapun ya das olsem palai bilong bus.

Matt Dedeboh Holeyah
Banz

Kanage em bilong Karutumua na poro bilong Kanage tu bilong Anitragen Kaiapit distrik. Wampela taim tupela i kisim buai na go antap long Mendi, Sauten Hailans provins. Kanage na poro bilong em i salim buai i go pinis na tupela painim PMV long go bek long ples long Makam. Poro bilong em i go na askim wampela haiwe draiwa na draiwa tokim tupela long kalap. Poro bilong Kanage i tokim draiwa yu wet liklik na mi ron go painim kaikai na dring bilong rot so poro bilong Kanage tekov i go long stua. Kanage sindaun wantaim draiwa tasol wampela long tingting i kisim Kanage na em i tokim draiwa poro ya i kalap pinis long kar yumi go. Draiwa tokim Kanage. Wantok kunai ya kam pinis. Kanage tokim draiwa poro ya sindaun pinis, i go tasol. Draiwa statim kar na tekov. Poro bilong Kanage i laik lukluk ya we kar i tekov lusim em nau. Poro bilong Kanage paul istap long Mendi taun .taim tromei han na singaut long draiwa. Tasol i no nap stret. Em nau poro bilong Kanage stat ron bihainim kar. Poro bilong Kanage i ron na em wok long tingting strong long rot bung bilong Tari na

Mendi we i gat sevis stesen tu i stap. Poro bilong Kanage i ron kam kiostu long rot bung na lukim kar ya i stop na kisim disel istap na poro bilong Kanage i tok olsem. Mi lusim tingting long yu na mipela i kam. Poro bilong Kanage i tokim Kanage noken tingting planti tumas, mi kam pinis. Kisim K1.00 na go bai PK na dring bilong yumi. Longpela rot na em Kanage i tekov i go long stua na draiwa i askim poro bilong Kanage. Wantok kunai i kam pinis? Poro bilong Kanage i tok, yes poro ya i kalap pinis yumi go. Drawa statim kar na tekov lusim Kanage. Kanage i ron kam ausait long stua na em i lukim olsem kar i tekov pinis. Em nau Kanage singautim poro bilong em long tokim draiwa bai stop tasol nogat. Poro bilong Kanage i singaut go bek na tokim Kanage bai ron bihainim kar na Kanage i ron kam bungim em long peles. Kanage ron bihainim kar na ston i katim lek bilong em, blut i kapsait, laplap i lus na Kanage i pasim long nek. Kanage ron karai wantaim na tok olsem. Yupala kisim wail man ya i kam na ron long hia. Poro bilong Kanage i save olsem Kanage i ron longpela hap na em tokim draiwa stopim kar na yumi wetim Kanage i kam. Draiwa wantaim poro bilong Kanage i wetim Kanage inap Kanage i kam kamap long ol. Kanage kam krosim poro bilong em. Mi wail man na yu mekim mi ron long rot? Poro bilong Kanage i tok na mi wail man na yu mekim olsem long mi? Bekim bekim. Mi ron liklik na yu ron liklik. Nogut long yu go stori long ples. Mi tu mas stori long ples. Draiwa i lap igo igo na draiwa i kaikai stia bilong kar. Poro bilong Kanage i tokim Kanage olsem. Kalap long kar na yumi go long ya. Kanage kros na sanap yet. Poro bilong Kanage tokim draiwa yumi go. Kanage tok long stap. Draiwa i statim kar na laik tekov nogat. Kanage tokim draiwa stop. Kanage kalap long kar na i no bin toktok liklik long poro bilong em inap ol i kamap long peles. Draiwa tokim tupela poroman ya, dispela

stori bilong yutupela bai i stap long lewa bilong mi olsem memori.

Geoffson Gaung
Lae

Kanage bilong Blu Maunten long Sigriles Banz yet. Em i bin gat wampela dok man nem bilong em Sibange Sibubokoe em wampela bikhet dok we i save kaikai man na tu autim ol narapela dok, pik, pikini. Bikhet i go na wampela Sande moning Kanage i bin kisim hap rop bilong pik na taitim Sibange long nek bilong em. Nau Kanage laik apim Sibange na karamapim tasol dok ya belhat na kalap kaikaim tupela mabol bilong kanage na em kisim stret. Kanage belhat na rausim kiau bilong em Sibange.

Matt Dedeboh Holeyah
Banz

Kanage em i bilong Koki ples long Sigriles Banz yet. Em save wok olsem sekyuriti wantaim Wrcarpenters kampani long Sigriles yet. Wampela moning taim Kanage kirap leit na hariap long go wok. Yu save kampani wok ya yu mas go na kam. Sem taim Junia Kanage nem bilong em Yaundo slip wantaim ol kopi long Warakar na sikisti kam long haus. Man, tupela papa pikinini kam long dua na baim na ol famili ting olsem graun i bruk tasol nogat ol i lukim Kanage pundaun na i dai i stap kwik wan tru ol kisim em igo long CLTC haus sik. Long CLTC em lukim dokta na askim em "What happened to me?" Tasol dokta i no save long sik bilong Kanage. Bihain ol famili stori long dokta na Kanage tok "Em i orait, dokta givim mi wanbel marasin na mitupela pikinini i kam wanbel." Man i nogat wanbel marasim ya ol sikmanmeri lap i dai.

Matt Dedeboh Holeyah
Banz



KANAGE WANTAIM PORO BILONG EM GO LONG MENDI TAUN NA SALIM BUAI LONG HAP...NAU BUAI PINIS NA OL I TINGTING LONG GO BEK LONG PLES BILONG OL LONG MARKAM LAE...



NAU TUPELA KALAP NA SINDAUN GUT TRU...PORO BILONG KANAGE I LAIK BAIM SAMPELA KAIKAI NA EM GO DAUN I GO LONG STUA... I NO LONG TAIM NA DRAIWA I SINGAUT LONG OL BAI TEK-OF NAU...



SAMTING TRU EM PORO BILONG KANAGE ISTAP. YET NA KANAGE EM MEKIM BIKPELA GIAMAN STRET LONG DRAIWA... NAU KAR I TEK -OFF..



TARANGU EM KISIM OL KAIKAI BILONG EM NA RON IGO BIHAINIM P.M.V. IGO LONG ROT...LAKI NA PMV I KAM STOP LONG SEVIS STESIN LONG HAP ROT...



EM STAP INSAIT YET LONG SEVIS STESIN NA DRAIWA ASKIM SAPOS OLGETA REDI LONG HITIM HAIWE...




PORO BILONG KANAGE I LUKLUK I KAMAUT LONG STUA NA LIKIM KAR EM KATIM KONA I GO LONG HAIWE NA EM SINGAUT...

PORO I NO HAMAMAS TRU LONG KANAGE...NAU EM TEN BILONG KANAGE LONG GO BAIM SIMUK LONG SEVIS STESIN..

PORO I SAVE KANAGE I STAP YET LONG SEVIS STESIN TASOL EM I NO BISI... EM BEKIM TRIK BILONG KANAGE...TAIM KANAGE I KAMAUT EM LUKIM DAS TASOL I PULAP AUTSAIT, KAR I LUS PINIS I GO LONG MARKAM HAIWE...

NAMBAWAN BULI BIF BILONG PNG STRETI!!



Larim Amukele mekim wok

Dia edita,
Mi wanpela manki bilong Saut Gimi long Okapa distrik long Goroka E.H.P. olsem na mi laik autim liklik wari bilong mi i go long olpela memba bilong Okapa Castan Maibawa. Yes Castan yu harim gut ol pipel bilong Okapa.

Mipela i les long votim yu olsem mipela i lukim yu insait long las 15 yia i nogat gutpela sevis na tu i nogat gutpela divelopmen i kam olsem na mipela i makim Tom Amukele i go long palamen olsem na nau em i laik stat long mekim wok bilong em.

Wanem as na yu laik daunim em long wok bilong em na yu wok long kotim em. Mipela ol pipel bilong Okapa i no amamas long dispela kain pasin yu mekim. Sia bilong Okapa em i no bilong yu tasol. Em bilong wanem man i ken resis long ileksen na kisim. Olsem na Tom Amukele em i winim long namba stret.

Plis Castan mi tokim yu stret i nogat sem bilong yu long kotim em. Nogut yu westim taim bilong yu o westim taim bilong em tu. Rausim dispela kot na larim Tom i go het na mekim wok

bilong em. Bikos Okapa pipel i no slip gut ol laik lukim wok bilong nupela memba olsem na ol driman stap long em na yu laik bagarapim em. Mipela pipel bilong Okapa i no amamas long yu olsem na mipela i autim long Wantok niuspepa.

Em taso na yu husat brata o susa yu lukim na laik sapotim o egensim yu welkam tasol long rarit i kam long Wantok niuspepa na mi bai amamas tasol long ridim.

Paul A South Gimi, Okakpa.

Ol Simbu i noken kago boi long arapela lain

Dia edita,
Yes, ol brata susa long Wantok Niuspepa inap yupela givim wanpela sans long mi long autim sampela wari bilong mi.

Ol brata na susa mi wanpela man Simbu mi save inap long Karanas sit long Sisiyak No. 3 long Simbu ples.

Yes, mi laik autim wari bilong

mi na tu ol narapela ol brata bilong mi i gat wankain tingting na wari we i no stret long bek bilong mipela olgeta lain Simbu manmeri insait long Madang.

Yes, mi raitim dispela pas long tok olsem mi bin kisim long em long ai na save bilong mi karim long em na lukim long em. Yes, ol brata bilong mi long Simbu mi

laik tokim yupela olsem mipela i no inap kamap kago boi bilong narapela provins.

Yes, mi harim dispela toktok na mi sem na yumi no sampela Simbu na mipela i bai go lusim en. Mipela i sapotim mipela yet.

Saimo Kumini Simbu, SP.

Surukim Kavieng hotel na klab long namel bilong taun

Dia edita,
Mi wanpela manki bilong Kaintiba insait long Galp provins nau mi stap hia long Kavieng. Mi laik autim tingting bilong mi i go long ol pipel long PNG na Kavieng yet i ken

lukim.

Tingting na wari bilong mi i go olsem, gavman i gat rait o nogat long ol bisniman sapos ol i laik putim bisnis bilong ol long graun bilong gavman.

Yes, yu gat rait, tasol yu mas lukluk gut na skelim gut long gutpela na nogut bilong ol manmeri.

Insait long PNG man na meri i no stap long wan kain laip, nogat. Yumi i gat kainkain kala na skin bilong bihainim laip God i givim yumi long en. Tasol God i no tok laip mi givim yupela i no bilong yusim long laik na tingting bilong yupela, nogat. Laip em i givim yumi em bilong yusim gut. Na olgeta

manmeri mas bihainim laik, tingting save na pasin narapela i gat long en.

Yes, ol PNG Gavman na Nu Ailan Gavman, nau mi laik tokim yupela olsem noken seksek long kisim takis long ol na makim long wansait long taun long opis na ol sios sanap long em mipela sampela i no laik haus bilong botol, na haus bilong as na lek i go krunget long klap na hotel i no ken i stap namel tru long taun bai manmeri ol manmeri we husat i no save long dispela kain pasin.

Mi toktok bikos insait long Kavieng taun namel tru long ol haus

olsem opis, soping senta, residens na haus lotu dispela tupela haus Kavieng hotel na klap i save nois long ol manmeri.

Nau mi laik tokim yu stret olsem, yu gat pawa bikos em graun bilong yu. Yu ken kisim pawa bilong yu long mekim Kavieng hotel na klap i go aut liklik long taun.

Wanpela gutpela hap we tupela i ken i go stap long en em long het bilong ples balus.

Ol dispela inap taun ken luk gut liklik bai yumi wokabout long en.

Tayla Bingeting kavieng, NIP.

Kabwum distrik i nogat gutpela rot

Dia edita,
Long Wantok Niuspepa long Fonde 24, Jenuri, 2002, mi ritim hap toktok we olpela memba bilong Kabwum, Ginson Saonu i bin mekim long Morobe Kalsa So.

Long dispela kalsa so, Mista Saonu i bin lukim ol rot bilong ka insait long Huon Galp ilektoret long Morobe, Salamaua na Garaina i no gutpela olsem na em i bin askim ol pipel bilong Huon Galp ilektoret long wokbung wantaim ol lida bilong ol long kamapim ol gutpela rot insait long distrik bilong ol.

Olsem wanpela pikinini Kabwum, mi sem na belhat nogut tru long dispela toktok bilong Mista Saonu. Ating yupela ol gutpela lain long arapela hap bilong Morobe na Papua Niugini i ritim dispela toktok bilong Mista Saonu na kisim tingting olsem ol rot insait long Kabwum distrik i gutpela na namba wan stret?

Mi sori long tokim yupela gutpela ol rida bilong Wantok Niuspepa olsem olgeta rot insait long Kabwum distrik stat long Wasu stesin i go olsem long Kabwum stesin na i go long Selepet, Komba na Timberia i bagarap nogut tru. Planti ol ka i bagarap na i no moa wok, na nau yet planti ol manmeri i hatwok tru long wokabout long ples olsem Indagen, Sabwag na Yalumet i go kamap long Wasu long kamap na i go long Lae na Madang.

Dispela kain giaman toktok bilong ol memba long mekim i luk gut long arapela em i no nupela pasin long mipela Kabwum. Mipela save lukim dispela pasin bipo na nau mipela i stap long bikipela pen na wari. Planti hap bilong Morobe provins na Papua Niugini i stap gut tru na turangu yumi Kabwum i stap wankain yet olsem ol tumbuna bilong yumi long bipo.

Taim bilong ileksen i kamap na yumi i bin senisim ol lida bilong yumi pastaim na yumi maki mnpela lida pinis long lukim sapos em bai kamapim ol dispela wari na hevi yumi save krai long en o nogat.

Nau nupela memba Bob Dadae i kamap na em i mas kamapim senis. Nogut em tu bai giaman yumi ol pipel bilong ples. Dispela em luk-save, sem na kros bilong mi olsem na mi kam aut long Wantok niuspepa

Amamas long nupela Obura Wonenara

Dia edita,
Mi wanpela manki Pangia insait long Sauten Hailans provins tasol nau mi i stap long Lae, Morobe provins.

Mi laik salim tok tenkyu na amamas i go long olgeta gutpela manmeri bilong Obura Wonenara ilektoret insait long Goroka, Isten Hailans provins long makim nupela People's Solidarity Party kendidet John

Koigiri.

Mi yet i no save long em tasol mi bin harim long redio na ritim long niuspepa olsem em i bin winim dispela sia.

Long makim maus bilong olgeta manmeri bilong Pangia, mi salim bikipela tok tenkyu i go long yupela ol pipel bilong Obura Wonenara ilektoret.

Yu mas mekim gutpela wok insait long haus tambaran na tu

long ilektoret bilong yu yet insait long 5-pela yia.

Sapos yu mekim olsem, ol pipel bilong yu bai amamas na tu mipela olgeta pipel bilong Papua Niugini.

Mipela bai tingim yu long bel bilong mipela ol pipel bilong Pangia distrik insait long Sauten Hailans provins.

Wayne JK. Pangia, MP.

Napo inap pinisim wok

Dia edita,
Mi wanpela manki Simbuluk long Buang, Morobe provins tasol nau na mi kam i stap long Morata (4) long Pot Mosbi.

Mi laik sapotim pas bilong brata Nalau Mabwawa i bin kamap long Me 16, 2002. Yes, brata Nalau mi lukim pas bilong yu na mi sapotim stret. Bikos planti ol mak bilong Samson Napo.

Wai em i bin kamapim long Bulolo pinis. Na em i orait pinis long em bai kamapim planti samting i kam bihain.

Sapos em i winim 2002 Nesenel lleksen. Olsem na brata Nalau mi laik sapotim yu na tokim olgeta manmeri long Bulolo ilektoret olsem.

Yumi olgeta i bin makim Samson Napo.

tasol em ino bin kisim mak o namba stret long taim bilong kaunim vot bihain long ileksen i bin pinis. Yumi makim nupela man pinis.

Bikos em i nupela man long palamen na em bai i no save long wanpela samting yet, ol manmeri yumi makim nupela man long Bulolo ilektoret em yumi yet nau? Nupela man em bai westim taim long kisim sevis i kam.

Long kamapim wanpela samting hariap na bai yumi tok baksait i go i kam long yumi yet olsem na maski yumi noken komplek bihain bikos yumi mekim asua pinis long 2002 Nesenel lleksen na em tasol.

Mikere Stepman Morata, Pom.

Spak brus hevi long Kimbe

Dia edita,
Mi laik autim wari bilong mi long niuspepa nau. Mi wanpela man bilong Namia Klap bilong Asaro, Goroka, EHP. Tasol nau mi kam stap long Kimbe, Wes Nu Briten provins long 1989 i kam inap 2001 na mi lukim Kimbe i go nogut olgeta.

Ol manki bilong nau i smokim mariwana na wokim planti stil pasin na repim ol meri. Ol sekta polis mas kam bek na wok em bai mipela ken na slip gut long banis na long haus.

Lukas Nime Kimbe, WNPB.

Maski kotim man long paitim meri bilong em

Dia edita,
Mi autim wari bilong mi i go long olgeta Plis Stesin long Papua Niugini na olgeta plisman na pablik long lukim.

Komplen olsem man paitim meri bilong en, maski long kotim em. Bikos man het bilong famili na sapos meri sakim tok man bai paitim em. Bikos em man bilong em paitim meri na i no gutpela long plis kotim man.

I tru i gat lo olsem man noken paitim meri tasol dispela lo mekim meri sakim tok bilong man bilong em. Na em bai pamuk wantaim narapela man na planti samting wok long kamap tude.

Olsem na maski kotim man long paitim meri bilong em. Sapos em bihainim na kotim man long paitim meri orait salim ol go bek long ples o komyuniti na bai ol stretim nau dispela taim meri kotim man bilong em. Dispela lo mekim marit i bruk na bagarapim gutpela marit na famili olgeta na rausim dispela lo bilong kotim man long paitim meri.

Billy T. Hari Ito Kimbe, WNPB.

Apim pe bilong ol woka

Dia edita,
Long Mande Epril 15, 2002 long 6 kilok apinun mi lukim EMTV Nius na Sir Mekere Morauta bin go visitim Pot Mosbi Jenerol Haus sik na em tokim ol wok manmeri long haus sik olsem.

Sapos em winim bek sia bilong em. Em bai apim pe bilong ol wok manmeri long haus sik man. Mi pilim fani stret na mi laik lap. Olsem na mi laik askim Sir Mekere Morauta nau olsem.

Taim ol tisa straik long pe bilong ol. Yu stap we hamas taim ol dokta na nes straik long pe. Yu no harim wari bilong ol. Ol dokta na nes save hatwok tru long sevim laip bilong mipela ol

pipel. Taim mipela sik na go long haus sik.

Na yu no stretim wari bilong ol. Na pe bikipela bilong mipela ol liklik wok manmeri tu. Yu stopim na pe bilong yupela ol memba yet apim klostu, klostu. Na taim bilong ileksen em nau yu pilai politiks raun long apim pe. Sori tumas mipela i no long bilong yu.

Na mi laik askim ol pipel bilong PNG olsem husat rongg memba pilai politiks raun long taim bilong kempen noken harim gris bikos las 5 yia ol i stap we.

John Gamb Kera Pot Mosbi, NCD.

Makim mausman tru

Dia edita,
Mi gat wanpela wari na belhevi bilong mi nau na mi laik kamap wantaim long Wantok Niuspepa.

Belhevi bilong mi i olsem stat long taim God bikipela i bin wokim graun na i kam inap nau, dispela 4-pela kaunsil Wod we 6,700 manmeri i stap insait long en i nogat wanpela gavman sevis i bin i go insait, nogat na nogat tru.

Taim bilong ileksen ol saveman i save giamanip mipela trangu lain na kisim nating vot.

Nau long 2007 ileksen mi laik tokaut klia olsem makim maus bilong Mereb Hopinja olsem mipela i no inap long tromoi vot bilong mipela long wanpela man. Mipela bai stap nating.

Sapos yu laik salim ol pas bilong yu i kam long Wantok niuspepa, salim i kam long dispela edres:

THE EDITOR, WANTOK NIUSPEPA P.O BOX 1982, BOROKO, NCD.

Nogat sevis long ilektoret

Dia edita,
Mi wanpela man mi save laik tru long ritim Wantok Niuspepa olgeta taim.

Mi save lukim planti komplek i kam long ol pipel long ol memba em tru mipela ol pipel i save westim taim makim yu i kamap memba bilong mipela tu God i makim yu tu long hevi na God i laik yu mas givim kaikai long ol sipsip bilong em na sapos yu no givim kaikai long ol pipel na yu wok long pulumapim poket bilong yu em bai yu gat tok wantaim God long las de.

Taim kam bek bilong Jisas Kraisa. Yes, mi lukim taim yumi kisim indipendens long 1975

na ol Australia ol i go bek long kantri bilong ol na yumi yet i sanap i kam inap nau. Ol lida i lus tingting tru long mipela ol pipel bilong em.

Mipela i stap insait long Lowa Watut mipela i hangere tru long sevis bilong Gavman olsem wanem yupela i lukluk long mipela o nogat.

Mipela o nogat mipela ol pipel i olsem Lasarus na yupela ol memba i olsem mani man nogut long las minit God bai singautim yu long dai bilong yu na bai yu gat kot long ai bilong God.

Sasa Nun Lowa Watut, MP.

Ngkrako Gundu Kabwum, MP.

Benson K. Luni Sisapipeso, Nipa.

Stopim kondom na lusim sik AIDS

Dia Edita,
Mi wampela oltaim rida bilong Wantok Niuspepa i laik autim liklik bel hevi bilong mi long dispela sik ol i kolim sik AIDS.

Belhevi bilong mi em i olsem: - Olgeta taim mi save harim long redio, lukim long niuspepa, lukim long notis bod, na lukim long EMTV.

Ol wok manmeri bilong Hausik, na ol Awenas manmeri i wok long toktok strong long stopim sik AIDS na setim awenas lain long go raun long Papua Niugini na toktok strong long stopim sik aids, na tokim ol olsem; Noken mekim nating nating wantaim narapela man o meri. Stap wantaim man o meri bilong yu tasol, long wanem dispela sik AIDS nogat marasin bilong em.

Taim mi harim o lukim, mi no save kisim bel isi stret. Na mi save les tru o harim ol i toktok long sik AIDS.

Orait bel hevi bilong mi em i olsem; - Inap Dairekta bilong Nesenel AIDS Kansol o ol man i go pas long wokim AIDS awenas kempen long Kantri sindaun na lukluk long ol arapela rot bilong stopim ol manmeri long slowim

pamuk pasin long kamapim. Dispela aik AIDS groa bikpela long Kantri o yupela yusim nating awenas mani bilong Nesenel AIDS awenas Kansol na paitim kundi nating nating long ol ai bilong ol pablik manmeri.

Sapos yupela ino save long sampela rot bilong stopim dispela Sik AIDS, Orait mi tokim yupela 3-pela rot bilong stopim sik AIDS em i olsem:-

1) Inap ol Nesenel AIDS awenas Kansol toktok strong long Stopim kampani i save wokim ol kondom long noken wokim kondom na salim long ol stua long olgeta hap long Papua Niugini. Wai mi tok olsem, bikos yupela tok noken kamapim Sik AIDS na sem taim tokim ol long yusim kondom i simpli min olsem yupela ken koap wantaim narapela man meri husat i save raun long rot na kamapim pamuk pasin. So ol manmeri i ting olsem i gat rot long ol i ken koap so ol i go ahead na pamuk na kamapim moa sik long Kantri bilong yumi Papua Niugini.

Sapos yupela stopim kondom, ol manmeri bai poret long sik AIDS na stap longwe long paul pasin, na stap wantaim wampela

patna tasol.

2) Taim ol AIDS keria i go long Hausik na yupela ol wokman i luk save olsem ol i gat sik AIDS, yupela i no save tokaut long ol na mipela grasrut ken luksave long ol na stap longwe long ol.

Tasol yupela haitim ol i stap na wok long toktok planti long Aids, na traim tingim, hau bai yumi save olsem ol igat dispela sik na yumi bai stap longwe long ol. Yupela i save toktok tasol na i no save tingim gutpela bilong em.

3) Inap Helt Dipatmen brukim sampela mani na baim wampela hap graun na wokim flets na lusim ol dispela AIDS kerias long dispela hap inap ol i painim dai bilong ol. Em tu wampela gutpela rot bilong stopim Aids long groa bikpela long Kantri.

Long lukluk bilong mi, yupela i no save sirias long helpim mipela grasruts tasol yupela i save paitim kundu nating long pablik na amamasim yupela yet.

Husat bai amamas long wok yupela mekim. Em tasol bel hevi bilong mi.

Jeff Luse
1st Boroko, NCD.

Rausim lek o han bilong ol bikhet man

Dia Edita,
Mi bilong Sauten Hailens Provins tasol nau stap long Oil Palm Provins, Kimbe, WNB. Yes, mi laik autim wari bilong mi long pablik niuspepa na olgeta manmeri ken lukim na skelim.

Wari bilong mi i go olsem. Ol narapela provins i orait tasol Sauten Hailens igo bagarap olgeta long lo na oda hevi olsem pait long bunara, spia, hensapim ol man meri long rot, stil, kilim man dai na planti arapela moa.

Stap long tumbuna i kam na nau istap yet na gavman i no mekim sampela samting yet long stopim dispela.

Yes, lo bilong gavman i stap bilong kotim man na bai em go kalabus. Tasol dispela gavman i no brukim win na sapot. Win na sapot em lek na han olsem na mi laikim gavman mas kamapim sampela lo bilong rausim lek o han bilong kamapim trabel. Plis yu husat brata ol susa ridim dispela yu skelim.

Man kilim man o meri dai, em i go kalabus. Tasol pinis kalabus na kam, em bai mekim trabel gen. Olsem na kamapim wampela lo bilong rausim lek o han bilong bikhet man.

Em tasol wari bilong mi na husat yu laik sapot o egensim mi, rait kam tasol long Wantok Niuspepa na bai mi lukim.

Billy T. Harilu
Kimbe, WNB.



Kimbe maket sekyuriti wantok sistem tumas

Dia Edita,
Mi yet bilong Wonenara lsten Hailans provins tasol nau mi i stap long Kimbe Wes Nu Brien provins. Na mi laik putim wampela pablik toktok bilong mi long yupela ol manmeri bilong Wes Nu Briten provins olsem long yia 2002.

Kimbe taun Atoriti ol i putim wampela lo olsem sapos ol manmeri tromoi

pipia o maketim ol buai smok ausait long ai bilong ol stua na opis bai ol sekyuriti holim na sasim fain long K20 olsem na dispela lo em nogat pawa nau na ol manmeri ol stat maket nau long taun eria nau. Dispela em namba wan tok bilong mi.

Na namba tu mi lukim em long Kimbe taun maket olsem yupela ol man yupela save raun raun insait long

haus maket. na long ausait long haus bilong talis we ol meri Talasia na Kimbe ol save maket long em bai yupela i go sanap long hap.

Na giaman lukluk long ol meri long bai ol i tromoi pipia bai yupela traim long sasim ol. Na kisim K20 long ol tasol na ol luksave pes na poroma na ol meri save salim ol buai long hap sait i go olsem bai ol tromoi skin

buai nabaut na kaikai buai na spet gut i stap na nogat man bai sasim ol.

Na mi yet mi save lukim em i no gutpela long ai bilong mi olsem na mi autim long pablik sapos yu laik sapot o egensim mi rait tasol long Wantok Niuspepa na mi ken lukim na save.

Bungi Kambel
Kimbe, WNB.

Glasim ol prais long stua

Dia Edita
Mi laik autim wampela bikpela wari tru.

Em long pundaun bilong Kina bilong yumi. Mi askim ol (PRICE)Prais Kontrola long lukluk gut long ol prais long olgeta samting long stua. Sampela kampani ol kisim strong long dispela asua bilong pundaun bilong kina na em sans bilong ol long apim prais bilong ol samting

long stoa. Sampela stua ol save apim ol prais long store bilong ol. Olsem na plis, ol lain husait i go pas long dispela wok yupela mas lukluk gut long prais long ol samting nau. Sapos yupela ino sekim gut ol prais long ol kaikai long stua na ol kampani praisim ol kaikai long laik long ol, bai ol kilim yumi nau.

Nau klostu long kris-

mas na kina i pundaun na mipela bai kisim bikpela taim tru nau. Long Februari na Maichong 2003, skul fi bilong ol pikinini na mipela i bagarap tru nau. Mipela olgeta manmeri long kantri mipela istap wantaim bikpela pret nau. Mipela laikim bai Praim Minista imas kam aut na toksave long mipela ol pipol bilong dispela kauntri nau.

Sapos Kina bilong yumi igo daun olgeta long jiro bai yumi mekim wanem?

Nogut wol benk ong planti man long ples ol ting, sapos strong bilong kina i pinis olgeta wol bank bai kisim grown bilong yumi na yumi bai i stap graun long ol.

Peter Toto
Pom, NCD.

Stretim wari long WNB

Dia Edita,
Watpo tru ol samting blong stua igo antap tru long Kimbe taun na olsem na gavman bilong West New Britain ino save glasim ol pipol bilong em olsem Morobe Gavman, Luther Wenge.

Em wokim wok gut tru ol pipol blong em na em i daunim olgeta samting long stua i kam daun pinis na olsem wanem long Kimbe istap yet long ten (10) pesen yet.

Em ino gutpela long dispela na

olgeta provins i wankain tasol na em i rong blong gavman blong Wes New Britain ino save long opim ai na lukluk long ol pipol bilong em. Na Gavana Clement Nakmai yu mas opim ai liklik na lukim ol pipol bilong yu na wanem kain hevi i stap long provins, yu Gavana mas stretim ol dispela hevi em wok bilong yu, Gavana stretim ol provins na ino ken slip nating .

Sonny Taken
Kimbe, WNB.

Noken daunim Kabwum long singsing Munge

Dia Edita
Mi wampela pikinini Kabwum, mi laik tromoi dispela liklik wari blong mi. Na ol brata na susa blong Finsafen blong wanem na ol bubu na papa blong yupela blingim TOK KOTE go long Kabwum eria. Mi tokim yupela,

Yupela laik stopim singsing Munge bilong yupela, Mi tokim singsing Munge ino olgeta Kabwum save singsing. Tupela ples tasol holim na pasim istap. Ino olgeta Kabwum. Bekim bilong Munge. Yupela Finsafen yupela lain tu. Lain bilong barapim

singsing Singe na Dage, Tupela singsing ino bilong yupela. Em tumbuna singsing bilong Kabwum stret, em tasol, yu laik bekim rait tasol kam na mi ken lukim.

Robin. Kem. Geto
Ving Kokopo, ENB.

Salim ol Kea senta i go bek long wanwan provins bilong ol

Dia Edita,
Mi Waira na mi laik kamapim sampela tingting long pablik na ol pablik ken lukim na sikelim. Hia long Kimbe, Wes Niu Briten provins mipela i stap long hevi bikos long maunten paia long Mt Pago.

Dispela hevi kamap na planti lain long Hoskins i stap nau long wanwan senta olsem Sarakolok, Napio, Kapore, Kapui na Buluma.

Ol dispela kea-senta mi lukim planti Waira pulap wantaim meri pikinini i stap. Inap gavman bilong Michael Somare na Gavman bilong Clement Nakmai ken stretim rot na salim ol wanwan i go bek long provins bilong ol. Planti marit na i gat planti pikinini.

Dispela kain inap kamapim hevi gen taim ol nogat kaikai na hangre. Olsem na mi putim aut dispela tingting long pablik.

Mi laik toktok olsem gavman mas givim hamas na stretim rot na salim ol go bek long provins bilong ol. Na gavman ken lukautim ol aspies. Em tasol tingting bilong mi.

Yu husat laik sapot o egensim, mi welkam tasol.

Billy T. Harilu
Kimbe, WNB.

Go bek wok kopra long ples

Dia Edita,
Mi wampela manki bilong ples mi kam i stap long Rabaul na tupela yia nau. Mi no hamamas long lukim ol lapun bilong Morobe, Madang na Sepik inap yupela go bek long ples na wok Kokoa, Kopra na Kopi.

Wok moni em taim yupela istap ianpela, nau em yupela go bek nau. Nogat yupela salim ol pikinini bilong yupela tasol go long ples yupela lapun papa yupela pulim ol

pikinini go long ples na soim graun na planim kokoa na kopra bilong ol. Kampani rausim yu. Noken raun olsem ol longlong man.

Go nau go long ples nogut yu dai na sotim wantok long baim kofin. Em tasol. Yu laik sapotim o agensim em laik bilong yu.

Robin. Kem. Geto
Vimy Kokopo, ENBP.

Lukautim gut ol tisa



SAPOS ol tisa i joinim bikipela straik bilong ol pablik sevis yunion long Januari 27, 2003, ol bai kisim taim long potnait pe na ol arapela alawens bilong ol. Dispela em strongpela tok lukaut i kam long Tising Sevis Komisin.

Olgeta tisa i mas go bek long skul bilong ol long Januari 27 na redi long statim skul yia long Februari 3, 2003. Dispela em de bilong olgeta skul bai stat.

Edukesen Minista Michael Laimo i mekim bikipela singaut i go long ol tisa long bihainim toktok na mekim ol samting isi long ol pikinini i ken statim gut skul bilong ol long dispela yia.

Tasol ol tisa em ol pablik sevans wokmanmeri na ol istap insait long yunion na ol i gat rait long sanap wantaim ol arapela na straik o nogat, em laik bilong ol. Tasol ol i mas tingting gut long wanem kain hevi ol bai bungim bikos ol bai mekim samting bihainim lo bilong Tising Sevis Regulesen (lo).

Minista Laimo i mekim strongpela singaut long ol tisa i harim tok na larim ol pikinini i skul gut long dispela yia na tu mekim isi long ol turangu papamama husat i wok long bungim bikipela hevi long mani bilong peim skul fi bilong ol pikinini long dispela taim.



Ol tisa i gat planti hevi tru olsem balus tiket i no kamap long ol long taim ol i pasim skul na tu ol alawens bilong ol i no kamap gut long ol na ol i save paitim dua bilong edukesen opis long wanwan provins blong ol olgeta taim. Tasol taim provinsal edukesen opis i tok ol i no kisim wanpela samting yet long Mosbi het kota, ol tisa i save go het na kisim balus na go long Mosbi long het kota long kisim wanem samting i bilong ol tasol het opis i no stretim ol longpela taim i kam. Dispela hevi i kamap olgeta yia we planti tisa i save lok long Mosbi na i no save go bek hariap long ol skul bilong ol.

Ol tisa i gat planti hevi na wari bilong ol na taim gavman ino save stretim hariap, ol i save kam pulap long het opis long stretim. Nau bikipela bodi bilong pablik sevis insait long kantri i laik holim straik egensim nesanel gavman, ol tisa tu istap insait long dispela bodi na ol inap mekim olsem long soim belhat na kros bilong ol long gavman i no save stretim wari bilong

ol gut.

Em i tru ol tisa i ken go long straik long wanem kain taim na de ol i laik mekim. Tasol turangu ol skul pikinini tasol bai kisim bikipela hevi tru long skul bilong ol bikos ol i no inap lainim wanpela samting gut long klasrum na tu ol papamama bai wari nogut tru bikos ol i wok hat tru long painim mani na bungim long peim skul fi tasol nau pikinini i no skul gut.

Ol tisa i mekim wok bilong sevim dispela kantri. Wankain olsem ol helt o ol haus sik woka. Olsem na gavman i mas oltaim sambai long harim wari na stretim hevi bilong ol hariap.

Yumi olgeta nau i kisim save na mekim wok long kampani o gavman na kamap lida bilong dispela kantri o kamap bisnismanmeri. Wanpela rot tasol yumi olgeta i kam long en long kamap long dispela mak yumi stap long en tude. Dispela rot em skul o edukesen. Na man o meri i mekim dispela edukesen i kamap na yumi kisim save na kamap em ol tisa tasol. Olsem na ol tisa em bikipela samting long gavman na yumi olgeta pipel bilong komyuniti i mas lukautim ol gut na was long ol i mas stap gut na mekim gut wok bilong ol long sevim komyuniti na kantri bilong yumi.



EM TV

16/01/2003

- 5.30 JOYCE MEYER
- 6.00 NINE'S EARLY MORNING NEWS
- 7.00 TODAY SHOW
- 9.00 MALOLO CLUB
- 11.00 CREFFLO DOLLAR
- 11.30***CLASSIFIEDS***
- 2.30 SESAME STREET
- 3.30 FLINTSTONES
- 4.00 BUSH BEAT
- 4.30 DOWNLOAD
- 4.57 EMTV TOKSAVE
- 5.00 CATCH PHRASE
- 5.29 NEWS BREAK
- 5.30 HAPPY DAYS
- 6.00 NATIONAL EMTV NEWS

- 6.00 NATIONAL EMTV NEWS
- 6.30 AUSTRALIA VS ENGLAND
-CONTINUES.....
- 9.00 SUNDAY NIGHT MOVIE: PETER GUNN
- 10.22CHIT CHAT
- 10.27EMTV TOKSAVE
- 10.30NATIONAL EMTV NEWS REPLAY
- 11.00CHURCHES MAGAZINE
- 11.30 PRAISE
- 12.30***CLASSIFIEDS***

20/01/2003

- 6.30 A CURRENT AFFAIR
- 6.59 NEWS UPDATE
- 7.00 LOTTO DRAW
- 7.01 CHM SUPERSOUND
- 8.00 TOK PIKSA
- 8.27 EMTV TOKSAVE
- 8.30 THIRD WATCH
- 9.30 LAW OF THE LAND
- 10.30EMTV NEWS REPLAY
- 11.00SPIN CITY
- 11.30 INVASION AMERICA
- 12.00NIGHTLINE
- 12.30***CLASSIFIEDS***

- 5.30 JOYCE MEYER MINISTRY
- 6.00 NINE'S EARLY MORNING NEWS
- 7.00 TODAY SHOW
- 9.00 MALOLO CLUB
- 11.00 CREFFLO A. DOLLAR
- 11.30***CLASSIFIEDS***
- 2.30 SESAME STREET
- 3.30 BETLE JUICE
- 4.00 WONDER WORLD
- 4.30 DOWNLOAD
- 4.57 EMTV TOKSAVE
- 5.00 CATCH PHRASE
- 5.29 NEWS BREAK
- 5.30 HAPPY DAYS
- 6.00 NATIONAL EMTV NEWS

17/01/2003

- 5.30 JOYCE MEYER MINISTRY
- 6.00 NINE'S EARLY MORNING NEWS
- 7.00 TODAY SHOW
- 9.00 MALOLO CLUB
- 11.00 CREFFLO A. DOLLAR
- 11.30***CLASSIFIEDS***
- 1.00 ONE DAY SERIES - ENGLAND VS SRI LANKA
- 5.00 FLINTSTONES
- 5.30 DOWNLOAD
- 6.00 NATIONAL EMTV NEWS
- 6.30 A CURRENT AFFAIR
- 7.00 ENGLAND VS SRI LANKA
-CONTINUES.....
- 10.30EMTV NEWS REPLAY
- 11.00TULAIT

- 6.30 A CURRENT AFFAIR
- 6.59 NEWS UPDATE
- 7.00 LOTTO DRAW
- 7.01 PRAISE
- 7.57 EMTV TOKSAVE
- 8.00 AUSTRALIA'S FUNNIEST HOME VIDEO SHOW SPECIAL
- 9.00 THIS IS YOUR LIFE
- 10.00CHANGING ROOMS
- 10.30EMTV NEWS REPLAY
- 11.00CHM SUPERSOUND
- 12.00NIGHTLINE
- 12.30***CLASSIFIEDS***

18/01/2003

- 8.00 PLANET FANTA Great new kids show - featuring the classic action series. Thunderbirds, and cartoon entertainment with Looney Tunes
- 9.30 LOCATION LOCATION
- 10.00HI-5
- 10.30GYM JAM CLUB
- 11.00PINKY & THE BRAIN
- 11.30 CHALLENGER
- 12.00THE EDGE
- 12.30UK TODAY
- 1.00 CONTACT
- 1.30 THE AMATEUR NATURALIST
- 2.00 ANIMAL HOSPITAL
- 3.00 AMAZING HOMES
- 3.30 BACKYARD BLITZ
- 4.00 BURKE'S BACKYARD
- 5.00 FISHING WILD AUSTRALIA
- 5.30 LEISURE WORLD
- 6.00 NATIONAL EMTV NEWS
- 6.30 CITY HALL
- 7.00 SURVIVOR THAILAND
- 8.00 SOUTH PACIFIC MUSIC
- 8.27 EMTV TOKSAVE
- 9.00 MOTORWAY PATROL
- 9.30 ER
- 10.30NATIONAL EMTV NEWS REPLAY
- 11.00TULAIT

- 7.00 TODAY SHOW
- 9.00 MALOLO CLUB
- 11.00 CREFFLO A. DOLLAR
- 11.30***CLASSIFIEDS***
- 1.00 ONE DAY SERIES - AUSTRALIA VS SRI LANKA
- 5.00 BETLE JUICE
- 5.30 DOWN LOAD
- 6.00 NATIONAL EMTV NEWS
- 6.30 A CURRENT AFFAIR
- 6.58 NEWS UPDATE
- 6.59 LOTTO DRAW
- 7.00 AUSTRALIA VS SRI LANKA
-CONTINUES.....
- 9.00 YOUNG LIONS
- 10.00STINGERS
- 11.00EMTV NEWS REPLAY
- 11.30FARSCAPE
- 12.30***CLASSIFIEDS***

22/01/2003

19/01/2003

- 6.22 CHIT CHAT
- 6.27 EMTV TOKSAVE
- 6.30 TIM HALL MINISTRY
- 7.00 THE TECHING MINISTRY OF CHARLES STANLEY: IN TOUCH
- 7.30 IT IS WRITTEN
- 8.00 WORLD IMPACT
- 8.30 THE PACIFIC WAY
- 9.30 TOYOTA WORLD OF WILDLIFE
- 10.00THE COLD WAR
- 11.00SIGNS OF THE TIMES
- 12.00CONTACT
- 12.30TODAY'S LIVING
- 1.00 ONE DAY SERIES - AUSTRALIA VS ENGLAND
- 5.00 BURKE'S BACKYARD

- 5.30 JOYCE MEYER MINISTRY
- 6.00 NINE'S EARLY MORNING NEWS
- 7.00 TODAY SHOW
- 9.00 MALOLO CLUB
- 11.00 CREFFLO DOLLAR
- 11.30***CLASSIFIEDS***
- 2.30 SESAME STREET
- 3.30 FLINTSTONES
- 4.00 WONDER WORLD
- 4.30 DOWNLOAD
- 4.57 EMTV TOKSAVE
- 5.00 CATCH PHRASE
- 5.29 NEWS BREAK
- 5.30 HAPPY DAYS
- 6.00 NATIONAL EMTV NEWS
- 6.30 A CURRENT AFFAIR
- 6.59 NEWS UPDATE
- 7.00 LOTTO DRAW
- 7.01 TOYOTA WORLD OF WILDLIFE SPECIAL
- 7.30 DOCUMENTARY: SHARK TRACKER
- 8.27 EMTV TOKSAVE
- 8.30 WEDNESDAY NIGHT MOVIE: INNOCENT VICTIMS
- 10.30EMTV NEWS REPLAY
- 11.00SOUTH PACIFIC MUSIC
- 12.00NIGHTLINE
- 12.30***CLASSIFIEDS***



Hepi 1st Betdei
BUFFY GUYAMBA
PALMELA NABO
Yu winim 23 yias
long laip bilong yu
long 9th Desemba
2002!
Bondei Gritings i
kam long families
bilong Tenth City
Dirty 8 (Lae) na
Swit Finch.

Wishing yu a happy Bondei na

God Blessim Yu!

TOKSORI

Ol menesmen na wokmanmeri bilong
Word Publishing Co Ltd i salim toksori na belsori i
go long

His Grace The ANGLICAN ARCHBISHOP
bilong Papua Niugini bikipela REV. ARCHBISHOP
JAMES AYONG na Famili long indai bilong meri
na mama bilong ol

MRS GAWALI AYONG

Husat i dai long Wednesday, Januari 1. 2003 long
ples Kumbun long West Niu Briten Provins.

Jeremy Burgess
General Manager

Ol Spot Dro

Toksave

WANTOK NIUSPEPA i laikim ol part-time niusman long salim nius na poto bilong sofbol stori i kam long bikpela senta olsem Mt Hagen, Lae, Goroka, Madang, Wewak na Wes Nu Briten. Sapos yu ting olsem yu ken helpim Wantok Nius long dispela wok, plis ring na toksave long Spot Edita long dispela telefon namba 325 2500 o fex long 325 2579. Nogat yu rait long dispela adres: Spots Edita, Wantok Niuspepa, P.O. Box 1983, Boroko, NCD. Email adres em: word@global.net.pg: Attention: HENRY MORABANG.

PORT MORESBY WOMEN'S SOFBALL ASSOCIATION 2002-2003 SEASON DRAW

Round 1 Week 9

Saturday 16th January, 2003

DIAMOND THREE

- 10.30 am A Norths vs Admiralty
- 12.00 am A AB Bears vs Dolphins
- 13.30 pm A All Star vs SP
- 15.00 pm A Gazelle vs Chebu

Bye: Wantoks

All Other grades matches will resume on 25.01.2003

NCD PUBLIC SERVANTS SOCCER ASSOCIATION DRAW

Saturday January 18, 2003

BISINI ONE - Pool TWO

- 0800 Air Niugini vs BPNG (m)
- 0930 Air Niugini vs BPNG (w)
- 1100 ** Cellnet vs Works (G3) (w)
- 1230 ** Cellnet vs Works (G3) (m)
- 1400 Lands/PP vs Transport (w)
- 1530 Lands/PP vs Transport (m)

BISINI TWO - Pool ONE

- 0800 RPNGC vs Mining (m)
- 0930 RPNGC vs Mining (w)
- 1100 NJSS vs Pangtel (w)

- 1230 NJSS vs Pangtel (m)
- 1400 A/General vs CAA (w)
- 1530 A/General vs CAA (m)

SUNDAY January 19, 2003

BISINI ONE - Pool Two

- 0800 Prime Minister/NEC vs Works (m)
- 0930 Prime Minister/NEC vs Works (w)
- 1100 Finance/Planning vs Air Niugini (w)
- 1230 Finance/Planning vs Air Niugini (m)
- 1400 * BPNG vs Education (G9) (m)
- 1530 SSD McGregor vs Telikom (m)

BISINI TWO - Pool One

- 0800 ** PNG Power vs CAA (G4) (m)
- 0930 ** PNG Power vs CAA (G4) (w)
- 1100 IRC vs Forestry (w)
- 1230 IRC vs Forestry (m)
- 1400 ** RPNGC vs NJSS (G9) (w)
- 1530 ** RPNGC vs NJSS (G9) (m)

Bye: DM, NFA - Pool One

National Parliament, SSD McGregor, Education (women) - Pool Two

LAE PUBLIC SERVANTS SOCCER COMPETITION

Saturday, January 18, 2003

Competition Draw - Round Five
GROUND ONE

- 0900 Fire Kundu FM 105 vs Works (w)
- 1030 Morobe PHQ vs Police (2) (w)
- 1145 Morobe PHQ vs Police (2) (w)
- 1300 Huon vs PNG Unitech (w)
- 1420 LCC vs Water Board (m)
- 1530 Huon vs PNG Unitech (m)

GROUND TWO

- 1420 Fire Kundu FM 105 vs Works (m)
- 1530 Morobe PHQ vs Police (2) (m)

Sunday, January 19, 2003

GROUND ONE

- 0900 IRC vs Treasury (w)
- 1030 CIS vs Governors Office (w)
- 1145 Health vs Telikom PNG (w)
- 1300 Justice vs Police 1 (w)
- 1420 CIS vs Governors Office (m)
- 1530 Justice vs Police 1 (m)

GROUND TWO

- 1420 IRC vs Treasury (m)
 - 1530 Health vs Telikom PNG (m)
- Game Played: Diwai vs Huon District 2 (m), NARI vs PNG Power (m/w) Bye: Pangtel, OC Lands (m/w).

FILIPINO BASKETBALL ASSOCIATION

Sunday, January 19, 2003

Don Bosco Technology Institute

- 1300 CBL Under 18 vs PNG Masters
- 1400 Clean Master Pro Guard vs J&E Electrical
- 1500 Interfec Megavolts vs Patrick's Transport
- 1600 CHM Super Sound vs Stallions

* Stallion yet to officially advice executive committee of their withdrawal from FILBA.

POINTS LADDER: J&E Electrical 14, CHM Super Sound 8, Clean Masters Pro Guard 8, Interfec Megavolts 8, CBL Under 18, Patrick's Transport 4, Stallion 4, PNG Masters 4

MVP STATISTICS: Noel Delumen 165, Baxter Travertz 157, Willie Raymundo 139, Garry Lubrido 137, Charles Parapa 127, Andrew Santos 108, Lito Bayaton 102, Riffal Jukuy 89, Mac Laurel 85 and Rey Liwanag 84

OKKAINHENS SPORTS ASSOCIATION

January 19, 2003

Hohola Sports Oval - B GRADE

- 0700 Kanage Spiders vs Kay Heroes
- 0730 GH Eagles vs Negifi Bears
- 0800 BP Knights vs KT Maroons Harks
- 0830 JV Bulldogs vs Hohola Magpies
- 0900 Yamaso Raiders vs Kaiyo Storms
- 0930 Linupa Panthers vs Usu United
- 1000 Waribi Brothers vs Morata Harks

- 1100 Kanage Spiders vs Kay Heroes
- 1230 GH Eagles vs Negifi Bears
- 1300 BP Knights vs KT Maroons
- 1430 JV Bulldogs vs Hohola Magpies
- 1500 Yamaso Raiders vs Kaiyo Storms
- 1630 Linupa Panthers vs Usu United
- 1700 Waribi Brothers vs Morata Harks

GORDON TOUCH RUGBY

Saturday, January 18, 2003

Time	Fixtures	Referee
C GRADE		
0800	KB Eels vs Moskitos	Knights
0830	Knights vs Sharks	Moskitos
0900	Brothers vs Eagles	Sharks
0930	Rabbitohs vs Rangers	Eagles

B GRADE

1000	Tribes vs Roosters	Rabbitohs
1040	Brothers vs Eagles	Roosters
1140	Panthers vs Warriors	Eagles
1240	KB Eels vs Moskitos	Panthers
1340	Magpies vs Steamrollers	KB Eels
1440	Steelers vs Hanua	Warriors
1540	Bala vs Tigers	Steelers

A GRADE

1640	Brothers vs Eagles	Bala
1740	Tribes vs Roosters	Hanua

Sunday, January 19, 2003

C GRADE

0800	Magpies vs Steamrollers	KB Eels
0830	Rabbitohs vs Rangers	Tribes
0900	Roosters vs Tribes	Rangers
0930	Tigers vs Bala	Steamrollers

B GRADE

1000	Sharks vs Knights	Magpies
------	-------------------	---------

A GRADE

1040	Steelers vs Hanua	Knights
1140	Panthers vs Warriors	Bala
1240	Steamrollers vs Magpies	Warriors
1340	KB Eels vs Moskitos	Sharks
1440	Rabbitohs vs Rangers	Tribes
1540	Tigers vs Bala	KB Eels
1640	Sharks vs Knights	Hanua

MONDAY January 6, 2003

1530	C Grade	Steelers vs Hanua
1630	C Grade	Panthers vs Warriors

HOHOLA BASKETBALL ASSOCIATION

Thursday January 16, 2003

(OFF-SEASON) - Hohola Sports Oval
4.30pm Bay Watch vs Figgy (women)
5.00pm Bay Watch vs Figgy (men)


Friday January 17, 2003

4.30pm Erima vs Kamarere (women)
5.00pm Erima vs Kamarere (men)

Saturday January 18, 2003

1000am	Beech Rollers vs Figgy (women)
1030am	Beech Rollers vs Figgy (men)
1100am	Darks vs Cedar (women)
1130am	Darks vs Cedar (men)
1200 noon	Erima vs Paradise (women)
1230pm	Erima vs Paradise (men)
1300pm	Zerupi vs Kamarere (women)
1330pm	Zerupi vs Kamarere (men)
1400pm	Bay Watch vs Figgy (women)
1430pm	Bay Watch vs Figgy (men)

Nupela resis bai kamap klostu!!




RUL BILONG PILAI:


1. Makim X long boks long poto yu ting bai i stap
2. Makim X long pen tasol
3. Katim poto long sisos na salim long: PAINIM BAL RESIS NAMBIA 7, Wantok Niuspepa, P.O. Box 1982, Boroko, NCD.
4. Nambawan entri i makim stretpela hap bai i stap, em bai win.
5. Las de bilong kisim ol entri em pinis bilong olgeta mun.
6. Long Wantok bilong Septemba 6, bai gat nupela K100 prais mani resis. Bai gat resis bilong olgeta mun i go inap mun Desemba, 2003.
7. Disisen bilong komiti i makim wanpela wina em i fainel.
8. Wina bai kisim sek mani, na i no long kes.
9. Sapos nogat wina bai skruim win moni i go antap long nara-pela resis.
10. Yu ken salim moa long wanpela entri, tasol noken yusim poto kopi.
11. Ol wokman meri na pikinini bilong Wantok niuspepa i no inap stap long dispela resis.

Raitim nem na adres bilong yu: Nem.....Address.....

Krismas.....




• Manalos i salim bros. Kain presa i kisim pilaia bilong Manalos na i slaid. Sori tumas Manalos i lus 3-2.




• Ol yangpela bilong Brothers na Hohola Magpies i skelim strong long Okkailen ragbi lig. Tupela tim i dro 0-0.




• Straika bilong Trensport i laik straikim bal egensim ol BPNG long NCD Pablik Sevan Soka resis. Tupela tim i dro 0-0.



• (lephan) Pilaia bilong Manalos (12) i aut long namba tri bes taim ol i bungim Northern Hawks long Pot Mosbi mens sofbal. Hawks win 3-2.



• Air Niugini pilaia i painim rot long difens bilong Harlequin insait long Pot Mosbi ragbi seven kompetisen las Sande. (raithan) Sarah Guyu bilong NJSS i laik stapim birra bilong em, Attorney General long NCD Pablik Seven wimen soka. Ol NJSS win 2-0.





Sengero i winim sapot bilong Morobe

... tasol em i no save husat tru i stap wantaim em

HENRY MORABANG
i raitim

WANPELA kendidet bilong PNG Futbol Asosiesen (PNGFA) presiden i wok long kisim moa sapot nau long helpim em i winim namba wan sia bilong soka insait long kantri long taim bilong jenerel ileksen.

Olpela administreta bilong Morobe, Aine Sengero na tu wanpela lapun bilong Lae Futbol Asosiesen (LFA) i bilip olsem em i gat sapot bilong 9-pela distrik insait long Morobe long winim sia bilong presiden.

Mista Sengero i mekim dispela toktok bihainim wanpela ripot we soim Morobe i bruk long sapot namel long em yet na namba tu presiden bilong PNGFA Seth Daniels.

Dispela ripot bilong brukim

sapot i kamap taim presiden bilong LFA John Peka i tokaut long *Wantok Nius* olsem asosiesen bilong em, LFA bai sanap sapotim David Cheung bilong Hailens.

Mista Peka i tok olsem em bai singautim wanpela miting long Januari 18 long dispela wik long painimaut husat Morobe senta bai sapotim David Cheung na husat bai sapotim Sengero.

Presiden bilong LFA i tok olsem em yet bai sapotim David em i laik save husat ol soka asosiesen olsem Kaiapit, Lahi, Bulolo, Wau, Nadzab, Boana, Wantoat, Finshafen na Gaifar.

Em i askim olgeta presiden na mausman long kamap long miting.

Nau yet *Wantok Niuspepa* i save olsem Gavana bilong Morobe Luther Wenge i sapotim Mista Sengero.

Mista Sengero i tokaut olsem em i strong long LFA presiden long mekim wok long sapotim em. Tasol insait long miting long dispela wik (Januari 18), Mista Sengero bai rausim Mista Peka na makim ol nupela lain long helpim em.

Dispela ripot bilong Peka las wik i mekim Mista Sengero i wari tru olsem sapos ol Morobe i stap baksait long em long dispela resis o nogat.

Wantok Nius i painim aut tu olsem Sengero i laik bung wantaim Cheung long em i mas kamap vais presiden na em yet i kamap olsem presiden bilong LFA.

Sengero i tokaut olsem em i laik kisim wok presiden bikos Morobe em i bik provins bilong soka. Olsem em i laik wanpela asples man yet i mas kisim dispela wok olsem presiden.

NBPOL i no inap sapotim wanpela grup

WANPELA strongpela soka asosiesen insait long Niugini Ailan, Nu Briten Palm Oil (NBPOL) Soka Asosiesen bai i no inap joinim ol arapela asosiesen long kempen long PNGFA jenerel miting.

Presiden bilong NBPOLSA John Raka i tok olsem asosiesen bilong em bai stap isi tasol inap AGM i kamap. Ol lain NGI bai strong yet long resolusen we ol i pasim long 2001 jenerel miting i kamap long Lae.

"Mipela i laik lukim soka i gro, na dispela i mas kamap long olgeta kona bilong Papua Niugini na i no bilong Pot Mosbi na Lae tasol.

"Niugini Ailan i kisim bikpela mekim

save pinis long kain gridi pasin bilong ol eksekutiv na i laik lukim soka i mas go long olgeta hap long rurel area. Ol rurel asosiesen olsem Higaturu, Bel (Madang), Bogenvil na Manus i no kisim wanpela helpim i kam long PNGFA taim ol i kamap memba," Raka i tok.

"Ol lain i bin yusim NGI bloc olsem raba stem long kisim sapot na taim ol i kamap ol i ting lus long NGI. Mipela bai i no inap bihain wanpela man o grup. Kain pasin ya i mas stap nau," presiden Raka i autim hevi bilong em.

NBPOL i askim olgeta memba senta long vot long man i gat save o kontek wantaim ol bikman insait long soka long Osenia na FIFA.

Fainels i kamap klostu

TUPELA biknem soka pilaia, Robert Popat na John Davani i kamap soim stail wantaim ol yangpela bilong NJSS soka tim long NCD Pablik Sevans soka resis las wik Sande.

Popat, em wanpela top golkipa bilong PNG bipo. Man han bilong em i olsem urita na save holim planti ol bal bilong Yunivesiti na Sunam.

Davani em wanpela midfilda na em i gat nem long Solomon Ailan. Ol lain i save bihainim soka stori i ken tokim yupela ol rita.

Tupela bikman ya i kisim gutpela sapot tru long ol pilaia olsem Jonah Malus, Ben Lakasa na Batman Furigi long lukim NJSS i win 3-2. Na long gem bilong ol meri, ol NJSS i win 2-0.

Jas Kathy Davani i go pas long dispela tim long helpim em i stap fit taim em i sindaun long harim kot. Em i kisim gutpela sapot i kam long Serah Guyu na tu planti ol pilaia bilong Rapatona wimen's tim.

Tasol bikpela askim nau-em NJSS i stretim pinis pilaia registresen

o nogat. Na long Bisini Two, National Parliament i soim tru olsem ol i laik winim taitel taim ol i stapim Air Niugini long noken flai. Ol i bagarapim tru ol ensin bilong balus na win 3-1.

Air Niugini i no lus liklik na em i namba wan taim bilong ol long lus.

Ol lain bilong Prime Minister i bekim dinau bilong dro egensim Fainens long nekim stret ol brata long Telikom 2-0.

Long Sarere, Prime Minister i dro tasol long Sande ol i win.



Papua New Guinea Football (Soccer) Association Inc. (Member of FIFA/ Member of OFC)

DISPELA NOTIS IGO LONG OLGETA PNGFA AFILIETS NA OL LAIN I LAIK AFILIET LONG ASOSIESEN

Sekretariat i welkamim ol afiliets bilong em long 2003 Soka Sisen. Long wok rere, Sekretariat i toktok strong long ol dispela samting i mas kisim gutpela luksave na wok bihainim i kam long ol memba na ol intendidng aplikens Asosiesen aninit long PNGFA Konstitusen :

Aninit long Rul 5 (Membasip na Membasip Aplikesen) olgeta Memba (Ol Asosiesen we i rejista long las ya) i no ken aplai long membasip. Tasol long wokim na bihainim stret Konstitusen na tu long stretim ol recod long Sekretariat Ofis, ol Memba i mas givim kopi bilong Konstitusen bilong ol long Sekretariat Ofis taim ol i rejista long dispela ya.

Aninit long Rul 6 (Membasip Aplikesen) sapos husat Soka Asosiesen i laik kamap memba bilong PNGFA i mas aplai long membasip. Yu ken kisim Aplikesen Fom lon Sekretariat long Lae. Aninit long Konstitusen, taim yu givim aplikesen fom yu mas putim kopi bilong Konstitusen, ol rul na regulesen bilong yu i go long Sekretariat. Yu ken kisim kopi bilong Asosiesen Konstitusen long Opis long yusim olsem gaid long helpim yu.

Aninit long Rul 15 (Voting na Pait Toktok) husat Memba we i

no peim 50% long anuel sabskripsen fi (o K625.00) long 31 Januəri 2003, bai i no nap long vot inap em baim ful sabskripsen fi bai em i ken vot.

Aninit long Rul 8 (Fainens, ol Fi na Sabskripsen) Memba i no peim ol ful fi bilong em long 30 April 2003 bai i no memba moa inap em i peim ful sabskripsen fi bilong dispela ya.

Plis peimen bilong ol fi i mas go long PNGFA long :-

Bank : Bank of South Pacific
Name of Account: PNG Football Association
Account Number: 1000 162886
Branch: Lae

Sapos you nidim helpim, yu ken kisim long Sekretariat long:
Telefon: 479 1998; **Fax:** 479 1999
Email: pngsoka@datec.net.pg

NOEL MOBIHA
Acting General Secretary

Nupela presiden lig presiden askim Goroka bisnis haus long sponsa

JAMES KILA
i raitim

WANPELA sinia eksekutiv bilong PNG Bowling Philip Guimap em i kisim wok presiden bilong Gahuku Op-sisen ragbi lig kompetisen long Goroka, Isten Hailens.

Guimap i kisim wok presiden las mun taim wanpela eksekutiv miting i makim em.

Insait long namba wan toktok bilong em olsem nupela presiden, Guimap i tok olsem i laik lukim dispela sisen bilong 2002/03 i pinis gut na noken wanpela trabel i mas kamap.

Em i tok ol pilaia na sapota i mas respektim disisen bilong ol referi na gems ofisel na larim sisen i pinis gut.

Insait long narapela tokto kbilong em, em i laik ol bikpela kampani na bisnis haus insait long Goroka logn sapatim ol yangpela long dispela spot wantaim sponsasip. Ol i ken sponsarim jesi na ol yunifom bilong ol o givim sampela kain prais taim sisen i pinis.

Dispela kain pasin i ken putim nem bilong ol sponsa long ples klia.

Stat long kompetisen i kam insait nau, nogat wanpeal bikpela sponsa i bin helpim dispela kompetisen.

Asoisien yet i save mekim mani na givim prais long ol wina. Ol prais ya i kam long mani bilong ol taim ol i baim rejistresen na afiliesen bilong ol wanwan klub.

"Mi laik ol kampani husat i wok longpela taim long Goroka long luk-save long dispela kain ol kompetisen we i bungim planti ol yangpela man na traim helpim.

Planti bisnis i save mekim mani long Goroka na em i wanpela we bilong givim bek samting i go bek long komynuniti," em i tokim Wantok Nius.

Gahuku Lig i gat 16 tim insait long B and A gret kompetisen. Dispela kompetisen i bin kamapim planti ol Kumul pilaia. Tasol arapela samting tu, ol viles boi i kilim skin long kompetisen ya.

Em i askim ol strongpela tim long ol bikpela senta olsem Pot Mosbi na Lae, husat i laik kisim pilaia i mas traim na go sekim dispela kompetisen we i ken lukim sampela strongpela pilaia long kisim.

Gahuku lig i tokaut long namba tu tim

JAMES KILA
i raitim

GAHUKU Lig i kolim nem bilong wanpela strongpela sait we bai bungim Mimanalo o Kabiufa namba tu tim long wanpela tri-series ragbi lig resis.

Dispela tim ya i gat ol eksperiens pilaia na tu ol lain i stap long Kumul tim. Wanpela bilong ol dispela pilaia em fowat bilong PNG Kumul yet, Makali Aizue. Dispela bagaros bilong Bundi long Madang bai poromanim ol narapela bikpela fowat bilong Kumul bilong Kefamo olsem Lawrence Goive and Tarzan Malaguna.

Beklain bilong Gahuku tu i gat planti ol eksperiens lain we i ken stapim ol lain bilong Kabiufa. Ol i gat ol pilaia olsem Glen Mondave na tu stail faiv-et Mack Siwi.

Ol opisel bilong Gahuku lig i bin kamapim wantaim dispela tim bihain long 3-pela Stet ov Orijin

pilai em kantri na siti i bin salens. Insait long fainel pilai i lukim ol kantri i winim gem las Trinde.

Gahuku tim em Glen Nami, Andy Kouropa, Glen Mondave, Stainer Samson, John Issac, Oliver Ketawo, Winnis Moihae, Tarzan Malaguna, Peter Jack, Ian Soga, Samson Hasu, Willim Limu, Lawrence Goive, Mack Siwi, Michael Kari, Cliff Apo. Denver Ame, Wesley Mondave, Peter Gitene, Makali Asue, Benny Samo na Michael Dick. Kosa em Ellison Ketawo na Trensa em Simon Steven. Ol opisel em presiden Tom Monemone, menesa em Paul Morris na asisten menesa em James Harmen.

Trerea bilong Gahuku Lig Charles Pepe i tok olsem dispela tim bai pilai tripela gem gensem ol lain Kabiufa namba tu tim. Nmaba wan gem bai kamap long dispela wik Trinde (aste).

Sori olsem Wantok Nius i no bin kisim skoa bilong dispela

gem. Pepe i tok namba gem bai kamap long narapela wik Trinde na las gem bai kamap long namba wan Sande bilong mun Februari.

Ol oispel bilong Kaibufa namba tu sait i tok olsem planti pilaia bilong ol viles mangi tasol ol i gat pawa bilong pilaia ragbi lig. Em i tok olsem ol i save pilai strong na noken guria sapos ol i givim gutpela salens long ol boi bilong Gahuku.

Kabiufa namba tu tim em Billy Murphy, Douglas Kaumba, Nohan Sibane, Hamakore Aize, Marven Gillriry, Kepman Sigi, Samson Murphy, Kevin Kumbo, Mathias Heti, Soti Yashio, Leva Gimihio, Mopson Yawane, Senny Gasone, Pstol Darraa, Thomas Ambo, Gimino, Ropert Genogoli, Gerry Finge, Tuten Bob, Dominic Paul na Samson Solsol.

Kosa em Sape Kasimo, trena em Billi Murphy na menesa em Hoken Amek.

Waribi bagarapim sindaun bilong Usu United

JACK PISAE
i raitim

STAIL hapbek bilong Waribi Brothers Alfie Nima i helpim tim bilong em long sotim win bilong Usu United 8-6 long Okkaihens op-sisen ragbi lig kompetisen long Hohola Spots oval las Sande.

Nima i skorim wanpela trai aninit long golpos na bihain em i kikim konversen. Orait ol i pilai liklik na em i kikim wanpela penalti long bringim skoa i go long 8 poin ya.

Em i winim tru birua bilong em Wayne Moary. Em i save kisim bal i go stret long ol birua bilong em na bihain giamanin ol na setim ol pilaia bilong em.

Hapbek bilong Brothers ya i save kisim gutpela sapat pilai i kam long Pasta Danlop, Simon Kora na John Komol.

Na long fowat em Daniel Amoyave, Morgan John Robert Sambai na Kaupa Bire i save wok hat tru long brukim difens bilong oposisen.

Brothers i kamapim gutpela gem tru na i givim hat taim stret long Usu United long painim ples long pilai.

Usu United i no pilai strong. Las Sande em i no de bilong ol na ol i mekim planti asua we Brothers i yusim long skorim poin.

Ol pilaia bilong Usu olsem Paul Abba, Willie Ken, Andrew Aboe, senta Morgan Robert na Jack Kuman i wok hat long traim brukim difens na skorim trai. Ol lain Brothers i no givim ol wanpela spes long muv ya.

Long hap taim, Brothers i go pas long skoa 6-2. Ol United i kisim tu poin bilong ol i kam long wanpela penalti we Obeo i kikim.

Insait long namba tu hap, ples i paia stret. Moary i joinim beklain na setim winger Jacob Robert long skorim poin klostu long gol pos. Tasol konversen ya i no go insait na skoa nau i stap 6-6.

Tupela tim wantaim i strong tru. Ol United i mekim wanpela spia takol long Brothers. Nima i kisim na kikim dispela penalti na winim dispela gem. Long arapela pilai, Hohola Magpies i kamapim gutpela gem tru na autim Yamaso Raiders 6-4. Tasol ol Raiders i protes olsem Magpies i putim moa long 13 pilaia taim dispela trai i kamap.

Negifi BEars na TK Maroon i dro 4-4, Kaiyo Storms na Linupa Panthers tu i dro 4-4, Kanage Spiders autim BP Knights 7-4 na Morata Hawks daunim JV Bulldogs 10-4.



• Kain stail bilong Okkaihens. Maski gras i bikpela, ol bai pilai yet. Hia ya ken lukim wanpela pilaia bilong Brothers i slip antap long bal.

Ol Hailens presiden i laik straik

.... bai i no inap kamap long AGM long Feb 16

OL PRESIDEN bilong ragbi lig senta insait long Hailens riji bai i no inap kamap long Anuel Jenerel Miting (AGM) bilong PNG Ragbi Futbol Lig long Februari 16 long soim olsem ol i no amanta mas.

Ol i kolim ol yet Hailens Bloc bai i no kamap long miting long soim protes bilong ol long we PNGRFL i ranim ragbi lig insait long kantri long las 6 ya.

Mausman bilong Hailens Bloc na presiden bilong Goroka Ragbi Lig (GRL) Pat Siwi i tok olsem PNGRFL i sasim bikpela fi long ol senta na tu ol pilaia na dispela i soim namba bilong ol pilaia i no planti.

Em i tok olsem PNGRFL na eksekutiv bilong em i no gat gutpela tingting long mekim ragbi lig gem i go bikpela.

Mista Siwi i tok olsem planti ol sponsa i no laik sponsarim ragbi lig bikos PNGRFL administreta i no lukautim gut gem. PNGRFL i gat moa long 30 memba tasol nau i gat 4-pela senta tasol we i sanap olsem Pot Mosbi, Lae, Rabaul na Buka.

"Dispela i no stret na ol lain i stap long PNGRFL i mas risain

"Ol i no sem long wanem samting ol i mekim long bagarapim ragbi lig. Em i

askim olgeta bot memba na jenerel menesa Kevin Murphy long risain." Siwi i tok.

Em i tok olsem sampela memba bilong PNGRFL Bot i wok long strongim sait bilong ol bihainim lig konstitusen na stretim laik bilong ol.

Presiden bilong Goroka Lig i tok nupela kompetisen SP Sil i wanpela bikpela joke stret na dispela i bringim tru sem i go long sponsa, SP na PNGRFL.

Planti ol sponsa bilong ragbi lig i no laik sapatim spot moa na nau ol i go bihainim ol arapela spot.

Mista Siwi i tok Hailens i save holim strong bilong Kumuls. Sapos nogat ol hailens pilaia, em i wankain olsem Nu Silan i no makim ol pilaia bilong Auckland Warriors we i ken salensim ol Australia.

Em i tok planti ol pilaia bilong ovasis i no save long pasin Pride. Ol PNG pilaia yet i save na ol i save givim olgeta strong bilong ol taim ol i putim dispela Kumul yunifom.

Siwi i singaut tu i go long PNGRFL long rausim-kosa Bob Bennett na maski makim tupela kosa long stadi aninit long em. I gat planti ol nesene kosa i ken mekim wok bilong ol i stap long kantri.

Sempion Post Puma i gat las sans

4-pela spes i stap long 7-pela tim

HENRY MORABANG
i raitim

SEMPION ragbi lig tim, Post Puma i gat las sans long afiliet na difendim taitel bilong em long 2003 sisen.

Post em i sempion tim bilong Pot Mosbi Ragbi Futbol Lig (POMRFL) bihain long em i autim Souths las ya. Tasol nau i luk olsem klab, Post, i painim hevi na i no baim yet wanpela fi bilong kamap memba bilong POMRFL.

Arapela strongpela tim husat i save pulim sapota long POMRFL em Souths. Ol boi Sauten Hailens i gat pawa na i save pulim planti ol lain sapota i go long ragbi lig fil long lukim gem ya.

Planti mani i tokaut olsem sapos nogat Souths long kompetisen, em i min olsem ragbi lig long Pot Mosbi bai dai. Ol arapela tim husat i no bai afiliesen yet em Royals, tim bilong ol plisman na ol boi Barramundi, Waliya.

Post, Royals, Souths na Waliya i no baim ful afiliesen fi yet. Arapela tripela klab husat i gat sans long kambek na joinim POMRFL kompetisen em ol lapun

klab ya, DCA, Hawks na Paga Panthers.

Operesen menesa Duksy Dabema bilong POMRFL i tokim Wantok olsem 6-pela klab tasol i baim afiliesen fi bilong ol. Nem bilong ol klab em Brothers, Defence, Dobo Warriors, Magani, Kone Tigers na Tarangau.

Em i tok olsem dispela 6-pela klab tasol bai resis long dispela wiken taim POMRFL i statim Nines Salens bilong em. Ol arapela tim bai i no inap resis inap ol i baim fi bilong ol - K600 tude.

Mista Dabema i tok dispela kompetisen, Nines bai statim POM Rugby League sisen we ol i tingting long kisim 10-pela klab tasol.

Em i tok afiliesen fi bilong dispela ya em K800. Sapos wanem ol klab i laik baim, ol i ken baim hap tasol long K600, givim klab konstitusen, trening venue, ol teknikel opisel na fainensel.

Operesen menesa i tok POMRFL bai yusim dispela Nines kompetisen long makim wanpela tim long go pilai long World Sevens long Sidni, Australia. Dispela tonamen bai kamap long Februari 1-2.

WANTOK SPOTS

Figgy i daunim Paradise

JACK PISAE
i raitim

FIGGY i bagarapim tru sindaun bilong biknem tim, Paradise 26-21 insait long Hohola Op-sisen basketbal kompetisen las wik.

Dispela win bai no tu poin long wanem ol pilaia na kosa bilong Figgy i no rejista wantaim Hohola Op-sisen kompetisen.

Tupela pilaia bilong Exodus we i save pilai long Capital Basketbal Lig, Dominic na Ray Nagul i statim dispela tim. Tasol ol i pilai gut tru long winim dispela gem ya.

Insait long arapela gem, Cedar i winim Kamarere 32-26 long holim yet namba wan posisen. CBL Under 18 oukawa Sammy Arusa jnr i go pas long helpim tim bilong ol i win ya.

Tim bilong Evoa Elope, Louka i laki long winim Beech Rollers 20-17 na Erima i bagarapim tru Bay Watch 36-14 na Darks i fofitim Zerupi husat i no soim pes long taim bilong pilai.

Na long gem bilong ol meri, Paradise i winim Figgy 24-12, Cedar i dro wantaim Kamarere 19-19, Beech Roller autim Louka 29-28, Erima daunim Bay Watch 24-19 na Zerupi i autim Darks 35-28.

Kodineta bilong Hohola Op-sisen kompetisen Albert Moide i plen long larim 4-pela divisen long larim top five i pilai. Dispela em long givim sans long olgeta tim long pilai long fainel.

Astingting bilong dispela sistem bilong fainel em long givim sans long olgeta lain long pilai.

Hohola em ples bilong ol biknem basketbal pilaia long 1960 na 1990s. Em i gat strongpela bilip olsem planti bilong ol dispela pilaia bai joinim Capital Basketbal Lig long nupela sisen.

Poin lata i sanap olsem (man) Cedar 8, Erima 6, Louka 4, Darks 4, Zerupi 2, Bay Watch 2, Kamarere 2, Paradise 2, Figgy 0 na Beech Rollers 0.

Na poin bilong ol meri i sanap olsem Paradise 8, Zerupi 6, Erima 6, Darks 2, Beech Roller 4, Louka 2, Kamarere 1, Cedar 1, Bay Watch 0 na Figgy 0.



• Ol boi bilong Kona Ba Eels i kisim poto bipo ol i go salensim Bears long Gordons tas ragbi. Ol Eels i win 2-1.
Poto: JOE IVAHARIA.

KB Eels i gat stail na kik

OL YANGPELA bilong Kona Ba long Gordons Bareks i gat stail na kik. Kain stail pilai bilong ol i mekim na ol i winim Bears 2-1.

Na long ol arapela gem, ol yangpela pilaia bilong Bala Raiders i soim olsem ol i ken pilai tas ragbi taim ol i rausim Erima Steamrollers 7-2 long Gordons Tas ragbi kompetisen las wik.

Ol yangpela pilaia olsem Godfrey Ilo, Kopi Kere jnr, Paul Dai, Chris Karl, Robert

Tony na Gabriel Hearo i pilai gut tru. Ol i kisim sapot i kam long ol lapun pilaia olsem Walo Kere, Clive Werner, Eddie Dai na Murray Pato long winim gem.

I tru olsem Bala bai painim hat liklik long winim primiasip. Tasol kain pilai bilong ol yangpela i soim tru olsem ol i redi tasol bihain taim.

Ol Bala Raiders i ho westim taim. Ol fowat olsem Walo Kere na Eddie Dai i go pas long brukim difens bilong oposisen.

Tasol ol Steamrollers i brukim kiau taim referi i givim penalti long Bala long op-sait. Hapbek bilong Marty Haro i no kikim gut bal na dispela i mekim ol boi Erima i belhat tru ya.

Na long narapela ol gem i bin kamap tas wik i sktap olsem Magpies i autim Lapwing Tigers 2-0, Warriors i winim Maunten Brothers 8-6, Panthers rausim Eagles 9-2, Sharks i dro wantaim Knights 5-5 na Steams i wilwilim stret Moskitos 16-4.

Vinarang helpim Kopex long win

PAUL ZUVANI
i raitim

STRONG bilong namba nain beta bilong Karanas Kopex Esau Vinarang i mekim na Kopex i kam bihain long autim tiket bilong Brown Eagles wantaim 4-2 win insait long resis bilong Pot Mosbi mens sofbal.

Vinarang i minim bisnis taim tim bilong em i mekim namba foa ining bilong ol bihain long ol man Matupit i pinisim foa raun bilong ol na i go pas wantaim 2-1 lid.

Tasol taim Vinarang i kam insait em i laik soim olsem ol man Kokopo i no man bilong pilai pilai, ol i save mekim samting stret.

Dispela i lukim Vinarang i paitim gut bal na i helpim tupela wan pilaia bilong em Mark Tavanga, Stanley Tavul na em yet long kam hom na mekim ol i win wantaim 4-2.

Dispela win bilong ol man Kokopo i helpim ol long kisim namba tu ples bihain long ol i ron bihain long AB Bears. Nau yet Elcom i go pas. Gazelle husat i wanpela long ol strongpela tim i no mekim gut long dispela sisen.

Ol man Matupit i mekim ron bilong ol long namba tu na tri inning bilong ol.

Nambawan ron bilong ol i kam long Oswald Talapa.

Dispela pilai wantaim ol narapela pilai i

kamap bihain long asosiesin i bin stapim ol pilai long malolo long taim bilong krismas na niu yia.

Pilai bilong ol meri bai stat long dispela Sarere na bai lukim tasol pilai bilong A gret. Narapela Sarere bai lukim pilai bilong B na C gret wantaim.

Tasol A, B na C gret bilong ol man i stat long las Sande.

Long ol narapela pilai Elcom i wiliwilim AB Bears 7-3 na Northern Eagles i palai antap long Manalos 3-2.

Bihain long ol dispela pilai Elcom i go pas wantaim 12 poin, Kopex 11, AB Bears 9, Gazelle 8, Northern Hawks 6, Brown Eagles 4 na Manalos 2.

Nupela Iroka taekwando klab i kisim ol man

WANPELA nupela tae kwan do klab i statim pinis skul bilong em long dispela mun long Airport Rot long Goroka, Isten Hailens provins.

Nem bilong klab em Iroka Tae Kwando Ganfu klab. Man i go pas long dispela klab em instrakta Kopex Bagufi na em wanpela blu belt holda insait long dispela mastial ats

Bagufi i tok nau yet em i stat trening wantaim liklik lain tasol na wetim husat ol lain i gat laik i ken kam putim nem na rejista wantaim em.

Bagufi i holim blu blet insait long intansenel hai spik-2 teknik trening aninit long Instakta bilong em David Gandi long Lae. Tasol nau em i go bek long asples bilong em Goroka

na statim dispela skul.

Bagufi em bilong ples Forapi insait long Lufa distrik. Em i bin stori olsem em i lusim bikipela mani taim em i pilai dispela taekwando ganfu. Dispela masel-ats spot em i narakain tru long ol narapela martial ats bikos em i save skulim ol yangpela long sait bilong pesonel developmen na tu long soim rispek insait long komyuniti na famili bilong ol yet.

"Insait long dispela ats bilong tae kwando ganfu, mipela i laik promotim dispela pasin bilong lukautim yu yet wantaim gutpela pasin na tingting na tu long rispektim ol brata na susa i stap klostu long yu," Bagufi i tok.

"Mi laik lukim olsem ol yangpela insait long komyuniti i mas

save long trupela mining bilong laip bilong ol wan wan.

"Nau yet hevi bilong bilong mani i bringim bikipela hevi long planti yangpela. Dispela i bringim ol i go long raskol pasin na tu bagarapim sindaun insait long komyuniti. Dispela i no gutpela pasin tumas," Bagufi i tok.

Em i tok olsem rejistresen insait long wanpela ya em K30. Tasol ol sumatin i ken peim haphap bikos em i luksave olsem nau yet planti lain i gat hevi tru long sait bilong painim mani long sapotim sindaun bilong ol.

Ples bilong trening bilong Iroka Tae kwando gandfu em long Iroka setelmen baksait tasol long Kofi Bot opis long Airport Rot.

• Ol dros na poin lada
pes 24

• Sengero kisim sapot
pes 26

• POM Nains stat long dispela wik
pes 27

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.